

王子安集

王勃

文碩閣

wenshuoge.com

目录

关于我们	3
提要	5
原序	6
卷一	8
卷二	12
卷三	18
卷四	26
卷五	30
卷六	34
卷七	38
卷八	42
卷九	47
卷十	52
卷十一	56
卷十二	62
卷十三	67
卷十四	72
卷十五	76
卷十六	81
王勃传	85
王勃传	86
遗事	87
集评	88
纠谬	89
田家三首	90
补遗	91

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部二

王子安集 别集类一【唐】

提要

【臣】等谨案王子安集十六卷唐王勃撰勃字子安绛州龙门人高宗时官虢州参军事迹具唐书文苑传传称其文集三十卷而杨炯集序则谓分为二十卷具诸篇目洪迈容斋随笔亦称今存者二十卷盖宋代所行犹其旧本明以来其集已佚原目遂不可考世所传初唐十二家集仅载勃诗赋二卷阙略殊甚故皇甫汈作杨炯集序称王诗赋之余未睹他制此本乃明崇祯中闽人张燮搜辑文苑英华诸书编为十六卷虽非唐宋之旧而以视别本则较为完善矣勃文为四杰之冠儒者颇病其浮艳案段成式酉阳杂俎曰张燕公尝读勃夫子学堂碑颂帝车南指遁七曜於中阶华盖西临高五云於太甲四句悉不解访之一公【案一公谓僧一行也】一公言北斗建午七曜在南方有是之祥无位圣人当出华盖以下卒不可悉洪迈容斋随笔亦曰王勃等四子之文皆精切有本原其用骈俪作记序碑碣盖一时体格如此而後来颇议之杜诗云王杨卢骆当时体轻薄为文哂未休尔曹身与名俱灭不废江河万古流正谓此耳身名俱灭以责轻薄子江河万古指四子也韩公滕王阁记云江南多游观之美而滕王阁独为第一及得三王为序赋记等壮其文词注谓王勃作游阁序又云中丞命为记窃喜载名其上词列三王之次有荣耀焉则韩之所以推勃亦为不浅矣夫一行段成式博洽冠绝古今杜甫韩愈诗文亦冠绝古今而其推勃如是枵腹白战之徒掇拾语录之糟粕乃沾沾焉而动其喙殆所谓蚍蜉撼树者欤今录勃集并录成式及迈之所记庶耳食者无轻诋焉乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

王子安集原序

大矣哉文之时义也有天文焉察时以观其变有人文焉立言以重其范历年兹久通为文质应运以发其明因人以通其粹仲尼既没游夏光洙泗之风屈平自沈唐宋弘汨罗之迹文儒於焉异术词赋所以殊源逮秦氏燔书斯文天丧汉皇改运此道不还贾马蔚兴已亏於雅颂曹王杰起更失於风骚僂俛大猷未忝前载泊乎潘陆奋发孙许相因继之以顔谢申之以江鲍梁魏羣材周隋衆制或苟求虫篆未尽力於丘坟或独徇波澜不寻源於礼乐会时沿革循名抑扬多守律以自全罕非常而制物其有飞驰倏忽偶傥纷纶鼓动包四海之名变化成一家之体蹈前贤之未识探先圣之不言经籍为心得王何於逸契风云入思叶张左於神交故能使六合殊材并推心於意匠八方好事咸受气於文枢出轨躅而骧首驰光芒而动俗非君之博物孰能致於此乎君讳勃字子安太原祁人也其先出自有周濬启文明之裔隐乎炎汉弘宣高尚之风晋室南迁家声布於淮海宋臣北徙门德胜於河汾宏材继出达人间峙祖父通隋秀才高第蜀郡司户书佐蜀王侍读大业末退讲艺于龙门其卒也门人諡之曰文中子闻风睹奥起予道唯揣摩三古开闡八风始摛落於邹韩终激扬於荀孟父福時历任太常博士雍州司功交址六合二县令为齐州长史抑惟邦彦是曰人宗絕六艺以成能兼百行而为德司马谈之晚岁思弘授史之功扬子云之暮年遂起参玄之叹君之生也含章是托神何繇降星辰奇伟之精明何由出家国贤才之运性非外獎智乃自然孝本乎未名人应乎初识器业之敏先乎就傅九岁读顔氏汉书撰指瑕十卷十岁包综六经成乎期月悬然天得自符昔训时师百年之学旬日兼之昔人千载之机立谈可见居难则易在塞咸通於术无所滯於词无所假幼有钧衡之略独负舟航之用年十有四时誉斯归太常伯刘公巡行风俗见而异之曰此神童也因加表荐对策高第拜为朝散郎沛王之初建国也博选奇士徵为侍读奉教撰平台钞略十篇书就赐帛五十疋先鸣楚馆孤峙齐宫乘忌侧目应刘失步临秀不容寻反初服远游江汉登降岷峨观精气之会昌翫灵奇之盼饗考文章之迹徵造作之程神机若助日新其业西南洪笔咸出其词每有一文海内惊瞻所制九陇县孔子庙堂碑文宏伟絶人稀代为宝正平之作不能夺也咸亨之初乃参时选三府交辟遇疾辞焉友人陵季友时为虢州司法盛称弘农药物廼求补虢州参军坐免岁余寻复旧职弃官沈迹就养于交址焉长卿坐废於时君山不合於朝岂无媒也其惟命乎富贵比於浮云光陰踰於尺璧着撰之志自此居多观覽旧章翺翔羣艺随方渗漉于何不尽在乎词翰倍所用心尝以龙朔初载文场变体争构纖微竞为雕刻糅之金玉龙凤乱之朱紫青黄影带以徇其功假对以称其美骨气都尽刚健不闻思革其弊用光志业薛令公朝右文宗托末契而推一变卢照邻人间才杰覽清规而辍九攻知音与之矣知已从之矣於是鼓舞其心发泄其用八紘驰骤於思绪万代出没於毫端契将往而必融防未来而先制动摇文律宫商有奔命之劳沃荡词源河海无息肩之地以兹伟鑒取其雄伯壮而不虚刚而能润雕而不碎按而弥坚大则用之以时小则施之有序徒纵横以取势非鼓怒以为资长风一振衆萌自偃遂使繁综浅术无藩篱之固纷绘小才失金汤之险积年绮碎一朝清廓翰苑豁如词林增峻反诸宏博君之力焉矫枉过正文之权也後进之士翕然景慕久倦樊笼咸思自释近则面受而心服远则言发而响应教之者逾於激电传之者速於置邮得其片言而忽焉高视假其一气则邈矣孤寡窃形骸者既昭发於枢机吸精

微者亦潛附於声律虽雅才之变例诚壮思之雄宗也好异之徒别为纵诞专求恠说争发大言乾坤日月张其文山河鬼神走其思长句以增其滯客气以广其灵已逾江南之风渐成河朔之制?称相述罕识其源扣纯粹之精机未投足而先逝览奔放之偏节已滯心而忘返廼相循於局步岂见习於通方信譎不同非墨翟之过重增其放岂庄周之失唱高罕属既知之矣以文罪我其可得乎君以为摘藻雕章研几之余事知来藏往探蹟之所宗随时以发其惟应便稽古以成其殆察微循紫宫於北門幽求圣律访玄扈於东洛响像天人每覽韦编思弘大易周流穷乎八索变动该乎四营为之发挥以成注解尝因夜梦有称孔夫子而谓之曰易有太极子其勉之寤而循环思过半矣於是穷蓍蔡以象告考爻象以情言既乘理而得玄亦研精而循道虞仲翔之尽思徒见三爻韩康伯之成功仅踰两系君之所注见光前古与夫发天地之秘藏知鬼神之情状者合其心矣君又以幽赞神明非杼轴於人事经营训导廼优游於圣作於是编次论语各以羣分穷源造极为之古训仰贯一以知归希体二而致远为言式序大义昭然文中子之居龙门也睹隋室之将丧知吾道之未行循叹凤之远图宗获麟之遗制裁成大典以赞孔門讨论汉魏迄於晋代删其诏命为百篇以续书甄正乐府取其雅奥为三百篇以续诗又自晋太熙元年至隋开皇九年平陈之岁褒贬行事述元经以法春秋門人薛收窃慕因为元经之传未就而歿君思崇祖德光宣奥义续薛氏之遗传制诗书之衆序包举艺文克融前烈陈羣稟太丘之训时不逮焉孔汲传司寇之文彼何功矣诗书之序并冠於篇元经之传未终其业命不我与有涯先谢春秋二十八皇唐上元三年秋八月不改其乐顔氏斯殂养空而游贾生终逝呜呼天道何哉所注周易穷乎晋卦又注黄帝八十一难幸就其功撰合论十篇见行於代君平生属文岁时不倦綴其存者才数百篇嗟乎促龄材气未尽歿而不朽君子贵焉兄勔及勳磊落词韵鏗鏘风骨皆九变之雄律也弟助及勳摠括前藻网罗羣思亦一时之健笔焉友爱之至人伦所及永言存歿何痛如之援翰纪文咸所未忍盖以投分相期非宏词说潜然?涕究而序之分为二十卷具诸篇目三部盛作恨不序於生前七志良书空得撰於身後神其不远道或存焉华陰杨炯撰

卷一

钦定四库全书

王子安集卷一

唐王勃撰

赋

春思赋【并序】

咸亨二年余春秋二十有二旅寓巴蜀浮游岁序殷忧明时坎壈圣代九陇县令河东柳太易英达君子也仆从游焉高谈胸怀颇泄愤懣于时春也风光依然古人云风景不殊举目有山河之异不其悲乎仆不才耿介之士也窃稟宇宙独用之心受天地不平之气虽弱植一介穷途千里未尝下情於公侯屈色於流俗凜然金石自匹犹不能忘情於春则知春之所及远矣春之所感深矣此仆所以抚穷贱而惜光陰怀功名而悲岁月也岂徒幽宫狭路陌上桑间而已哉屈平有言目极千里伤春心因作春思赋庶几乎以极春之所至析心之去就云尔

若夫年临九域韶光四极解宇宙之严气起亭臯之春色况风景兮同序复江山之异国感大运之虚盈见长河之纡直蜀川风隔秦川今年节物异常年霜前柳叶衔霜翠雪後梅花犯雪妍霜前雪里知春早看柳看梅觉春好思万里之佳期忆三秦之远道淡荡春色悠扬怀抱野何树而无花水何堤而无草於是仆本恨人平生自沦怀书去洛抱剑辞秦惜良会之邂逅厌他乡之苦辛忽逢边候改遥忆帝乡春帝乡迢递关河里神臯欲暮风烟起黄山半入上林园玄灞斜分曲江水玉台金阙纷相望千门万户遥相似昭阳殿里报春归未央台上看春晖水精却挂鸳鸯幔云母斜开翡翠帟竞道西园梅色浅争知北阙柳陰稀歛态调歌扇回身整舞衣银蚕吐丝犹未暖金燕衔泥试学飞妾本幽闺学歌舞寧知汉代多巡抚前年斋祭谒甘泉今岁笙箫祠后土桃花万骑喧长薄兰叶千旗照平浦见原野之芳春忆山河之邃古长安路狭遶长安公子春来不厌看杏叶装金轡?荀?玉鞍耸盖临平乐回笳出上兰上兰经鄠杜挥鞭日将暮白马新临御沟道青牛近出章台路章台接建章垂柳复垂杨草开驰马埒花满鬪鸡塲南隣少妇多妖婉北里王孙驻行幘乍怪前春节候迟预道今年寒食晚伤紫陌之春度惜青楼之望远紫陌青楼照月华珠帷黼帐七香车蛾眉画来应几样蝉?梳?时半欲斜恨雕鞍之届晚痛银箭之更除行行避叶步步看花因狂夫之荡子成贱妾之倡家狂夫去去无穷已贱妾春眠春未起自有兰闺数十重安知榆塞三千里榆塞连延玉关侧云间沉沉不可识葱山隐隐金河北雾里苍苍几重?忽有驿骑出幽并传道春衣万里程龙沙春草遍瀚海春云生疎勒井泉寒尚竭燕山烽火夜应明闻道河源路远远谁教夫婿苦行行君行塞外多霜露为想春台起烟雾游丝空冒合欢枝落花自遶相思树春望年年絶幽闺离绪切春色朝朝异边廷羽书至都护新封万里侯将军稍定三边地长旆犹衔扫云色宝刀尚拥干星气昨夜祁连驿使还征夫犹在鴈门关君度山川成白首应知岁序歇红颜红颜一别成胡越夫婿连延

限城阙羌笛横吹陇路风戎衣直照关山月春色徒盈望春悲殊未歇复闻天子幸关东驰道
烟尘万里红析羽摇初日繁笳思晓风後骑犹分长乐馆前旌已映洛阳宫洛阳宫城纷合沓
离房别殿花周匝河阳别舍抵长河丹轮绀幘相经过戚里繁珠翠中闺盛绮罗凤移金谷舞
莺引石城歌向夕天津洛桥暮争驱紫燕黄牛度闲居伊水园旧宅邙山路武子新布金钱埒
季伦欲碎珊瑚树复道西墉春雾寡更值南津春望写入金市而乘羊出铜街而试马叶抱露
而争密花牵风而乱下锦障紫山罗帟照野司空令尹之博物二陆三张之文雅新年柏叶之
樽上巳兰英之笋春来并是春何啻两违秦忽逢江外客复忆江南春罗衣乘北渚锦?出东隣
江边小妇无形迹特怨狂夫事行役凤凰山上花无数鹦鹉洲中草如积春江澹容与春期无
处所春水春鱼乐春汀春鴈举君道玉门关何如金陵渚为问逐春人年光几处新何年春不
至何地不宜春亦有当春逢远客亦有当春别故人风物虽同候悲欢各异伦归去春山恣闻
放蕙畹兰臯行可望何为悠悠坐惆怅比来作客住临邛春风春日自相逢石镜岩前花屡密
玉轮江上叶频浓高平灞?三千里少道梁山一万重自有春花煎别思无劳春镜照愁容盛年
耿耿辞乡国长路遥遥不可极形随朗月骤东西思逐浮云几南北春蝶参差命俦侣春莺绵
蛮思羽翼余复何为此方春长叹息会当一举絶风尘翠盖朱轩临上春朝昇玉署调天纪夕
憩金闺奉帝纶长卿未达终希达曲逆长贫岂剩贫年年送春应未尽一旦逢春自有人

七夕赋

若夫乾灵鹄?之端地辅龙骖之始凭紫都而受历按玄丘而命纪凤毛锺桂闾之祥麟角灿椒
庭之祉驰朱轩於九域振黄麾於万里抗芝馆而星罗擢兰宫而霞起则有皇慈雾洽圣渥天
浮庭分玉禁邸瞰金楼剪皃洲於细柳披鹤籞於长楸启鱼铃而分帝术授虹璧而控神州拥
黄山於石磴泄玄灞於铜沟列瑶牕而送燠辟银榜而迎秋君王乃排青幌摇朱舄戒鹄舆静
鸾掖绕露廊而转步傚云阡而纵迹啸陈客於金牀命淮仙於桂席翔翠?於金甸迎吹箫於凤
驛伫灵匹於星期眷神姿於月夕於时玉绳湛色金汉余光烟凄碧树露湿银塘视莲潭之变
彩见松院之生凉引惊蟬於宝瑟宿兰燕於瑶筐緑台兮千仞頽楼兮百常拂花筵而惨惻披
叶序而徜徉结遥情於汉陌飞永睇於霞庄想佳人兮如在怨灵欢兮未扬促遥悲於四运味
遗歌於七襄於是虬檐晚静鱼扃夜饰忘帝子之光华下君王之顔色握犀管展鱼笺顾执事
招仲宣仲宣跪而称曰臣闻九变无津三灵有作布元气於浩荡运太虚於寥廓辨河鼓於西
垞降天孙於东堦循五纬而清黄道正三衡而澄紫落海人支石之机江女穿针之阁鄙尘情
於春念拟仙契於秋诺河光清地纪山气斂天标霜凝碧宙水莹丹霄耀麟轩於雾术褰羽旆
於星桥徵赤螭而架渚漾青翰而乘潮停翠梭兮卷霜縠引鸳杼兮割冰绡举黄花而乘月驾
笼黛叶而卷云翹抚今情而恨促指来渚而伤遥既而丹轩黄【一作万】拱紫房朱【一作
千】龠仙御透迟灵徒扰弱风惊雨骤烟回电烁娲皇召巨野之龙庄?命雕陵之鹄驻麟驾披
鸾幕奏云和泛霞酌碧虬玉室之饌白兔银台之药荷叶頽皎芙蓉青雀上元锦书传宝字王
母琼箱荐金约彩攀鱼头比目缝香緘燕尾同心缚罗帟五花悬珉砌百枝然下芸幄而昵枕
弛兰服而交筵托新欢而密勿怀往眷而潺湲於是羈鸾切镜旅鹤惊弦悲侵玉履念起金钿
俨归装而容曳整还盖而迁延洞庭波兮秋水急关山晦兮夕露连谓河汉之无浪似参商之
永年君王乃背彤砌陟玄室冲想自闲神情如逸痛灵妃之稀偶嘉沉思之可毕荆艷齐升燕
佳并出金声玉韵蕙心兰质珠栊绮檻北风台绣户雕牕南向开响曳红云歌面近香随白雪

舞腰来掩清琴而独进凌绦树而轻回卢女黄金之碗张家碧玉之杯奉君王於终夕夫何怨於良媒俄而月还西汉霞临东沼鳧氏鸣秋鸡人唱晓玉关控鹤琼林飞鸟君王乃驭风殿而长怀俯云台而自矫矜雅范而霜高穆冲襟而霞眇迎十客召三英香涵蔗酎吹肃兰旌娃馆疎兮綠草积欢房寂兮紫苔生聳词源於月径披翰藪於云局方絕元凯而高视岂与梁楚而骈声

九成宫东台山池赋【并序】

九成宫东台地接闲旷面山临水尔其松峯桂壑红泉碧磴金石千声云霞万色侍郎张公雅思沉郁永怀梓匠式侔仙造聿构灵?纖波成止水之源拳石俨干霄之状虽流波覆篲俯藉人机而布叶攢花渺同天会仆因暇日滥奉清埃敢抽南亩之才?叙东山之事云尔若夫金台妙境玉署仙居酌丹池【一作墀】之晓暇候青禁之宵余骤冲情於月道飞峻赏於烟墟指山楹而思逸怀水镜而神虚既而仰瞻赭峯傍窥黛壑复嶂烟回攢溪雾错伟沉用之兼济想神功之可作规叠巘於盘龙宪飞泉於挂鹤覆篲而紫岩磴浮芥而环川墀采拳石於瑶滨拏纖珠於绮薄萍徙楚江之蒂花转崑墟之萼岫蕴玉而虹惊浦涵珠而星落美仁智之同归信高深之纵托尔其危岑漏景曲渚留寒高松偃鹤清筱鸣鸾被兰丘而结佩照莲服而披冠激坳堂於别渚引肤寸於危峦若乃岭横鸡秀波连凤液花鸟紫红苹鱼漾碧綠衣玄衽赭鳞翠额在林藪而同欢望江湖而齐适及夫景沉西嶠月下东滨峰深夜久潭静秋新荷抽水盖薜引山茵雪芝献液露菊倾津嗣南商之逸兴有东海之遐宾保林泉而肆赏混簪绂而同尘何濯纓之有地如攀桂之无因

游庙山赋【并序】

玄武山西有庙山东有道君庙盖幽人之别府也长萝巨树梢翳云日王子驭风而游泠然而善盖怀霄汉之举而忘城阙之恋矣因欲攀洪崖於烟道邀羡门於天路仙师不存壮志徒尔俄而泉石移景秋陰方积松柏羣吟悲声四起背乡关者无复向时之荣焉呜呼有其志无其时则知林泉有穷路之哭【一作嗟】烟霞多後时之叹不其悲乎遂作赋曰

陟彼山阿积石峩峩亭臯千里伤如之何启松崖之密?攀桂岵之崇柯隔浮埃於地络披颢气於天罗尔其綠岩分径苍岑对室菌轩丹绚芝塲翠密俯泉石之清泠临风飈之瑟?仰紺台而携手望玄都而容膝於是蹑霞冈於玉砌步云岵於金坛怀妙童与真女想青螭及碧鸾情恍恍而将逸心迴迴而未安见丹房之晚晦知紫洞之宵寒既而露昏千嶂烟浮四野恨流俗以情多痛飞仙之术寡驱逸思於方外局高情于天下使蓬瀛可得而宅焉何必怀於此都也乱曰已矣哉吾谁欺林壑逢地烟霞失时托宇宙兮无日俟鸾虬兮未期他乡山谷祇令人悲

寒梧栖凤赋

凤兮凤兮来何所图出应明主言栖高梧梧则峯阳之珍木凤则丹穴之灵雏理符有契谁言则孤游必有方孩【一作晒】南飞之惊鹄音能中吕嗟入夜之啼乌况其灵光萧散节物凄

清疎叶半殒高歌和鸣鸟也将托其宿止人也焉知乎此情月照孤影风传暮声将振耀其五色俟箫韶之九成九成则那率舞而下怀彼衆会罔知淳化虽璧沼可饮更能适於醴泉虽琼林可栖复想巡於竹榭念是欲往敢忘昼夜苟安安而能迁则思思其不暇故当披拂寒梧翻然一发自此西序言投北阙若用之衔诏冀宣命於轩墀若使之游池庶承恩於岁月可谓择木而俟处卜居而後歇岂徒比迹於四灵常栖栖而没没

江曲孤鳬赋【并序】

梓州之东南涪江之所合有潭焉周数十步青壁絶地緑波澄天常有孤鳬栖荡其侧飞沉翻唼而天性不违嗟乎宇宙之容我多矣造化之资我厚矣何必处华池之内而求稻粱之恩哉遂作赋曰

灵凤翔兮千仞大鹏飞兮六月虽凭力而易举终候时而难发不如深潭之鸟焉顺归潮而出没迹已存於江汉心非系於城阙吮红藻翻碧莲刷雾露栖云烟迫之则隐驯之则前去就无失沉浮自然尔乃忘机絶虑怀声弄影乘骇浪而神惊漾澄澜而趣静耻园鸡之恋促悲塞鸿之赴永知动息而多方屡沿洄而自省故其独泛单宿全真远致反覆幽溪淹留胜地伤云鴈之婴缴惧泉鱼之受饵甘辞稻粱之惠焉而全饮啄之志也

驯鸢赋

海上兮云中青城兮绛宫金山之断鹤玉塞之惊鸿谓江湖之涨不足憩谓宇宙之路不足穷终衔石矢坐触金笼声酸夕露影怨秋风已矣哉何气高而望阔卒神瘁而智痒徒鹜迹於仙游竟纏机於俗网未若兹禽犹融泛想惭丹丘之丽质谢青田之逸响与道浮沉因时俯仰去非内惧驯非外獎夫劲翮挥风雄姿触雾力制烟道神周天步郁霄汉之弘图受园亭之近顾质虽滞於城阙策已成於云路陈平负郭之居韩信昌平之寓似达人之用晦混尘蒙而自托类君子之含道处蓬蒿而不忤悲授饵之徒悬痛开弦之自落故尔放怀於诞畅因此寄心於寥廓

王子安集卷一

卷二

钦定四库全书

王子安集卷二

唐王勃撰

赋

采莲赋【并序】

昔之赋芙蓉者多矣虽复曹王潘陆之逸曲孙鲍江萧之妙韵莫不权陈丽美粗举采掇岂所谓究厥丽态穷其风谣哉顷乘暇景历覩衆制伏翫累日有不滿焉遂作赋曰

非登高可以賦者唯采蓮而已矣况洞庭兮紫波复瀟湘兮綠水或暑雨兮朝霁乍涼風兮暮起黛叶青跗烟周五湖紅葩綠蘂電銖千里尤見重於幽客信作謠於君子尔其珍族廣茂淑类傳鮮藻河渭之空曲被沮漳之沦漣燭澄灣而爛爛亘修漲之田田豈直水区澤國江湄海堧是以吳娃越艷鄭婉秦妍感靈翹於上節悅瑞色於中年錦帆映浦羅衣塞川飛木蘭之畫楫駕芙蓉之綺船問子何去幽潭采蓮已矣哉誠不知其所以然賞由物召興以情遷故其游泳一致悲欣萬緒至若金室麗妃璇宮佚女傷鳳台之寂寞厭鸞局之閑處侍飲南津陪歡北渚見硯岸之紆直親旌旄之低舉上苑神池芳林御陂樓陰架泚殿彩乘漪張拜洛之容衛備橫汾之羽儀簫鼓發兮龍文動鱗羽喧兮鷁首移咸靚粧而麗服各分鸞而并馳苹紫漿碍荇觸船危視云霞之沃蕩望林泉之蔽亏川泱泱兮菡萏积水湛湛兮芙蓉披惜歲時兮易暮傷君王兮未知折綰房與綰葯攬紅葩及碧枝回綃裙兮竊獨歡步羅韞兮私自奇莫不驚香悼色畏別傷離復有渚宮年少期門公子翠髮蛾眉頰唇皓齒傅粉蘭台之上偷香椒房之里亦復銜恩激誓佩寵緘愁承好賜之珍席奉嬉宴之彩旂綉棟曛兮翠羽帳瑤塘曙兮青翰舟攀條拾蘂沒波泝流池心寬而藻薄浦口窄而萍稠和桡姬之卫吹接榜女之齊讴去復去兮水色夕采復采兮荷華秋愿承歡而卒歲長接席而寡仇于時蓊北無事關西始樂霧靜江垠氛恬海漠寢怪氣於沅湘照榮光於河洛殊方异类舞咏相錯王公卿士歌吹并作則有侯家瑣第戚里芳園穿池灞之曲蓄水河陽之源堤防谷口島嶼輶轅嘉木畢植靈草具繁沉桂北之丹藕擢荆南之紫根鬱萋萋而霧合粲晔晔而霞翻泊乎氣徂都鄙景萃川陸麥雨微涼梅飈淺燠命妖侶於石城嘯娛朋於金谷乃使綠珠捧棹青桡理舳舻芳醪藉珍餼泛玉潭之弥漫遶金渠之隈隩石近水而苔濃岸連山而樹復排芰末而爭遠托芦問而競逐赴汨凌波飛桂振羅風低綠干水濺黃螺上客喧兮樂未已美人醉兮顏將酡畏蓮色之如臉愿衣香而勝荷徘徊郢調淒愴燕歌念窮歡於水涘誓畢賞於川阿結漢女邀湘娥北溪蘂尚密南汀花更多恨光景兮不住諧芳馨兮謂何若乃南鄢義妻东吴信婦結綺整佩承筐奉箒忽君子兮有行復良人兮远征南討九真百越北戍鸡田鴈城念去魂駭相視骨驚臨春渚兮一送見秋潭之四平與子之別烟波望絕念子之寒江山路難水淡淡兮蓮叶紫風??兮荷花丹剪瑤帶而犹

恨折琼英而不欢既而缘限逗浦返棹归櫓睠芳草兮已残忆离居兮方苦延素颈於极涨攘皓腕於神浒惜佳期兮末繇徒增思兮何补又若倡姬荡媵命侣招羣淇上洛表湘臯汝坟望洲草兮翡翠色动浦水兮骊龙文愿解佩以邀子思褰裳而从君悲时暮愁日曛鸣环钏兮响窈窕艷珠翠兮光缤纷怜曙野之絛气爱晴天之碧云棹巡汀而柳拂船向渚而菱分掇翠茎以翳景笼朱萼以为裙挺楫凌乱云流雨散鸣榔络绎雾罢烟释状飞虬之蜿蜒若惊鸿之奕奕艇怯奔潮篙憎浅石丝着手而偏绕刺牵衣而屡褰乃有贵子王孙乘闲纵观何平叔之符彩潘安仁之藻翰税龙马於金堤命鳧舟於石?锦?翻洒银檣照烂日侧光沉风惊浪深盼北渚之新赠恣东溪之密寻鸳鸯绣彩之文履玳瑁琼华之宝琴扣舷击榜吴歛越吟溱与洧兮叶覆水淮与济兮花冒浥值明月之夕出逢丹霞之夜临茱萸歌兮軫妾思芍药曲兮伤人心伊采莲之贱事信忘情之盖寡虽迹兆於水乡遂风行於天下感极哀乐声参郑雅是以缅察谷底穷覽地维北尽丰镐滂滂南究江沱越沂莫不俟期应节沿涛泛湄薄言采之兴言服之发文扁之丽什动幽幌之情诗使人结眷令人想思宜其色震百草香夺九芝栖碧羽之神雀负青丹之宝龟紫秩流记丹经秘词岂徒加绣柱之光彩添文井之华滋已哉向使时无其族代乏厥类独秀上清之境不生中国之地学鸾凤而时来与鸛鷖而间至必能使衆瑞彩没羣颺色沮汤武斋戒伊臯延伫岂俾夫秦童赵仆倡姬艳女狎而翫之擷而采之乎时有东鄙幽人西园旧客常陪帝子之輿经侍夫人之籍咏緑竹於风晓赋朱华於月夕暑往寒来忽矣悠哉蓬飘梗逝天涯海际似还邛之寥廓同适越之淫滞萧索穷途飘飊一隅昔闻七泽今遇五湖听菱歌兮几曲视莲房兮几株非邳地之宴语异睢苑之欢娱况复殊方别域重瀛复嶂虞翻则故乡寥落许靖则生涯惆悵感芳草之及时惧修名之或丧誓将划迹颍上栖影渭阳枕箕岫之孤石泛磻溪之小塘餐素实兮吸絛芳荷为衣兮芰为裳永洁已於丘壑长寄心於君王且为歌曰荣华息功名恻奇秀兮异植红光兮碧色稟天地之淑丽承雨露之沾饰莲有藕兮藕有枝才有用兮用有时何当婀娜花实移为君含香藻凤池

涧底寒松赋【并序】

岁八月壬子旅游於蜀寻茅溪之涧深蹊絶磴人迹罕到爰有松焉冒霜停雪苍然百丈虽高柯峻穎不能踰其岸呜呼斯松托非其所出羣之器何以别乎盖物有殊类而合情士有因感而成兴遂作赋曰

惟松之植于涧之幽盘柯跨嶮杳杳凭流寓天地兮何日凌霜露兮几秋见时华之屡变知俗态之多浮故其磊落殊状森梢峻节紫叶吟风苍条振雪嗟英鉴之稀遇保真容之未缺攀翠嶠而形疲指丹霄而望絶已矣哉盖用轻则资衆器宏则施寡信栋梁之已成非榱桷之相假徒志远而心屈遂才高而位下斯在物而有焉余何为而悲者

慈竹赋【并序】

广汉山谷有竹名慈生必向内示不离本修茎巨叶攢根?抵丛之大者或至百千株焉而紫结踰乎咫尺好事君子徙为堦庭之翫焉吁嗟非此土所有乃有厌流俗之讥动乡关之思者盖抚高节而兴叹覽嘉名而思归遂为赋曰

有竹猗猗生于高陂左连瑶带右杂琼枝恨幽客之方赏嗟君侯之不知徙蔚丹谷迁荣緑池
气凜凜而犹在色苍苍而未离屈岩壑之容貌充堦庭之羽仪尔其划疆分域骈陰抗趾叠干
龙回攢根凤峙防碧露於霄末翳红光於暈始崇柯振而云霭生繁叶动而风飈起拥凉砌之
晨肃屏炎局之昼滓至若白藏载谢玄英肇切塞北河坚关南地裂观衆茂之咸悴验贞辉之
独洁抽劲緑以垂霜总严青而负雪盖同类之常稟非殊方之异节若乃宗生族茂天长地久
万柢争盘千株竞纠如母子之鈎带似闺门之悌友恐孤秀而成危每羣居而自守付美名之
天属而和气之冥受嗟乎道之存矣物亦自有【一作有之】不背仁而贪地不藏节以遯时
故其贞不自炫用不见疑保夷险之无易晒荣枯之有期俄蓬转於岷徼遂萍流於江汜分兄
弟於两乡隔晨昏於万里抚贞容而骨愧伏嘉号而心死庶因感而长怀将策情而励已

青苔赋【并序】

吾之旅游数月矣憩乎荒涧覩青苔焉缘崖而上乃喟然叹曰嗟乎苔之生於林塘也为幽客
之赏苔之生於轩庭也为居人之怨斯择地而处无累於物也爱憎从而生遂作赋曰

若夫桂洲苍涧松崖秘液绕江曲之寒沙抱丛幽之古石泛回塘而积翠紫修树而凝碧契山
客之奇情谐野人之妙适及其瑶房有寂琼室无光霏微君子之砌蔓延君侯之堂引浮青而
泛露散轻緑而承霜起金钿之旧感惊玉筍之新行若夫弱质绵羃纖滋布濩措形不用之境
托迹无人之路望夷险而齐归在高深而委遇惟爱憎之未染何悲欢之诡赴宜其背阳就陰
违喧处静不根不蒂无华无影耻李之暂芳笑兰桂之不永故顺时而不竞每乘幽而自整

四言古诗

倬彼我系 勃兄勸序

倬彼我系舍弟虢州参军勃所作也伤迫乎家贫道未成而受禄不得如古之君子四十强而
仕也故本其情性原其事业因陈先人之迹以议出处致天爵之艰难也

倬彼我系出自有周分疆锡社派别支流居卫仕宋匡嬴相刘乃武乃文或公或侯晋代崩坼
衣冠扰弊粤自太原播徂江澨礼丧贤隐时屯道闭王室如毁生人多殪伊我有器思逢其主
自东旋西择木开宇田彼河曲家乎汾浦天未厌乱吾将谁辅伊我祖德思济九埏不常厥所
于兹五迁欲及时也夫岂愿焉其位虽屈其言则传爰述帝制大蒐王道曰天曰人是祖是考
礼乐咸若诗书具草貽厥孙谋永为家宝伊余小子信惭明哲彼网有条彼车有辙思屏人事
克终前烈于嗟代网卒余来綯来綯伊何谓余曰仕我瞻先达三十方起夫岂不怀高山仰止
愿言毓德啜菽饮水有乌反哺其声嗷嗷言念旧德忧心忉忉今我不养岁月其滔僂俛从役
岂敢告劳从役伊何薄求卑位告劳伊何来参卿事名存实爽负信愆义静言遐思中心是愧

五言古诗

上巳浮江宴韵得址字

披观玉京路驻赏金台址逸兴怀九仙良辰倾四美松吟白云际桂馥清谿里别有江海【一作汉】心日暮情何已

春日宴乐游园韵得接字

帝里寒光尽神臯春望浹梅郊落晚英柳甸惊初叶流水抽奇弄崩云洒芳牒清尊湛不空暂喜平生接

山亭夜宴

桂宇幽襟积松台凉夜永森沈野迳寒肃穆岩扉静竹晦南阿色荷翻北潭影清兴殊未阑林端照初景

咏风

肃肃凉风【一作景】生加我林壑清驱烟寻磻户卷雾出山楹去来固无迹动息如有情日落山水静为君起松声

怀仙【并序】

客有自幽山来者启予以林壑之事而烟霞在焉思解纓绂永咏山水神与道超迹为形滞故书其事焉

鹤岑有奇怪麟洲富仙家紫泉漱珠液玄岩列丹葩常希披尘网眇然登云车鸾情极霄汉凤想疲烟霞道存蓬瀛近意惬朝市賒无为坐惆怅虚此江上华

忽梦游仙

仆本江上客牵迹在方内寤寐霄汉间居然有灵对翕尔登霞首依然蹑云背电策驱龙光烟途俨鸾态乘月披金帔连星解琼佩浮识俄易归真游邈难再寥廓沈遐想周遑奉遗海流俗非我乡何当释尘昧

七言古诗

秋夜长

秋夜长殊未央月明露白澄清光层城绮阁遥相望川无梁北风受节南鴈翔崇兰委质时菊

芳鸣环曳履出长廊为君秋夜捣衣裳織罗对凤凰丹绮双鸳鸯调砧乱杵思自伤征夫万里
戍他乡鹤关音信断龙门道路长君在天一方寒衣徒自香

采莲曲

采莲归綠水芙蓉衣秋风起浪鳬鴈飞桂棹兰桡下长浦罗裙玉腕轻摇櫓叶屿花潭极望平
江讴越吹相思苦相思苦佳期不可驻塞外征夫犹未还江南采莲今已暮采莲花渠今那必
尽娼家官道城南把桑叶何如江上采莲花莲花复莲花花叶何稠叠叶翠本羞眉花红强如
颊佳人不在兹怅望别离时牵花怜共蒂折藕爱连丝故情无处所新物徒华滋不惜西津交
佩解还羞北海鴈书迟采莲歌有节采莲夜未歇正逢浩荡江上风又值徘徊江上月徘徊莲
浦夜相逢吴姬越女何丰茸共问寒江千里外征客关山路几重

临高台

临高台临高台?□絕浮埃瑶轩绮构何崔嵬鸾歌凤吹清且哀俯瞰长安道萋萋御沟草斜对
甘泉路苍苍茂陵树高台四望同佳气郁葱葱紫阁丹楼纷照耀璧房锦殿相玲珑东迷长乐
观西指未央宫赤城映朝日綠树摇春风旗亭百队开新市甲第千甍分戚里朱轮翠盖不胜
春叠榭层楹相对起复有青楼大道中绣户文牕雕绮栊锦衾昼不褰罗帏夕未空歌屏朝掩
翠粧镜晚窥红为君安宝?蛾眉罢花丛尘间狭路黯将暮云开月色明如素鸳鸯池上两两飞
凤凰楼下双双度物色正如此佳期那不顾银鞍绣轂盛繁华可怜今夜宿娼家娼家少妇不
须颦东园桃李片时春君看旧日高台处柏梁铜雀生黄尘

滕王阁

滕王高阁临江渚佩玉鸣鸾罢歌舞画栋朝飞南浦云朱帘暮卷西山雨闲云潭影日悠悠物
换星移几度秋阁中帝子今何在檻外长江空自流

江南弄

江南弄巫山连楚梦行云几相送瑶轩金谷上春时玉童仙女无见期紫雾香烟眇难托清风
明月遥相思遥相思草徒綠为聽双飞凤凰曲

落花落

落花落落纷纷漠漠綠叶青跗映丹萼与君徘徊上金阁影拂粧阶玳瑁筵香飘舞馆茱萸幙
落花飞撩乱入中帷落花春正满春人归不归落花度氛氲遶高树落花春已繁春人春不顾
绮阁青台静且闲罗袂红巾复往还盛年不再得高枝难重攀试复旦游落花里暮宿落花间
与君落花院台上起双鬟

寒夜怀友二首

北山烟雾始茫茫南津霜月正苍苍秋深客思纷无已复值征鸿中夜起

复阁重楼向浦开秋风明月度江来故人故情怀故宴相望相思不相见

六言古诗【附】

杂曲

智琼神女来访文君蛾眉始约罗裙初薰歌齐曲韵舞乱行分若向阳台荐枕何啻得胜朝云

王子安集卷二

卷三

钦定四库全书

王子安集卷三

唐王勃撰

五言律诗

铜雀妓二首

金凤邻铜雀漳河望邺城君王无处所台榭若平生舞席纷何就歌梁俨未倾西陵松檟冷谁见绮罗情妾本深宫妓层城闭九重君王欢爱尽歌舞为谁容锦衾不复襞罗衣谁再缝高台西北望流涕向青松

圣泉宴【并序】

玄武山有圣泉焉浸淫历数百千年乘岩泌涌接磴分流下瞰长江沙堤石岸咸古人遗迹也兹乃青苹绿芰紫苔苍蘚遂使江湖思远寤寐寄托既而崇峦左峨石壑前紫丹?万寻碧潭千顷松风唱响竹露薰空潇潇乎人间之难遇也方欲以林壑为天属琴樽为日用嗟乎古今代谢方深川上之悲少长同游且尽山阴之乐盍题芳什共写高情诗得泉字

披襟乘石磴列籍俯春泉兰气薰山酌松声韵野弦影飘垂叶外香度落花前兴洽林塘晚重岩起夕烟

寻道观【其观即昌利观而张天师居也】

芝?光分野蓬阙盛规模碧坛清柱闕丹洞肃松枢玉笈三山记金箱五岳图苍虬不可见【一作得】空望白云衢

散关晨度

关山凌旦开石路无尘埃白马高谈去青牛真气来重门临巨壑连栋起崇隈即今扬策度非是弃繻回

别薛华

送送多穷路遑遑独问津悲凉千里道凄断百年身心事同漂泊生涯共苦辛无论去与住俱

是梦中人

重别薛华

明月沉珠浦 秋风濯锦川 楼台临絶? 洲渚亘长天 旅泊成千里 栖遑共百年 穷途惟有泪 还望独潸然

游梵宇三觉寺

香阁披青磴 琤台控紫岑 叶齐山路狭 花积野坛深 萝幌栖禅影 松门听梵音 遽欣陪妙躅 延赏涤烦襟

麻平晚行

百年怀土望 千里倦游情 高低寻戍道 远近听泉声 磻叶才分色 山花不辨名 羁心何处尽 风急暮猿清

送卢主簿

穷途非所恨 虚室自相依 城阙居年满 琴樽俗事稀 开襟方未已 分袂忽多违 东岩富松竹 岁暮幸同归

饯韦兵曹

征骖临野次 别袂惨江垂 川霁浮烟歛 山明落照移 鹰风凋晚叶 蝉露泣【一作泫】秋枝 亭臯分远望 延想间云涯

白下驿饯唐少府

下驿穷交日 昌亭旅食年 相知何用早 怀抱即依然 浦楼低晚照 乡路隔风烟 去去如何道 长安在日边

杜少府之任蜀州

城阙辅三秦 风烟望五津 与君离别意 同是宦游人 海内存知己 天涯若比邻 无为在岐路 儿女共沾巾

仲春郊外

东园垂柳径西堰落花津物色连三月风光絶四邻鸟飞村觉曙鱼戏水知春初晴山院里何处染嚣尘

郊兴

空园歌独酌春日赋闲居泽兰侵小径河柳覆长渠雨去花光湿风归叶影疎山人不惜醉唯畏緑樽虚

郊园即事

烟霞春旦【一作早】赏松竹故年心断山疑画障悬溜写鸣琴草徧南亭合花浓【一作开】北院深闲居饶酒赋随兴欲抽簪

观佛迹寺

莲座神容俨松崖圣迹余年长金迹浅地久石文疎颓华临曲磴倾影赴前除共嗟陵谷远俄视化城虚

山居晚眺赠王道士

金坛疎俗宇玉洞侣仙羣花枝栖晚露峰叶度晴云斜照移山影回沙拥溜【一作□】文琴樽方待兴竹树已迎曛

八仙迳【寺南又有昌利观去寺可数里岩迳窈窕杖而後进】

柰园欣八正松岩访九仙援萝窥雾术攀桂俯云阡【一作烟】代北鸾骖至辽西鹤骑旋终希脱尘网连翼下芝田

春日还郊

闲情兼默语【一作默默】携杖赴岩泉草緑萦新带榆青缀古钱鱼牀侵?水鸟路入山烟还题平子赋花树满春田

对酒春园作

投簪下山阁携酒对河梁狭水牵长镜高花送断香繁鶯歌似曲疎蝶舞成行自然催一醉非但閤年光

观内怀仙

玉架残书隐金坛旧迹迷牵花寻紫洞【一作涧】步叶下清谿琼浆犹类乳石髓尚如泥自能成羽翼何必仰云梯

秋日别王长史

别路长【一作余】千里深恩重百年正悲西候日更动北梁篇野色笼寒雾山光歛暮烟终知难再奉怀德自潜然

上已浮江宴韵得遥字

上已年光促中川兴绪遥緑齐山叶满红泄?花销泉声喧後涧虹影照前桥遽悲春望远江路积波潮

长柳

晨征犯烟磴夕憩在云关晚风清近壑新月照澄湾郊童樵唱返津叟钓歌还客行无与晤赖此释愁顔

羈游饯别

客心悬陇路游子倦【一作倦】江干槿丰【一作浓】朝砌静筱密夜牕寒琴声销别恨风景驻离欢寧竟山川远悠悠旅思难

易阳早发

飭装侵晓月奔策候残星危阁寻丹嶂回梁属翠屏云间迷树影雾里失峰形复此凉飈至空山飞夜萤

焦?早行和陆四

侵星违旅館乘月戒征俦复嶂迷晴色虚岩辨暗流猿吟山漏晓萤散野风秋故人渺何际乡关云雾浮

深湾夜宿【主人依山带江】

津途临巨壑村宇架危岑堰絶滩声隐峰交树影深江童暮理楫山女夜调砧此时故乡远寧知游子心

伤裴録事丧子

兰堦霜候早松路岁【一作夜】台深魄散珠胎没芳销玉树沈露文曦宿草烟照惨平林芝
焚空叹息流恨满羸金五言排律

泥谿

弭棹凌奔壑低鞭蹶峻岐江涛出险峰磴入云危溜急船文乱岩斜骑影移水烟笼翠渚山照
落丹崖风生苹浦叶露泫【一作泣】竹潭枝泛水虽云美劳歌谁复知

秋日仙游观赠道士【一作骆宾王诗无首四句】

石图分帝宇银牒洞灵宫回丹紫岫室复翠上岩栊雾浓金竈静云暗玉坛空野花常捧露山
叶自吟风林泉明月在诗酒故人同待余逢石髓从尔命飞鸿

出境游山二首

源水终无路山阿若有人驱羊先动石走兔欲投巾洞晚秋泉冷岩朝古树新峰斜连鸟翅磴
叠上鱼鳞化鹤千龄早元龟六代春浮云今可驾沧海自成尘

振翩凌霜吹正月伫天浔为镳凌翠壑飞轸控青岑岩深灵竈没涧毁石渠沈宫阙云间近江
山物外临玉坛栖暮夜珠洞结秋阴萧萧离俗影扰扰望乡心谁意山游好屡伤人事侵

三月曲水宴

彭泽官初去河阳赋始传田园归旧国诗酒间长筵列室窥丹洞分楼瞰紫烟萦回亘津渡出
没控郊鄮凤琴调上客龙轡俨羣仙松石偏宜古藤萝不记年重檐交密树复磴拥危泉抗石
曦南岭乘沙眇北川傅岩来筑处磻溪入钓前日斜真趣远幽思梦凉蝉

卢照隣和得樽字附

风烟彭泽里山水仲长园繇来弃铜墨本自重琴樽高情邈不嗣雅道今复存有美光时彦养
德坐山樊门开芳杜径室距桃花源公子黄金勒仙人紫气轩长怀去城市高咏狎兰荪连沙
飞白鹭孤屿啸玄猿日影岩前落云花江上翻兴阑车马散林塘夕鸟喧五言絶句

晚届凤州

宝鷄辞旧域仙凤历遗墟去此近城阙青山明月初

羈春

客心千里倦春事一朝归还伤北园里重见落花飞

林塘怀友

芳屏画春草仙杼织朝霞何如山水路对面即飞花

山扉夜坐

抱琴开野室携酒对情人林塘花月下别是一家春

春庄

山中兰叶径城外李桃园直知人事静不觉鸟声喧

春游

客念纷无极春泪倍成行今朝花树下不觉恋年光

春园

山泉两处晚花柳一园春还持千日醉共作百年人

林泉独饮

邱壑经涂赏花柳遇时春相逢今不醉物色自轻人

登城春望

物外山川近晴初景霭新芳郊花柳徧何处不宜春

他乡叙兴

缀叶归烟晚乘花落照春边城琴酒处俱是越乡人

夜兴

野烟含夕渚山月照秋林还将中散兴来偶步兵琴

临江二首

泛泛东流水飞飞北上尘归骖将别棹俱是倦游人去骖嘶别路归棹隐寒洲江皋木叶下应想故城秋

江亭夜月送别二首

江送巴南水山横塞北云津亭秋月夜谁见泣离羣乱烟笼碧砌飞月向南端寂寂离亭掩江山此夜寒

别人四首

久客逢余闰他乡别故人自然堪下泪谁忍望征尘江上风烟积山幽云雾多送君南浦外还望将如何桂轺初不驻兰筵幸未开林塘风月赏应待故人来霜华净天末雾色笼江际客子常畏人何为久留滞

赠李十四四首

野客思茅宇山人爱竹林琴樽唯待处风月自相寻小径偏宜草空庭不厌花平生诗与酒自得会仙家乱竹开三径飞花满四邻从来扬子宅别有尚玄人风筵调桂轸月径引藤杯直当花院里书斋望晓开

早春野望

江旷春潮白山长晓岫青他乡临眺【一作睨】极花柳映边亭

山中

长江悲已滞万里念将归况属高风晚山山黄叶飞

冬郊行望

桂密岩花白梨疎林叶红江皋寒望尽归念断征蓬

寒夜思友三首

久别侵怀抱他乡变容色月下调鸣琴相思此何极云间征思断月下归愁切鸿鴈西南飞如何故人别朝朝翠山下夜夜沧江曲复此遥相思清尊湛芳绿

始平晚息

观阙长安近江山蜀道賒客行朝复夕无处是乡家

扶风昼屈离京浸远

帝里金茎去扶风石柱来山川殊未已行路方悠哉

普安建陰题壁

江汉深无极梁岷不可攀山川云雾里游子几时还

九日

九日重阳节开门有菊花不知来送酒若个是陶家七言絕句

秋江送别二首

早是他乡值早秋江亭明月带江流已觉逝川伤别念复看津树隐离舟

归舟归骑俨成行江南江北互相望谁谓波澜才一水已觉山川是两乡

蜀中九日登玄武山旅眺【纪事云武山在东蜀勃以檄鸡文斥出沛王府既废客剑南王有游玄武山诗】

九月九日望乡台他席他乡送客杯人今【一作情】已厌南中苦鸿鴈那从北地来

卢照邻九月九日玄武山旅眺附

九月九日眺山川归心归望积风烟他乡共酌金花酒万里同悲鸿鴈天

邵大震九月九日登玄武山旅眺附

九月九日望遥空秋水秋天生夕风寒鴈一向南飞远游人几度菊花丛

河阳桥代窈郎中佳人答杨中舍

披风聽鸟长河路临津织女遥相妬判知秋夕带啼还那及春朝携手度

王子安集卷三

卷四

<集部,别集类,汉至五代,王子安集>

钦定四库全书

王子安集卷四

唐王勃撰

序

续书序

序曰书以记言其来尚矣越在三代左史职之百官以理万人以察扬于王庭用实大焉苟非可以燮理情性平章邦国敷彝伦而叙要道察时变而经王猷树皇极之纲维资生灵之视聽皆可略也昔者仲尼之述书也将以究事业之通而正性命之理故曰吾欲托之空言不如附之行事道德仁义於是乎明刑政礼乐於是乎出非先王之德行不敢传非先王之法言不敢道纪千数百岁断自唐虞迄于周汉风流所存百篇而已以此见圣人言约理举神明不劳而体时务之撰矣故能法象天地同符易简借前箸於筌蹄驱後主於轨物密而显宏而奥久而弥新用而不竭非古之聪明圣智玄覽博達孰能为此哉孔安国曰帝王之制坦然明白可举而行嗟乎其言甚大可使南面称圣人之後矣自时以降史述陵迟人自为家标指失中陈事乱而无当制理参而不一繇是大典散而人文乖是非繁而取舍谬与夫古先哲人制述之意不其疎乎我先君文中子实秉懿生於隋末觀後作之违方忧异端之害正乃喟然曰宣尼既没文不在兹乎遂约大义删旧章续书为三百六十篇考伪乱而修元经正礼乐以旌後王之失述易讚以申先师之旨经始汉魏迄于有晋择其典物宜於教者续书为百二十篇而广大悉备嗟乎贤圣之述岂多为哉噫亦足垂训作则冒天下之道如斯而已矣当时门人百千数董薛之徒竝受其义遭代丧乱未行于时历年永久稍见残缺贞观中大原府君考诸六经之目则亡其小序其有録而无篇者又十六焉呜呼兹不可复见矣家君钦若丕烈图终休绪乃例六经次礼乐叙中说明易讚永惟保守前训大克敷遗後人勃兄弟五六冠者童子六七只只怡怡讲问伏渐之日久矣躬奉成训家传异闻犹恐不得门而入才之不逮至远也是用厉精激愤宵吟昼咏庶几乎学而知之者其修身慎行恐辱先也岂声禄是徇前人之不继是惧间者承命为百二十篇作序而兼当补修其阙爰考衆籍共参奥旨泉源浩然罔识攸济呜呼小子何敢以当之也其尽心力乎始自总章二年泊乎咸亨五年刊写文就定成百二十篇勒成二十五卷昔者文中子曰汉魏之礼乐未足称其书不可废也尚有近古之对议存焉制诏册则几乎典诰矣後之達晤者将有得於斯文乎于时龙集闾茂勉踵前修在大唐御天下之五十七祀也

黄帝八十一难经序

黄帝八十一难经是医经之秘录也昔者岐伯以授黄帝黄帝历九师以授伊尹伊尹以授汤汤历六师以授太公太公授文王文王历九师以授医和医和历六师以授秦越人秦越人始定立章句历九师以授华陀华陀历六师以授黄公黄公以授曹夫子曹夫子讳元字真道自云京兆人也盖授黄公之术洞明医道至能遥望气色彻视腑脏洗肠剖胸之术往往行焉浮沉人间莫有知者勃养於慈父之手每承过庭之训曰人子不知医古人以为不孝因窃求良师陰访其道以大唐龙朔元年岁次庚申冬至後甲子予遇夫子於长安抚勃曰无欲也勃再拜稽首遂归心焉虽父伯兄弟不能知也盖授周易章句及黄帝素问难经乃知三才六甲之事明堂玉匮之数十五月而毕将别谓勃曰陰阳之道不可妄宣也针石之道不可妄传也无猖狂以自彰当陰沉以自溪也勃受命伏习五年于兹矣有升堂觀奥之心焉近复鑽仰太虚导引元气觉滓秽都絕精明相保方欲坐守神仙弃置流俗噫苍生可以救耶斯文可以存耶昔太上有立德其次有立功其次有立言非以徇名也将以济人也谨录师训编附圣经庶将来君子有以得其用心也

四分律宗记序

昔在调御利见迦维光宅淨都抚临法界抑扬垢路之业以疆理情田阐导毗尼之藏以堤防性海二边云彻方知宝相之尊十刹风行乃识真如之贵将使龙象缁服维明克允鷺鷥玄明有耻且格五篇垂范岂同训夏之科七聚分宗寧比歌虞之制功存离欲道在降魔仙苑创基因善果以调物提河灭迹凭淨戒以为师诚拯溺之舟航而御黠之衞策者矣故能庄严百福彩绘三身摧憍慢山拔生死树覆篲菩萨之道滥觞正觉之源除惑箭而断爱枝销慧刀而解疑网自银棺掩耀金杖殊珍五师烟腾四分云霏波离?旨明而更明饮光妙迹盛而愈盛其後卑摩覃思犹沉赤水之辉惠远研精尚玷玄岩之彩遂使琼编浩汗利涉迷於要津瑶轴纷纶登高暗於飞陞熟习者博而寡用志学者劳而少功七衆所以迟回八部繇其太息不应冥发?感潜融爰挺异才式扶象训有西京太原寺索律师俗姓范氏其先南阳人也殷霸洪胤周藩茂族八鸾与四牡竞驰紫绘与青蜗叠照六军卿胄绩着於鍾彝三传儒门业流於训诂律师冲?霞映峻局霜凄筠抱显於髫龄兰芬凝於卯齿繇是糠粃礼乐锱铢名教以尧舜为尘劳以周孔为桎梏爰依白法遂托玄徒探鷺岭之微言得龙宫之秘藏咸亨之祀椒房諒陰舍槐里而构竹园因金穴而开银地伽蓝肇建号曰太原明阳所及咸收时望自价隆康会誉重摩腾竺法猷之苦节支道林之远致将何以发明禅宇光应纶言律师乃以道衆羽仪释门栋干粤自弘济来游太原经行德人於斯为盛既而惧六和之紊绪悼三聚之乖宗稽法令之遗文讨惠猷之旧业网罗近护吞含觉明原始要终探蹟索隐芟夷疣贅剪截骈枝收絶代之精微诂往圣之纰繆葭灰屡变槐燧骤迁开遮持犯之异同废立止作之轻重故以该象牙之扇穷贝叶之图鑽研刊削五载而就名曰开四分律宗记凡十卷三十七万六千三百三十言律师又以仲尼述易申妙典於系辞元凯谈经托余文於释例爰因多暇更辑旧章牢笼秘密之宗发挥沉郁之旨名曰开四分律宗拾遗钞凡十卷四十万余言所以裨助三明抑扬四谤弘八正之道成一家之言庶使衆善雷奔羣疑雾歛照欢戚之两镜荡欣忧之二瓶凭此戒田方躋定境岂直功周沙甸道制铁围而已哉弟子才非玄度识劣真长本乏凌云之词虚荷弥天之眷揄扬盛烈顾孙綽而多慚归依胜侣仰郗愔而自勗辄牵庸陋轻序德音岂比夫公理昌言资繆实之引太冲作赋假士安之谈盖所谓观博而识班闻乐而窃拚者矣故曰四分律宗记序

入蜀纪行诗序

总章二年五月癸卯余自常安观景物于蜀遂出褒斜之隘道抵岷峨之绝径超玄谿历翠阜迨弥月而臻焉若乃采江山之俊势观天地之奇作丹壑争流青峰杂起陵涛鼓怒以伏注天壁嵯峨而横立亦宇宙之绝观者也虽庄周詫吕梁之险韩侯怯孟门之峻曾何足云盖登培塿者起衡霍之心游涓淪者发江湖之思况乎穷览胜事足践灵区烟霞为朝夕之资风月得林泉之助嗟乎山川之感召多矣余能无情哉爰成文律用宣行唱编为三十首投诸好事焉

三月上巳祓禊序

观夫天下四方以宇宙为城池人生百年用林泉为窟宅虽朝野殊致出处异途莫不拥冠盖於烟霞披薜萝於山水况乎山陰旧地王逸之池亭永兴新交许玄度之风月琴台寥落犹停隐遯之宾酿渚荒凉尚遏逢迎之客仙舟浴?若海上之槎来羽盖参差似辽东之鹤举或昂骐驎或泛飞鳧俱安名利之场各得逍遥之地而上属无为之道下栖玄邈之风永淳二年暮春三月迟迟风景出没媚於郊原片片仙云远近生於林薄杂花争发非止桃蹊羣鸟乱飞有踰鸛谷王孙春草处处争鲜仲阮芳园家家竝翠於是?旨酒列芳筵先祓禊於长洲却申交於促席良谈吐玉长江与斜汉争流清歌遶梁白云将红尘竝落他乡易感增凄怆於兹辰羈客何情更欢娱於此日加以今之视昔已非昔日之欢後之视今亦是今时之会人之情也能不悲乎且题姓字以表?怀使夫会稽竹箭则推我於东南崑阜琳琅亦归予於西北

守岁序

岁月易尽光陰难驻春秋冬夏错四序之凉炎甲乙丙丁纪三朝之气数十二月之陰气玉律穷年一万岁之休祲金觴献寿賁鼓雷动烟火星流侏子黄童统鈎陈而驱赤疫诸王等集陈玉帛而朝诸侯京兆天中竦楼台而彻汉长安路上乱车马而飞尘王丞相之登临行将在目戴侍中之重席忽尔明朝槐火灭而寒气消芦灰用而春风起鱼鳞布叶烂五色而翻光凤脑吐花灿百枝而引照悲夫年华将晚志事寥落公孙弘之甲第天子未知王仲宣之文章公卿不识对他乡之风景忆故里之琴歌栢叶为铭影泛新年之酒椒花入颂先开献岁之词作者七人同为六韵

山亭兴序

仁者乐山智者乐水深山大泽龙蛇为得性之场广汉巨川珠贝是有殊之地岂徒茂林修竹王右军山陰之兰亭流水长堤石季伦河阳之梓泽下官天性任真直言淳朴拙容陋质眇少之丈夫蹇步穷途坎 之君子文史足用不读非道之书气调不羈未被可人之目潁川人物有荀家兄弟之风汉代英奇守陈氏门宗之德乐天知命一十九年负笈从师二千余里有弘农公者日下无双风流第一仁崖智宇照临明日月之辉广度冲?磊落压乾坤之气王夷甫之瑶林琼树直出风尘嵇叔夜之龙章凤姿混同人野雄谈逸辩吐满腹之精神達学奇才抱填胸之文籍簪裾见屈轻脱履於西阳山水来游重横琴於南涧百年奇表开壮志於高明千里

心期得神交於下走山人对兴即是桃花之源隐士相逢不异菖蒲之涧黄精野饌赤石神脂玉案金盘徵石髓於蛟龙之窟山樽野酌求玉液於蓬莱之峰溪横燕尾岩豎龙头鍛野老之真珠挂幽人之明镜山腰半折溜王烈之香膏洞口横开滴严遵之芳乳藤牵赤架南方之物产可知粉渍青田外域之謡风在即人高调远地爽气清抱玉策而登高出琼林而更远汉家二百所之都鄙宫殿平看秦氏四十郡之封畿山河坐见班孟坚骋两京雄笔以为天地之奥区张平子奋一代宏才以为帝王之神丽珠城隐隐闌干象北斗之宫清渭澄澄滉漾即天河之水长松茂栢鑽宇宙而顿风云大壑横溪吐江河而悬日月凤凰神岳起烟雾而当轩鸚鵡春泉杂风花而满谷望平原?藜薄山情放旷即沧浪之水清野气萧条即崆峒之人智摇头坐唱顿足起舞风尘洒落直上天池九万里丘墟雄壮傍吞少华五千仞裁二仪为輿盖倚八荒为户牖荣者吾不知其荣美者吾不知其美下官以词锋直上振笔札而前驱高明以翰苑横开列文章於後殿情兴未已即令樽中酒空彩笔未穷须使山中兔尽

山亭思友人序

高兴之後中宵起观举目四望风寒月清邻人张氏有山亭焉洞壑横分奇峰直上郁然有造化之功矣嗟乎大丈夫荷帝王之雨露对清平之日月文章可以经纬天地器局可以畜泄江河七星可以气冲八风可以调合独行万里觉天地之崆峒高枕百年见生灵之齷齪虽俗人不识下士徒轻顾视天下亦可以蔽寰中之一半矣惜乎此山有月此地无人清风入琴黄云对酒虽形骸真性得礼乐於身中而宇宙神交卷烟霞於物表至若开辟翰苑扫荡文場得宫商之正律受山川之杰气虽陆平原曹子建足可以车载斗量谢灵运潘安仁足可以膝行肘步思飞情逸风云坐宅於笔端兴洽神清日月自安於调下云尔

王子安集卷四

卷五

钦定四库全书

王子安集卷五

唐王勃撰

序

滕王阁诗序

南昌故郡洪都新府星分翼轸地接衡庐?三江而带五湖控蛮荆而引瓠越物华天宝龙光射牛斗之墟人杰地灵徐孺下陈蕃之榻雄州雾列俊彩星驰台隍枕夷夏之交宾主尽东南之美都督阎公之雅望棨戟遥临宇文新州之懿范?帷暂驻十旬休暇胜友如云千里逢迎高朋满座腾蛟起凤孟学士之词宗紫电清霜王将军之武库家君作宰路出名区童子何知躬逢胜饯时维九月序属三秋?水尽而寒潭清烟光凝而暮山紫俨骖騑於上路访风景於崇阿临帝子之长洲得仙人之旧馆层峦耸翠上出重霄飞阁流丹下临无地鹤汀鳬渚穷岛屿之萦回桂殿兰宫列冈峦之体势披绣闼俯雕甍山原旷其盈视川泽盱其骇瞩闾阎扑地钟鸣鼎食之家舳舻弥津青雀黄龙之轴虹销雨霁彩彻区明落霞与孤鹜齐飞秋水共长天一色渔舟唱晚响穷彭蠡之滨鴈阵惊寒声断衡阳之浦遥襟俯畅逸兴遄飞爽籁发而清风生纖歌凝而白云遏睢园緑竹气凌彭泽之樽邺水朱华光照临川之笔四美具二难并穷睇眄於中天极娱游於暇日天高地迥觉宇宙之无穷兴尽悲来识盈虚之有数望长安於日下指吴会云间地势极而南溟深天柱高而北辰远关山难越谁悲失路之人萍水相逢尽是他乡之客怀帝阍而不见奉宣室以何年嗟乎时运不齐命途多舛冯唐易老李广难封屈贾谊於长沙非无圣主窜梁鸿於海曲岂乏明时所赖君子安贫達人知命老当益壮寧移白首之心穷且益坚不坠青云之志酌贪泉而觉爽处涸辙以犹欢北海虽賒扶揺可接东隅已逝桑榆非晚孟尝高洁空余报国之情阮籍猖狂岂效穷途之哭勃三尺微命一介书生无路请缨等终军之弱冠有怀投笔慕宗慤之长风舍簪笏於百龄奉晨昏於万里非谢家之宝树接孟氏之芳邻他日趋庭叨陪鲤对今晨捧袂喜托龙门杨意不逢抚凌云而自惜鍾期既遇奏流水以何惭呜呼胜地不常盛筵难再兰亭已矣梓泽丘墟临别赠言幸承恩於伟饯登高作赋是所望於羣公敢竭鄙诚恭疏短引一言均赋四韵俱成请洒潘江各倾陆海云尔

游山庙序

吾之有生二十载矣雅厌城阙酷嗜江海常学仙经博涉道记知轩冕可以理隔鸾凤可以术待而事亲多衣食之虞登朝有声利之迫清识滞於烦城仙骨摧於俗境呜呼阮籍意疎嵇康体放有自来矣常恐运促风火身非金石遂令林壑交丧烟霞板荡此仆所以怀泉涂而惴恐临山河而叹息者也粤以胜友良暇相与游於玄武西山庙盖蜀郡三灵峰也山东有道君庙

古者相传以名焉尔其丹壑藂倚玄崕纠合俯临万仞平视重玄乘杳冥之絕境属芬华之暮节玉房跨霄而悬居琼台出云而高峙亦有野兽羣狎山鷖互唼崇松埵巨栢争陰积瀨与幽湍合响眇眇焉迢迢焉王孙何以不归羽人何以长往其玄都紫微之事耶方歛手钟鼎息肩岩石絕視聽於寰中置形骸於度外不其然乎时预乎斯者济陰鹿宏胤安阳邵令远耳盍诗以言志不以韵数裁焉

梓潼江南泛舟序

咸亨二年六月癸巳梓潼县令韦君以清湛幽凝镇流靖俗境内无事?舟於江潭纵观於丘壑渺然有山林陂泽之思遂长怀悠想周覽极睇思其人则吕望藉茅於磻溪之陰屈平制芰於涔阳之浦觉瀛洲方丈森然在目於是间以投壶酬以妙论亦有嘉肴旨酒鸣弦朗笛以补寻幽之致焉预於斯者若干人尔

上巳浮江宴序

吾之生也有极时之过也多绪若夫遭主后之明圣属天地之贞观得畎畝之相保以农桑为业而托形宇宙者幸矣况乃偃泊山水遨游风月樽酒於其外文墨於其间则造化之於我得矣太平之纵我多矣兹以上巳芳节云开胜地大江浩旷羣山纷纠出重城而振策下长浦而方舟林壑清其顾盼风云荡其怀抱于时序躔青律运启朱明轻萸秀而郊戍青落花尽而亭臯晚丹鷖紫蝶候芳晷而腾姿早鷺归鸿俟迅风而弄影岩暄蕙密野淑兰滋弱荷抽紫疎萍泛緑于是俨松齡於石?停桂楫於璇潭指林岸而长怀出河洲而极睇妍妆絃服香惊北渚之风翠幙玄帷彩缀南津之雾若乃寻曲渚历回溪榜讴齐引渔歌互起飞沙濺石湍流百势翠嶮丹崕冈峦万色亦有银鈎犯浪挂頰翼於文竿琼舸乘波耀锦鳞於画网鍾期在听玄云白雪之琴阮籍同归紫桂苍梧之醴既而游盘兴远景促时淹野日照晴山烟送晚方披?朗咏饒斜光於碧岫之前散髮高吟对明月於青溪之下客怀既畅游思遄征视泉石而如归伫云霞而有自昔周川故事初传曲路之悲江甸名流始命山陰之笔盍遵清辙共抒幽?俾後之视今亦犹今之视昔一言均赋六韵齐疏谁知後來者难辄以先成为次

绵州北亭羣公宴序

下官人间独傲海内少徒志不屈於王侯身不絕於尘俗孤吟五岳长啸三山昔往东吴已有梁鸿之志今来西蜀非无张载之怀况乎踐名場?胜友风月无几琴酒俄乖半面十年一别千里何少府故人攀桂抚金石而论心韩法曹新识班荆临江湖而执手离亭北望烟霞生故国之悲别館南开风雨积他乡之思于时苍云寡色白日无光沙尘起而桂浦昏鳬鴈下而芦洲晚傍隣苍野霜封橘柚之园斜枕碧潭鴈断芙蓉之水既而登临惜别驂驾少留季札何人亲逢贈縞子荆不敏思挂倾城惆悵北梁揖琴台而渐间徘徊东道思锦署以行遥嗟乎人事乖矣江山远矣请命离前之笔为题别後之资五际飞文想羣公之不让一言留贈知下笔之有神

夏日登龙门楼寓望序

夫益者三友则道术可存同心三人则金兰可浴况乎诗书旧好披乐广之高天乡党新知扫顔回之陋巷寻胜地叙清芜脱野客之荷衣入幽人之桂坐榴花浮酌对文举而无忧葛蔓调弦抚鍾期而有遇既而南方夏晚北牖晴开中园之弱柳含烟旷野之陰云蔽日低虹饮水向溪谷而全斜戏鸟凌空狎林亭而半度兴含情逸共敦行役之期擗管含毫独对当仁之序

夏日登韩城门楼寓望序

下官狂走不调东西南北之人也流离岁月羈旅山川辍仙驾於殊乡遇良朋於异县面胜地陟危楼放旷怀抱驱驰耳目韩原奥壤昔时开战鬪之場秦塞雄都今日列山河之郡池台左右觉风云之助人林麓周回观岩泉之入兴则有惊花乱下戏鸟平飞荷叶滋而晓雾繁竹院静而炎氛息赏欢文酒思挽云霄人赋一言庶旌六韵云尔

秋日游莲池序

人间齷齪抱风云者几人庶俗纷纭得英奇者何有烟霞召我相望道术之门文酒起予放浪沉潜之地少留逸客塞鴈飞鸣北斗横而天地秋西金用而风露降幽居少事野性多闲登石岸而铺筵坐沙場而列席琳琅触目朗月清风之後人珠玉在傍鸾凤虬龙之君子汀洲地远波涛溅日月之辉人野路殊原隰拥神仙之气平郊树直曲浦莲肥隐士泥清仙人水緑越林亭而极望生死都捐出宇宙以长怀心灵若丧悲夫秋者愁也酌浊酒以荡幽?志之所之用清文而销积恨我之怀矣能无情乎

越州秋日宴山亭序

昔王子敬琅琊之名士常怀习氏之园阮嗣宗陈留之俊人直至山阳之坐岂非琴樽远契必兆朕於佳辰风月高情每留连於胜地是以东山可望林泉生谢客之文南国多才江山助屈平之气况乎扬子云之故地岩壑依然宓子贱之芳猷弦歌在属红兰翠菊俯映砂亭黛栢苍松深环玉砌参差夕树烟侵橘柚之园的历秋荷月照芙蓉之水既而星回汉转露下风高银烛摘花瑶觴抒兴一时仙驭方?摈俗之怀五际飞文时动缘情之作人分一字四韵成篇

秋日宴洛阳序

夫以东京胜地南吕高秋三涂镇而九派分白露下而清风肃或出或处人多朝野之欢以嬉以游时极登临之所征衣流寓切下走之蓬?解榻邀期属上宾之桂席於是齐道实款琴樽偁论心留连促膝但有潘杨之密戚得无管鲍之深知簪组盛而车马喧庭宇虚而管弦亮近临铜陌斜控银墟菊照新花泛轻香於远次荷凋晚叶翻翠影於长波听矚方穷猷酬逾洽年忘小大傲天地於平生志混荣枯得林泉之意气愿长绳以系日几近光陰思短札以凌云或陈歌咏人采古韵成者先呈

王子安集卷五

卷六

钦定四库全书

王子安集卷六

唐王勃撰

序

晚秋游武担山寺序

若夫虎邱仙镇吴王殉歿之墟彌峽崇基秦帝升遐之宅虽珠衣玉匣下賁穷泉而广岫长林终成胜境亦有霍将军之大隧回写祁连樛里子之孤坟竟开长乐岂如武担灵岳开明故地蜀夫人之葬迹任文公之死所冈峦隐隐化为闍崛之峰松柏苍苍即入祇园之树引星垣於沓嶂下布金沙栖日观於长崕傍临石镜瑶台玉甃尚控霞宫宝刹香坛犹芬仙阙琬琰接映台凝梦渚之云壁题相辉殿写长门之月美人虹影下缀虬幡少女风吟遥喧凤铎羣公以玉律丰暇僭林壑而延情锦署多闲想岩泉而结兴於是披桂幌历松扉梵筵霞属禅扃烟敞鷄林俊赏萧萧鸞岭之居鹿苑高谈亶亶龙宫之偈于时金方启序玉律惊秋朔风四面寒云千里层轩回雾齐万物於三休绮席垂云穷九垓於一息碧鷄灵宇山川极望石兕长江汀洲在目龙鑣翠辇骈闐上路之游列榭崇闈磊落名都之气渺渺焉洋洋焉信三蜀之奇观也昔者升高能赋胜事仍存登岳长謡清标未远敢攀盛烈下揆幽?庶旌西土之游远嗣东平之唱云尔

宇文德阳宅秋夜山亭宴序

若夫龙津宴喜地切登仙凤阁玄虚门称好事亦有登山临水长想巨源清风明月每思玄度未有能星驰一介留美迹於芳亭云委八行抒劳思於彩笔遂令启瑶緘者攀胜集而长怀披琼翰者仰高筵而不暇王子猷之触兴不觉浮舟嵇叔夜之相知欣然命驾琴樽佳赏始诣临邛口腹良游未辞安邑乃知两乡投分林泉可攘袂而游千里同心烟霞可传?而定友人河南宇文峽清虚君子中山郎余令风流名士或三秋意契辟林院而开?或一面新交叙风云而倒屣彭泽陶潛之菊影泛仙樽河阳潘岳之花光县妙理严严思壁家藏虹岫之珍森森言河各控彌泉之宝偶同金碧翬照词塲巴汉英灵潛光翰院亶亶焉萧萧焉信天下之奇托也于时白藏开序青女御律金风高而林野动玉露下而江山静琴亭酒榭磊落乘烟竹径松扉参差向月鱼鳞积磴还昇兰桂之峰鸳翼分桥即映芙蓉之水亦有红苹綠苕亘渚连翘玉带瑶花分檻间植池帘夕敞香牵十步之风岫幌宵褰气袭三危之露纵冲?於俗表留逸契於人间山东之赏在焉南涧之情不远夫以中牟驯雉犹婴触网之悲单父歌鱼罕继鸣琴之趣俾夫一同诗酒不挠於牵?千载岩溪无慚於景躅云尔

游冀州韩家园序

铜沟水北石鼓山东星辰当毕昴之墟风俗是唐虞之国虽接燕分晋称天子之旧都而向街当衢有高人之甲第祥风塞户瑞气冲庭芳酒满而绿水春朗月闲而素琴荐家童扫地萧条仲举之园长者盈门廓落东平之室梧桐生雾杨柳摇风眺望而林泉有余奔走而烟霞足用神龙起伏俱调鼎鑊之滋鸣凤雌雄竝入笙竽之奏高情壮思有抑扬天地之心雄笔奇才有鼓怒风云之气南庭兴晚东径陰生石髓拆而隐士归玉山崩而野人醉金为文在我卜翰苑当仁王羲之之兰亭五百余年直至今人之赏石季伦之梓泽二十四友始得吾徒之游陶陶然落落然则大唐调露之元年献岁正月也

夏日宴张二林亭序

张二官松驾乘闲桂筵追赏引簪裾之胜侣狎丘壑之神交辨纵於解颐道深於喻指香杯浊醴是河朔之平生雄笔清词得高阳之意气林亭旷望季伦调妓之园泉石周游子晋登仙之浦舟浮叶影簪积花文黄雀度而鸢惊丹鸟倾而日晚出处之情一致筌蹄之义两忘沈辂留骧眺乘羊於卫玉挥毫可作明掷地於孙金共题横吹之篇用记兹辰之乐人采一字四韵成篇

夏日宴宋五官宅观画障序

宋五官芝庭袭誉盛文史於三冬桂幄凝懽照绮罗於九夏樽浮绿蚁每披仙雾之文障列青牛更写行云之熊尔其龙编绣质鸯锦分花隐映楼台比牕帘之在旦参差花叶若桃李之恒春楚媛调弦韩娥对酒虹桥度幔鹄镜临粧佩引琅玕讎动怀风之韵鞍回玳瑁唯奔逐日之姿鱼鸟狎而相亲泉石纷而在翫宋家斯近虽别谢於登垣秦氏未遥自堪留於驻马惊鸿擅美丹青贵近质之奇吐凤标华宫徵得缘情之趣递扬笔妙式畅辞端

秋日宴季处士宅序

若人争名於朝廷者则冠盖相趋遯迹於丘园者则林泉见托虽语默非一物我不同而逍遥皆得性之場动息匪自然之地故有季处士者远辞濠上来游镜中披白云以开筵俯青溪而命酌昔时西北则我地之琳琅今日东南乃他乡之竹箭又此夜乘槎之客犹对仙家坐菊之宾尚临清赏既而依稀旧识欢吴郑之班荆乐莫新交申孔程之倾盖向时朱夏俄涉素秋金风生而景物清白露下而光陰晚庭前柳叶才听蝉鸣野外芦花行看鸥上数人之内几度琴樽百年之中少时风月兰亭有昔时之会竹林无今日之欢丈夫不纵志於生平何屈节於名利人之情矣岂曰不然人赋一言各申其志使夫千载之下四海之中後之视今知我咏怀抱於兹日

春日孙学宅宴序

若夫怀放旷寥廓之心非江山不能宣其气负郁快不平之思非琴酒不能泄其情则林泉为进退之場樽罍是言谈之地白衣送酒青阳在节鳬鴈乱而江湖春梅柳开而庭院晚楚屈平之瞻望放於何之王仲宣之登临魂兮往矣侠客时有且倾鸚鵡之杯文人代兴聊举麒麟之笔人采一字四韵成篇

与员四等宴序

自嵇阮寂寥尹班超忽高筵不嗣中霄谁赏古今惜芳辰者停鹤軫于风衢怀幽契者伫鸾觴於月径已矣哉林壑遂丧烟霞少对良会不恒神交复几请沃非常之思但宣絕代之游托同志於百齡求知已於千載道之存矣无乃然乎人赋一言俱裁四韵

夏日诸公见寻访诗序

天地不仁造化无力授仆以幽忧孤愤之性稟仆以耿介不平之气顿忘山岳坎坷於唐尧之朝傲想烟霞顛顚於圣明之代情可知矣赖乎神交胜友得山泽之虬龙隱路幽居降云霄之鸾凤杨公沈公行之者仁义礼智用之者乾元亨利玄经苦而白凤翔素牒开而紫鳞降金门待诏谒天子於朝廷石室寻真访下走於丘壑幽人待士非无北壁之书隱士迎宾自有西山之饌席门蓬巷仁高士之来游丛桂幽兰喜王孙之相对山南花囿涧北松林黄雀至而清风生白鹤飞而苍云起停琴绿水仲长统之欢娛置酒青山郭子期之宾客人探一字四韵成篇

仲氏宅宴序

仆不幸在流俗而嗜烟霞恨林泉不比德而嵇阮不同时处良辰而郁快仰高风而杼轴者多矣岂夫司马卿之车骑上客盈门仲长统之园林羣英在席坐卧南郭萧条东野江波浩旷晴山纷积嘉鴛鸾之接翼曜江汉之多才顾斜景而危心瞻火云而变色思传胜饌敢振文锋盖同席者高人薛曜等耳盍各赋诗放怀叙志俾山川获伸於知己烟霞受制於吾徒也

江寧吳少府宅餞宴序

蔣山南望长江北流五胥用而三吳盛孙权困而九州裂遺墟旧壤数万里之皇城虎踞龙盘三百年之帝国阙连石塞地实金陵霸气尽而江山空皇風清而市朝改昔时地險尝为建业之雄都今日太平即是江寧之小邑吳生俊案輔佐烹鮮我輩良游方馳去鷁梁伯鸞之远逝自有长謠閔仲叔之遐征仍逢厚礼临别浦枕离亭阵云四面洪涛千里帘帷後辟竹树映而秋烟生栋宇前临波潮惊而祥風动嗣宗高嘯绿軫方调文举清谈芳樽自滿想衣冠於旧国便值三秋忆风景於新亭俄伤万古情穷兴洽乐极悲来怆零雨於中轩动流波於下席嗟乎九江为别帝里隔於云端五岭方踰交州在於天际方严去舳且对穷途玉露下而苍山空他乡悲而故人别请开文囿共泻词源人赋一言俱題四韵

还冀州别洛下知己序

东西南北丘也何从寒暑陰阳时哉不与河阳古树无复残花合浦寒烟空惊坠叶王生卖药入天子之中都夏统乘舟属羣公之大会风烟匝地车马如龙钟鼓沸天美人似玉芳筵交映旁徵豹象之胎华饌重开直报蛟龙之髓季鷹之思吴命驾果为秋风伯鸾之适越登山以求淶水辞故友谢时人登鄂坂而迂回入邛山而北走何年风月三山沧海之春何处风花一曲青溪之路宾鸿逐暖孤飞万里之中仙鹤随云直去千年之後悲夫光陰难再子卿殷勤於少卿风景不殊赵北相望於洛北鸳鸯雅什俱为赠别之资鸚鵡奇杯共尽忘忧之酒

春夜桑泉别王少府序

下官以穷途万里动脂辖以长驱王公以倾餞百壶别芳筵而促兴是以青阳半序明月中宵离亭拥花草之芳别館积琴歌之思去留欢尽动息悲来惜投分之几何恨知音之忽间他乡握手自伤关塞之春异县分?竟切凄怆之路既而星河渐落烟雾仍开高林静而霜鸟飞长路晓而征骖动含情不拜空伫听於南昌挥涕无言请投文於西候因探一字四韵成篇

王子安集卷六

卷七

钦定四库全书

王子安集卷七

唐王勃撰

序

秋日楚州郝司户宅饯崔使君序

上元二载高旻八月人多汴北地实淮南海气近而苍山陰天光秋而白云晚川涂所亘郢路极於崤潼风壤所交荆門泊於吴越凭胜地列雄州城池当要害之冲寮采尽鵷鸾之选昌亭旅食悲下走之穷愁山曲淹留属羣公之宴喜披鹤雾陟龙门故人握手新知满目饮崔公之盛德果遇攀轮慕郝氏之高风还逢解榻接衣簪於座右驻旌檠於城隅临风云而解带眄江山以挥涕岩檻左峙俯映玄潭野迳斜开傍连翠渚青苹布叶乱荷芰而动秋风朱草垂荣杂芝兰而涵晚液?仙舟於石岸荐绮席於沙場宾友盛而芳罇满林塘青而上筵肃琴歌迭起俎豆骈罗烟霞充耳目之翫鱼鸟尽江湖之赏情盘乐极日暮途遥思染翰以凌云愿麾戈以留景嗟乎素交为重觉老幼之同归朱绂傥来岂荣枯之足道且欣风物共悦濠梁齐天地於一指混飞沉於一贯嗟乎此欢难再殷懃北海之筵相见何时惆怅南溟之路请扬文笔共记良游人赋一言俱成四韵云尔

秋晚入洛於毕公宅别道王宴序

下官才不旷俗识不动时充皇王之万姓预乾坤之一物早师周礼偶爱儒宗晚读老庄动谐真性进非干物自疎朝市之机退不邀荣谁识王侯之贵散琴樽於北阜喜耕凿於东陂野老披荷暂辞幽涧山人卖药忽至神州惊帝室之威灵伟皇居之壮丽朝游魏阙见轩冕於南宫暮宿灵台闻弦歌於北里交情独放已厌人间野性时违少留都下道王以天孙之重分曲阜之新基毕公以帝室之华拥平阳之旧館迹尘钟鼎思在江湖居荣命於中朝接风期於下走绿朱绂且混以罗裳列榭崇轩坐均於蓬户宾主繇其莫辨语默於是同归终贤王之乐善备将军之揖客是日也云繁雨骤气爽风驰高秋九月王畿千里高局向术似元礼之龙门甲第临衢有当时之驿骑英王入座牢醴还陈高士临筵樵苏不爨是非双遣自然天地之间荣贱两忘何必山林之下玄谈清论泉石纵横雄笔壮词烟霞照灼既而神驰象外宴洽囊中白露下而南亭虚苍烟生而北林晚鷄鷄始望不及牲牢麋鹿长怀非忘林藪先生负局倦城市之尘埃游子横琴忆汀洲之杜若况乎迹不皆遂时不再来属宸驾之方旋直羣公之毕从洛城风景此会无期戚里笙竽浮醺易尽仰云霞而道意舍尘事而论心夏仲御之浮舟愿乘春水张季鹰之命驾思动秋风策藜杖而非遥勅柴车之有日青溪数曲幽人长往白云万里帝乡难见安贞抱朴已甘心於下走全忠履道是所望於羣公倘心迹克谐去留咸遂庙堂多暇

返身沧海之隅轩冕长辞回首箕山之路寻赤松而见及泛黄菊以相从虽源水桃花时时失路而幽山桂树往往逢人庶公子之来游幸王孙之毕至茅君待客自有金坛王烈迎宾还开石架惟恐一丘风月侣山水而忘年三径蓬蒿待公卿之来日对元阳之易晚惜云雾之难披羣公叶县鳧飞入朝廷而不出下走辽州鹤去谢城阙而依然敢抒重?爰疏短引式命离前之笔希存别後之资凡我故人其辞云尔

越州永兴李明府宅送萧三还齐州序

嗟乎不游天下者安知四海之交不涉河梁者岂识别离之恨薛衣松杖琴樽为得意之亲临远登高烟霞是赏心之事有梁孝王之下客仆是河南之南孟尝君之上宾子在北山之北幸属一人作寰中之主翛然四皓为方外之臣俱游万物之间相遇三江之表许玄度之清风朗月时慰相思王逸少之修竹茂林屡陪欢宴加以惠而好我?手同行或登吴会而听越吟或下宛委而观禹穴良谈落落金石?竹之音辉雅智飘飘松柏风云之气状当此时也尝谓连壁无异乡之别断金有好亲之契生平於张范之年齐物於惠庄之岁三光回薄未殫投分之情四序循环讵尽忘言之道岂期我留子往乐去悲来横咽水而东西绪愁云於南北况乎泣穷途於白首白首非临别之秋嗟岐路於他乡他乡岂送归之地蓐收戒序少昊司辰清风起而城阙寒白露下而江山远徘徊去鹤将别盖而同飞断续来鸿共离舟而俱泛古人道别动便经年今我言离会当何日山巨源之风猷令望善佐朝廷嵇叔夜之潦倒麤疎甘从草泽行当山中攀桂往往思仁野外纫兰时时佩德人非桃李岂得无言子是箫韶当须振响勉酌伤离之酒具陈感别之辞各赋一言俱题六韵

秋夜於绵州羣官席别薛昇华序

夫神明所贵者道也天地所宝者才也故虽陰阳同功宇宙勦力山川崩腾以作气星象磊落以降精终不能五百年而生两贤也故曰才难不其然乎今之羣公竝受奇彩各仗异气或江海其量或林泉其识或簪裾其迹或云汉其志不可双得也今竝集此矣岂英灵之道长而造化之功倍乎仆之区区常以为人之百年犹如一瞬非不知风月不足怀也琴樽不足恋也事有切而未能忘情有深而未能遣故仆射羣公相知非不深也相期非不厚也然义有四海之重而无同方之感分有一面之深而非累叶之契故与夫昇华者其异乎嗟乎积潘杨之远好同河汾之灵液自置良友相依穷路是月秋也于时夕也他乡怨而白露寒故人去而青山迴不其悲乎盍各赋诗云尔

秋日饯别序

黯然而别之销?悲哉秋之为气人之情也伤如之何极野苍茫白露凉风之八月穷途萧瑟青山白云之万里奏鸣琴则离鵑别鹤惊岐路之悲心来胜地则时雨凉风助他乡之旅思琴书人物冀北关西去马归轩云间日下杨学士天璞自然地灵无对二十八宿稟太微之一星六十四爻受乾坤之两卦论其器宇沧海添江汉之波序其文章玄圃积烟霞之气几神之外犹是卿云陶铸之余尚同嵇阮接光仪於促席直覩明月生天响词辩於中筵但觉清风满室悠哉

天地含灵有喜愠之容丘也东西怅望积别离之恨烟霞直视龙蛇去而泉石空文酒求朋贤俊散而琴歌断门生饯别如北海之郡前高士将归似东都之门外研精麝墨运思龙章希存宿昔之资去后相思之咏

冬日羈游汾陰送韦少府入洛序

游汾胜壤楼船高汉帝之词卜洛名城邑辩周公之迹仰天文而窥日月虽共光华凭地理而考山川即殊南北韦少府玉山四照珠胎一色纵横振锋颖之才吐纳积江湖之量子云笔札拥鸾凤於行间孙楚文词列宫商於调下牵?一命披林野而随班考绩三年指兰台而赴选移征驾背长亭地隔风烟人离岁月寒原冠盖既同斟桂之欢岐路风尘即断惊蓬之思下官诗书拓落羽翮摧颓朝廷无立锥之处丘园有括囊之所山中事业暂到渔樵天下栖迟少留城阙忽逢萍水对云雨以无聊倍切穷途抚形骸而何托於时冰霜裂地星象回天朔风动而关塞寒明月下而楼台曙各题一字传之两乡云尔

饯宇文明序

昔者王烈登山林泉动色嵇康入座左右生光岂非仙表足以感神真姿可以错物况我巨山之稟孤出昇华之丽清峙羣公之好善下官之恶俗接霓裳於胜席陪鹤辇於中轩俱拔出尘之标各仗专门之气烟霞用足江海情多言泉共秋水同流词锋与夏云争长虽扬庭载酒方趋好事之游而肆乐含毫请命昇迁之笔同抽藻思共写离怀

感兴奉送王少府序

八十有遇共太公晚宦未迟七岁神童与顔回早死何益仆一代丈夫四海男子衫襟缓带拟贮鸣琴衣袖阔裁用安书卷贫穷无有种富贵不选人高树易来风幽松难见日羽翼未备独居草泽之间翹翮若齐即在云霄之上鸟衆多而无辩凤马羣杂而不分龙荆山看刖足之夫湘水闻离骚之客人贫材富罔窥卿相之门貌弱骨刚岂入王侯之宅王少府北辞伊阙南登灃山过我贫居饮我清酒一谈经史亚比孔先生再读词章何如曹子建山岳藏其迹川泽隐其形一旦覩风云千年想光景孔夫子何须频删其诗书焉知来者不如今郑康成何须浪注其经史岂觉今之不如古王少府乃可畏後生学问人也各为四韵共写别怀

别卢主簿序

林虑主簿清灵士也達于艺明乎道詮柱下之理驳河上之义撮其纲统成其卷轴吾侪服其精博时议称其典要可谓贤人师古老氏不死矣夫灵芝既秀兰蕙同薰仙凤于飞鵷鸾舞翼何则物类之相感也况乎同得此义目击道存此仆所以望风投欸披襟请益展转於寤寐殷勤于左右诗不云乎中心藏之何日忘之然变动之不居乃聚散之恒理琴樽暂离山川有別惟高明之捧?属吾人之解带王事靡盬良时易失盍陈雅志各叙幽怀人赋一言同疏四韵云尔

送李十五序

夫人生百齡促膝是忘言之契丈夫四海交頤非贈別之資然乃想山川之遽違送歸將遠惜歲華之不待行樂無時於是輟離驂以少留敞幽亭之多暇山芳襲吹疑居蘭室之中水樹含香宛似楓江之上御溝新溜近入離弦賓館餘花遙催別酒既而榮波東注灞岸南登浮蚊傾而高宴終蹊烏落而離宮散雖相思為贈終結想於華滋而素賞無睽盍申情於麗藻人為四韻各賦一篇

【英華此篇凡再見一稱王勃送李十五序一稱駱賓王餞李八騎曹序今兩存之以俟知者】送白七序

天地所以間南北山川所以別風云陽舒陰慘覺造化之為勞日運星回恨良辰之不定白七官天台杰氣地乳奇精當益友之龍頭處通侯之鸞頤靈珠耀掌是琴酒之文人長劒橫腰即風云之烈士屬天象掩峻帝道徵奇吐詞場之珠玉作朝廷之鸞鳳寰中握手得希代之英靈天下傾心盡當年之意氣整秋駕駐春裝背橫溪之七曲對長亭之十里中情易感下調多愁送君當東陸之前逢我在北風之別嗟乎良友不追神交已遠同人者少方見阮籍之眼青知我者稀不學馮唐之首白唯當遠游絕壑旅思空山幽桂一叢賞古人之明月長松百尺對君子之清風既而花鳥爭飛烟霞競集青山高而望遠白云深而路遙貴余以道誰能着後五十言贈子以言空有離前四十韻

送劼赴太學序

今之游太學者多矣咸一切欲速百端進取故夫朕受末學者因利乘便經明行修者華存實爽至於振骨鯁之風標報賢聖之言懷遠大之舉蓋有之矣未之見也可以深慕哉且吾家以儒輔仁述作存者八代矣未有不久於其道而求苟出者也故能立經陳訓刪書定禮揚魁梧之風樹清白之業使吾徒子孫有所取也大雅不云無念爾祖易不云干父之蛊書不云惟孝友于詩不云不如友生四者備矣加之執德弘信道篤心則口詞廢食忘寢渙然有所成望然有所伏然後可以托教義編人倫彰風聲議出處若意不感慨行不卓絕輕進苟動見利忘義雖上一階履半級何足恃哉終見棄於高人但自溺於下流矣吾被服家業沾濡庭訓切磋琢磨戰兢惕勵者二十餘載矣幸以薄伎獲蠲戎役嘗耻道未成而受祿恨不得如古君子四十強仕也而房族多孤飢粥不繼逼父兄之命覩飢寒之切解巾捧?扶老攜幼今既至於斯矣不蚕而衣不耕而食吾何德以當哉至於竭小人之心中猶子之道飲食衣服晨昏左右庶幾乎令汝無反顧憂也行矣自愛游必有方離別咫尺未足耿耿嗟乎不有居者誰展色養之心不有行者孰就揚名之業筵豆有踐菽水尽心盍各賦詩叙離道意云爾

王子安集卷七

卷八

<集部,别集类,汉至五代,王子安集>

钦定四库全书

王子安集卷八

唐王勃撰

表

上九成宫颂表

臣勃言臣闻帝机无朕道洽则时邕灵化不言功成则颂显伏惟陛下体元纂极模神建隧栋梁一气庭阶六合松轩夜警杳冥姑射之心茅殿晨凝寥廓峒山之驾臣沾风太上庇影华胥仰衢室而无阶候襄城而有地虽望卑平叔空勒景福之词而文谢子云愿竭甘泉之思谨凭天造辄贡九成宫颂二十四章攀紫墀而絶望叫丹阙而累息臣诚惶诚恐死罪死罪谨言

上拜南郊颂表

臣伏见总章元年十二月四日诏既清东寇将覲南岳甫资元勲旋窥大典伏惟皇帝陛下黼藻神器銜策睿图用天老之前机戮防风之後至为而不恃悬宝位於中宸卑以自居托灵符於上帝礼凝苍璧瑞溢玄圭紫旻降祐黄祇叶矩微臣学不照古才不旷时窥宇宙之神功覩郊禋之盛节时非苟迈怀雅颂而知归道不虚行想讴歌而有志岂与夫周传考室裁称栋宇之规汉奏甘泉未息嬉游之讽比兴衰於列代较驰骤於同衢而已谨凭天则辄贡拜南郊颂十章文不足奇意有遗美臣诚惶诚恐谨言

为原州赵长史请为亡父度人表

臣某言臣闻奉忠履义帝业所资昭德报功王风是切臣亡父故臣使持节都督丰州诸军事丰州刺史上柱国南康郡王士达往因隋季预奉皇初於时元洛未清双嶠尚梗江淮海岳王公数十亡父身羈伪郑宠极戎庭扫千载之风云拥三河之士马情思奉顺义不图生绵越寇塲密归诚欵登太行而耀军则建德离心出函谷而扬麾则王充破胆天书屡降手勅仍存泊乎九服义安四方无事谋臣出镇猛将临边西穷赤水之源东究青邱之境横戈北塞尽沙漠之风尘授钺南荒被?轲之矢石义形夷险迹遍疆塲分阨淹荣悬车遂礼虽死於牖下实怀天子之恩力尽方隅无媿忠臣之节今者归藏有日先远戒期陛下德被游?惠流枯骨高班厚禄已极於生前列鼓鸣箫复光於身後诚非毁灭所能投报但臣霜露之感瞻云垄而神销乌乌之诚俯寒泉而思咽希开净福庶补穷埏伏惟陛下恢不次之恩録无涯之请使获从朝例赐

许度人济沉识於昏涂拯亡灵於毀宅则陛下乾坤之施既不隔於幽明微臣蝼蚁之心岂忘情於家国是所图也非敢望焉轻黜冕旒若坠水谷

启

上从舅侍郎启

勃启一昨弟勋至奉命以宪台诗十首垂示气横霜署彩洞云局绣衣兼藻肆之华白简控玄机之奥仙骢在馭踐文路而驱神冠獬下临望词林而直指勃质惟茅艾名隔縉绅虚沾自出之荣每媿诸甥之列恩华曲被海诱傍临识谢知音荣深覩奥虞韶忽奏听律吕而忘疲楚匣遥开仰光芒而不暇昔孔融之逢元礼罕赌高文王粲之谒伯喈终慙懿戚援今企古议德畴恩荷栗兼储悲欣两集但才非酷似攀宅相而多慙慕切如存临渭阳而增感不胜荷戴屏营之至

上武侍极启

勃啓勃闻玄螭掩耀光销赤堇之芒白鹤摧辉影灭青胡之宝繇是紫霄气耿指牛汉而忘归丹水神迷道骊泉而罔悔其有龙文已远轻图剗兕之功鱼目濫持自拟灵虵之色循荣览分朝闻夕可君侯締华椒阁席宠芝局粲貂冕於金轩藻龟章於玉署月开鸾镜怀精监以分形霜湛虬钟蕴希声而待物吞九溟於笔海若控牛涔抗五岳於词峯如临蚁垤驰?雾谷忻逢紫岫之英驿思霞丘伫接青田之响勃北岩曲艺东臯下节攀翰苑而思齐儔文风而立至迹疲千里未陪丹毂之游叶契三英尚隔黄衣之梦谨凭洪贷輒録旧文轻敢上呈列之如右涓波有托望日谷以驰诚钟鼓无施伏雷门而假息谨启

又

勃启一昨不缘媒绍轻承盼饰祇宠相惊俯仰无地何则循方极弊尚亏风雨之间抚翼濡鳞犹失江湖之上况乎九天鹏术一代龙门荣枯舛致山川在目而可以追腾白日忘言於咫尺之书干突青云投迹於寻常之境徒以北林增秀弱翰知归东壑流谦纖鳍未已神交道合君侯昭片善之荣千载一时下走得长鸣之所是用谬凭高獎曲撰芜音游海无际过雷自讐虽黄金激愤指秦路而方穷苍壁慙恩伏焦原而未远谨启

上李常伯启

勃启勃闻杞林腾秀羽族知归阳谷流谦波臣有托然则朝光八圣尚欣牧竖之词道济五残未隔輿人之诵谨凭斯义辄呈宸游东岳颂一首当仁不让下走无慙於自媒闻善若惊明公岂难於知我龙门高远眇黄道而无阶爵里既投叫丹闈而有地伏愿暫停左右曲流国土之恩广进刍蕘俯息樵夫之议轻陈径捷?用彷徨

上皇甫常伯启

勃启一昨奉命令写新对台策及前後旧文谨凭国士之恩敢进輿人之颂窃以龙鑣就路驽骏相悬鹄镜临春妍媸自远亦有飞霜匝地兰萧衔共尽之悲烈火埋冈玉石抱俱焚之惨然则知音罕嗣流水空存至宝不同荆山有泪君侯饰扬刍议提獎芑词白圭成再见之荣黄金定一言之重鹏鷖既接仰云迳而将趋龙阪可登指星台而有望循襟佩德抚事知恩山岳有轻河汉无极谨启

又

勃启自恭陈薄技只奉话言咳唾成恩盼睐为饰征夫击节方思孤竹之风壮士寒心实有长杨之作谨凭严命轻呈乾元殿颂一首将冀导江至海常以笔札见知南馆西园遂与簪纓为伍德虽无尽攀骥尾而方遥生也有涯比鸿毛而非重谨启

上吏部裴侍郎启

勃启猥承衡镜骤照塔墀本惭刀笔之工虚荷雕虫之?殊恩屡及严命频加赍光耀於昏冥课宫商於寂寞进?惟谷忧喜聚门诚恐下官冒轻进之讥使君侯招过听之议贵贱交失恩爱两亏所以战惧盈旬迟迴改朔怀郑璞而增愧捧燕珉而自耻勃性惟懵昧识谢沉冥蒙父兄训导之恩籍朋友琢磨之义好学近乎智力行近乎仁知忠孝为九德之源故造次必於是审名利为五常之贼故颠沛而思远虽未之逮也亦有其志焉孔子曰言及之而不言谓之隐今者接君侯者三矣承招延者再矣抑亦可以言乎夫文章之道自古称难圣人以开物成务君子以立言见志遗雅背训孟子不为劝百讽一扬雄所耻苟非可以甄明大义矫正末流俗化资以兴衰家国繇其轻重古人未尝留心也自微言既絶斯文不振屈宋导浇源於前枚马张淫风於後谈人主者以宫室苑囿为雄叙名流者以沉酗骄奢为达故魏文用之而中国衰宋武贵之而江东乱虽沈谢争鹜适先兆齐梁之危徐庾并驰不能免周陈之祸於是识其道者卷舌而不言明其弊者拂衣而径逝潜夫昌言之论作之而有逆於时周公孔氏之教存之而不行於代天下之文靡不坏矣国家应千载之期恢百王之业天地静默陰阳顺序方欲激扬正道大庇生人黜非圣之书除不稽之论牧童顿颡思进皇谋樵夫拭目愿谈王道崇大厦者非一木之材匡弊俗者非一日之卫衆持则力尽真长则伪销自然之数也君侯受朝廷之寄掌熔范之权至於舞咏浇淳好尚邪正宜深以为念也伏见銓擢之次每以诗赋为先诚恐君侯器人於翰墨之间求材於简牘之际果未足以采取英秀斟酌高贤者也徒使骏骨长朽真龙不降銜才饰智者奔驰於末流怀真蘊璞者栖遑於下列易不云乎言行君子之所以动天地失之毫厘差以千里书不云乎弊化奢丽万世同流余风未殄公其念哉嗟乎盖有识天人之幽致明国家之大体辨焉而不穷酌焉而不竭抱膝无闷盱衡自得彼悠悠小技焉足为君侯道矣自非奉闲宴接清谈未可一二言也然窃不自揆尝着文章非敢自媒聊以恭命谨録古君臣赞十篇并序虽不足尘高识之门亦可以见小人之志也伏愿暂停左右少察胸襟观述作之所存知用心之有地谨启

上明员外启

勃启侧闻金乌耸轡俯圆燧而抽光瑶兔浮轮候方诸而吐液斯则洪纖异数冥符造化之津高下相悬精契陶钧之表故知声同义合存长幼於三州理隔气殊置山川於一面神交可托风云於杵臼之间道不虚行泾渭於簪裾之列其有迹申知已投爵里於思齐事迫当仁抱龙泉而愿割虽荆山已峻多轻抵鹄之珍而渤澥方春敢进归鳧之景伏惟丈人珠躔降德铎社抽英河岳纵其神器烟霞发其符采江东第一家传正始之音日下无双誉重名流之首三冬文史先兆迹於青衿百里弦歌即驰芳於墨绶彭泽陶潜之菊胜气仍存河阳潘岳之花芳风遂远荣加从袂上清兰府之游宠夺攀轮更掌蓬山之务麟图缉谥定荣辱於三泉鵷合裁书考薰莸於四部既鹤鸣云路望俚朝端鸿渐星台俯谐金议廉平誉号李宣伯之当官雅操绳时山巨源之称职加以文場武库发挥廊庙之师琼树瑶林寥廓风尘之表一丘一壑同阮籍於西山一嘯一歌列嵇康於北面词条郁雾遥腾驾日之陰辨鐸横霜直上冲星之气鳧钟蓄韵闻片言而指掌鸾镜悬心见一善而明目情源九派士流欣满腹之期德宇千门词人有庇身之望方当坐谈帝席雄视羣公岂徒比迹天府雌伏郎官而已哉勃崇徽启绪盛德传家承太子之仙宗析将军之远系朱轮在汉列高士於三台青盖浮江扈平王於七姓遗风旧烈尚存清白之基祖德家声代有纵横之目及金陵东覆玉马西奔髦头杰起文儒继出凤鸣朝日萧森烟雨之标龙跃云津盘礴江山之气虽雄名雅誉随朔野而扬声而华冕雕轩比南风而不竞陈太丘之积善羔鴈成羣谢车骑之余芳兰荪不替趋庭洽训共歌朱萼之篇避席承欢犹守青箱之业尝谓酣神北阜籍春渚而忘归动影南楫坐秋山而长往不意兰臯独嘯轻交委鹤之书芝涧行谣坐辱飞龙之使年殊贾谊仰宣室而方同业谢刘繇俯长途而遂慝塞上浮云之迹空倦吴山随侯明月之珠终悲暗室岂不知拂衣长谢林泉多迈俗之因安枕有余庙堂非养高之所松楸坐月临黛壑而遐征桂席攀风附青嵒而自足而欲俛首屈膝逡巡多士之林吊影慚?肮脏文昌之府徒以牛蹄已倦临文壑而骧鳞羊角可逢想高衢而抚翼忝名国士方叨智伯之恩挥迹奉常冀雪公孙之耻识正平於处士虽在孔融期仲容於望外终资许允犹恐先驰折翮频惊鵷路之风再举枯鳞空击龙门之水丈人借以顔色资以恩波垂雅契於长年叙情交於累代情加倒屣知步顷之生光礼极升堂觉声名之有地是用俯抽丹思上渎清顔缕殊獎於肝胆衔德音於咳唾懦夫增气先歌易水之风壮士投心思赴吴宫之火恩崇命浅瞻吕梁而可泛山高海深涉孟门而何险谨启

上许左丞启

勃启自违阻恩华婴缠风恙守愚空谷歛迹仙台同卫玠之虚羸谈非正始愧刘桢之逸气卧似漳滨朝野既殊风猷遂隔望芝兰之渐远觉鄙悵之都生所以暂下松丘言游洛邑永怀前倦逡巡元礼之门延首下风匍匐文章之府实愿稍捐人事少奉清言质儒释之幽疑访空玄之极境愿闻者道敢披江海之心祈进者荣非慕轩裳之重虽齿絶位殊空尘左右而道存目击岂隔形体轻陟阶堂伏深悸越谨启

上郎都督启

勃启勃闻古之君子重神交而贵道合者以其得披心胸而尽志义也是以叔牙苟在管仲分多而不贪无知尚存陈平受谤而非罪何则达其趣者能申其迹收其大者能让其细也今勃东鄙之一书生耳少怀耿亮颇慕高烈俛仰相得则屠博可游造次不谐则轩冕异路蒙君侯国士之遇受君侯长者之礼缱绻谈谑殷勤诲诱今有情而不告是不尽也有窘而不托是有疑也将恐季布无侣於後叶孙臆独称於前古嗟乎可以竭诚矣敢不尽言乎勃家大人天下独行者也性恶储歛家无儋石自延国谴远宰边隅常愿全雅志於暮齿扬素风於下邑而道里夐遥资粮窘鲜秩寡锺釜债盈数万此勃所以侧目扼腕临深履薄庶逢知己之厚以成大人之峻节也古人有言富观其所与贫观其所取又曰损有余补不足於君侯何如哉然则定其交而後求敢无愧已易其心而後语夫何饰焉赈给之义既惟其常厚薄之差伏希俯访轻尘视听倍增兢惕

王子安集卷八

卷九

钦定四库全书

王子安集卷九

唐王勃撰

书

上刘右相书

盖闻圣人以四海为家英宰与千龄合契用能不行而至春霆仗天地之威以息相吹时雨郁山川之兆故有玄蛟晚集凭鹤鼎而先鸣苍兕晨惊运龙韬而首出并能风腾雾跃指麾成烈士之致螭屈虬奔谈笑坐羣卿之右未知越苍海弃行间排紫微谒天子於是遭不讳之主拥非常之位龙章凤黻照其前锵金鸣玉叠其後三灵叶赞超然奉天下之图四海承平高步取寰中之托君侯之富贵足矣圣朝之付遇深矣故知阳侯息浪长鲸卧横海之鳞风伯停机大鹏铄垂天之翼及其投形巨壑触丹浦而雷奔假势灵飈指青霄而电击神气洋洋谓鳞翮使之然也殊不知两仪超忽动止系於无垠万化纠纷舒卷存乎非我是以陈平昔之智士也俯同降卒百里奚曩之达人也亲为饿隶当其背强敌转康衢雄虑耿於风云危途迫於朝夕岂自期荣称相府西藩专虎据之图宠冠斋坛东向举熊飞之策顾盼可以荡山岳咄嗟可以降雷雨遂令用与不用是非於楚汉之间知与不知得失於虞秦之际故死生有数审穷达者系於天材运相符决行藏者定於已君侯足下可不谓然乎借如勃者眇小之一书生耳曾无钟鸣鼎食之荣非有南隘北阁之援山野悖其心迹烟雾养其神爽未尝降身摧气逡巡於列相之门窃誉干时匍匐於羣公之室所以慷慨於君侯者有气存乎心耳实以四海兄弟齐远契於萧韩千载风云托神知於管鲍不然则荷裳桂楫拂衣於东海之东菌阁松楹高枕於北山之北焉复区区屑屑践名利之门哉至尊以摇河徙岳之威当立地开天之运圣人有作羣材毕举星辰入仕揖让朱鸟之门风雨称臣奔走苍龙之阙方欲停旒金室引成康於已任辟广瑶林复尧舜於兹日可谓明明穆穆尽天子之容貌矣抑尝闻之丹山九仞烟峯非数策之功紫极千门云台俟万楹之力故天下至旷神器不可独专天道无私玄勲有待而立书曰元首明哉股肱良哉好问则裕自用则小况掌万国之权受一人之宠动见臧否言知利害君侯足下何时易耶虽有大命不资童子之言而恭此小心敢进狂夫之说伏见辽阳未靖大军频进有识寒心羣黎破胆昔明王之制国也自近而及远先仁而後罚徵实则效存徇名则功浅是以农疏千里仅踰重石之乡禹截九州不叙流沙之境岂才不及而智有遗哉将以辨离方而存正功也虽至人无外甲兵曜天子之威王事有征金鼓发将军之气而长城在界秦汉所以失全昌巨海横流天地所以限殊俗辟土数千里无益神封勤兵十八万空疲帝卒惊烽走传骇秦洛之毗飞刍挽粟竭淮海之费於是乘奸放命者出绳纆以生威因公挟私者入闾阎而竞法虽一物失所泰阶延吁食之忧而百战方雄中国鲜终年之乐图得而不图失知利而不知害移手足之病成腹心之疾征税屈於东西威信蹇於表里语曰胜之不武不胜为辱天下

之责四面至矣诚可远凝高策上荐忠言决人事於去就合天情於终始遂令回麾转檄背青丘而鹜列障分亭巡苍波而守昔者齐侯以力方城为楚国之辞虞帝崇文苗人失洞庭之险况乎仗德绥乱以直乘邪明逆顺之端耸华夷之望虽复舳舻沸海旌旗触天铁山四面金城千里亦不能为敌人计矣此君侯之未谕一也盖闻星迴日运御洪荒者贞夫一电照风行制寥廓者归乎静易曰复其见天地之心乎语曰动之斯和绥之斯来是知源洁则流清形端则影直大道起而仁义息神化周而市狴定虽复体元立教眚灾耀知远之书顺时宰物宥罪发精微之典而况浇风易渐淳化难归孔明耿介於当朝子舆殷勤於易箴盖有繇也伏见边凶尚梗殊恩屡发亡命山泽者日月相趋朝脱桎梏夕还囹圄奸徒抱袂因时立侥幸之谋顽夫顿足中路纤吁嗟之惨皆繇寛胜於猛人迷所习劝沮不彰廉耻相冒亦有公卿失职耻受珪符之任郎官有衅俯舍铜墨之荣又焉可以宏獎风流抑扬衆务者也且夫朽索充羈不收奔马之逸轻緡振网或随吞舟之势况非常之化方洽於齐人无妄之思乃及於羣小将恐匡衡管仲【阙】灵沼於下泉矣古之善为国者不然信赏而必罚道德而齐礼泽配云雨而无曲惠威匹雷霆而絶私戮交书耸帀仗慈厚之师投金散璧树仁明之长故虽开衢室盖明堂亦将四三皇而六五帝矣此君侯之未谕二也盖易曰天地之大德曰生圣人之大宝曰位何以守位曰人何以聚人曰财是知发挥地利农桑启其业振蕩天功泉贝流其用伏覩前制屡扰事非画一廛市萧然人情怪动夫补苴并用未尽交易之宜轻重齐行适启兼并之路於是连闌掩闔者闭肆而乘其屈布衣韦带者阖门而受其困五方竞爽务浅术以相雄百郡争胜驱末技而成弊田夫织妇衣食鲜终朝之给巨馭洪商輿马挟封君之势盖有繇来矣故曰国储阙於九载则公上无所给家廩乏於三年则妻子非其有夫陰阳覆逆天地之常数百六运穷尧汤所不免一旦洪泉决地大旱焦山风雨於一岁之间霜雹於数州之境繁运广役首尾於中外沓税增徭日夕於都鄙變陰阳者将何以处之一夫窃议公之盛德亏矣愚谓严程峻法絶轻陋之货则奸熔之源塞矣沿风正典重耕耘之务则邪贏之计沮矣然後远弘教旨大变流俗法立有犯而必施令出唯行而不返违公窃铸者具五刑之戮因时力田者悬一命之赏不然则贾生晁错复流涕而言矣此君侯之未谕三也嵩衡不拒细壤故能崇其峻江海不让纖流所以存其广是以星台晓辟上台忘吐握之劳月殿宵兴中宇軫山林之慕知夫御天下者必待人也诗曰济济多士文王以宁未见君子忧心如醉伏见皇明远烛帝采遐宣张乐岱郊腾勲社首徵廉察孝瑶坛虚不次之阶署行议年璿检动非常之诏天下可谓幸甚矣於是友月朋霞之客背青臯而至冯唐颜驷之才排紫阁而集夫岂知终始异数泾渭同流萝薜失图簪纓解体惜哉羣英雾散名侯招蔽善之嫌天下雷同君子鲜长鸣之地而欲招絶足致真龙难矣此君侯之未谕四也易曰拔茅茹以其彙征吉岂非顺物不若招类报国不如进贤阳事昇而雨露归陰驾凝而风霜厉莫不观时有记抚气相求穷则独善其私达则兼善天下而利已疵物者以自任为身谋知进忘?者谓专荣而得计岂知夫尺波易谢寸晷难留陵谷好迁乾坤忌满君侯足下出纳王命升降天衢激扬凤宸之前趋步麟台之上亦复知天下有遗俊乎夫心之精微口不能言也言之微妙书不能文也伏愿辟东阁开北堂待之以上宾期之以国士使得披肝胆布腹心大论古今之利害高谈帝王之纲纪然後鹰扬豹变出蓬户而拜青墀附景抟风舍蓑衣而见绛阙幸甚斯不为难矣庶几乎麤卵不弃终感玄枵之精骏骨时收或致飞黄之锡书生王勃死罪死罪再拜

上绛州上官司马书

月日龙门百姓王勃再拜奉书於司马上官公足下盖闻灵化出於窈冥帝图寄於寥廓圣人生而万物睹太阶平而四国会故曰有非常之后者必有非常之臣有非常之臣者必有非常之绩至今雷奔雨啸风旋电转拾青紫於俯仰取公卿於朝夕云台迫汉南宫列元宰之图霜戟罗门北阙据名臣之第尝见之矣至若时非我与雄略顿於穷途道不吾行高材屈於卑势孔宣父之英达位未列於陪臣管公明之杰秀名仅终於郡属有时无主贾生献流涕之书有志无时孟轲养浩然之气则亦有焉岂非妙造无端盛衰止乎其域神期有待动静牵乎所遇向使太公失於周伯则旗亭之屠父韩信屈於萧何则辕门之饿隶又焉得鹰扬豹变吐纳风云者哉故曰知与不知用与不用观夫得失之际亦穷达之有数乎其有邀时誉忘廉耻徇苟得设向背於朝廷立纵横於势利举三寸之舌屈辱豪门奉咫尺之书逡巡下席皆自谓材足以动俗智足以济时钟鼎辉其顾盼冠盖生其籍甚岂知夫四海君子攘袂而耻之乎五尺微童所以固穷而不为也此盖庄周有言所以得意而忘象得象而忘言语曰谈何容易易称书不尽言知谈之不易而欲言之尽以是思之良可知矣下官者康衢之贱耳尝闻阙里之言颇挂平舆之目岂不知尘形俗状游水镜而多惭抱鼓援鼙过雷门而自失而欲刻鹄饰鳬唐突局钥者邪徒以登山泛海庶测高深执炬传萤希增日月三奔九合下官闻管仲之风千载一时君侯受鲍卿之托是敢陈其径庭不然则秋风明月西江留独往之因桂嶠松岩南山有不羣之地矧区区者而重高明之阃阆哉君侯极天分构振琼树而韬霞带地疏源握珠胎而冠月鳞轩羽殿瑶台降卿相之荣鹄仰蟬簪金社发公侯之始青臯独唳望鸿渐而翻云丹穴高鸣对鵷池而矫雾严助以贤良待诏未厌承明汲黯以方正拾遗终荣卧理藩维克振既参来暮之歌邦国不空自有康沂之相加以雄材广度散琬琰於胸怀逸气遁文运风霜於掌握迫青霄而构舍烟霞之涯涘莫寻振沧渤以流谦江汉之波澜未测耀灵桂於赵席垂棘知归辩羣籟於庄轩悬匏自托宾阶夕敞清河销骥絜之虞虚榻晨披元礼得龙驱之地方当翊赞宸极羽仪台屏岂徒偃仰州县劳事藩庭而已哉借如仆者言不满於乡党声不出於堂闕东海取乐於箴瓢南山毕志於文史餐花佩叶入兰室而谈玄挹露攀霞坐松局而啸逸扬子云之澹泊心窃慕之嵇叔夜之逍遥真其好也未尝露才扬已饰小智以惊愚假势凭时托中人而树迹遍游天下寒心於将相之门独守太玄侧身於名利之境尝谓奉琴卮於北牖咏诗礼於南陔坐商洛而折云英临江湖而采烟液生愿毕矣而属鸾局停逸频虚不次之阶鹤板徵贤累发非常之诏天下有道吾岂匏瓜承达人一顾之荣辱公车再辟之礼平津侯之博物终屈奉常贾大夫之才名犹逢绛灌况庸者而可免於此乎君侯要津先据图海盛於当时下官覆篋方勤为山始於今日虽陵深谷变终非入室之宾而昼咏宵吟敢预升堂之列夫以幽明不测尺标见天下之心巨细相倾寸管合羲舒之度岂非道存斯贵理在必亨霸略近发於輿歌皇图不隔於刍议故有荣枯絶等奉推轂而欣然年势不侔受分庭而罔愧风规可接惟君侯体之今古未殊则下官愿矣常恨霜松列涧万寻无罩月之期露草滋山寸莖有梢云之望斯则声实困於兼济才位难於俱立况乎地势不足以夸俗容貌不足以动人遑遑藪泽安足以奉高明之咳唾也所冀蝇阶贱质附云足而追飈螭序轻姿托霜毛而絶海委名励已蛟鰓申独断之能偶迹当仁骊珠鲜闇投之惧天衢可望指鹏程而三休巨壑难游伏龙门而一息勃死罪死罪

为人与蜀城父老书

盖闻天地作极不能迁否泰之期川岳荐灵不能改穷通之数岂非圣贤同业存乎我者所谓才荣辱异流牵乎彼者所谓命是以龙骧凤峙【一作翥】伊周成翊赞之功含糗羹藜颜冉困栖迟之病或先号而後笑或始吉而终凶事不可量功未必定则知洪涛未接长鲸多陆死之忧层风未翔大鹏有云倾之势池鰌井鲋亦将鼓鳞而轻之田鸠野鷄亦将蹇翮而侮之及冲溟渤接扶摇吹波则江汉倒流腾气则虹霓掩彩摩赤岸负苍天然後知其力焉吁韩信之无津也昌亭之一饿夫耳马卿之失路也临邛之一食客耳武不足以服衆文不足以动时长剑屈於无知洪笔沦於不用泊乎雄图蹶运至尊纳背水之谋丽藻昇朝天子赏凌云之作威加海岳声振廊庙彼淮陰之侠少成都之遗老也又焉能知远近哉是以监物於肇不於成赏士於穷不於达是知卞和之得玉也精存於岸谷之间张华之得剑也气发於星辰之际夫岂琢磨成器然後知其宝剗斲为能然後知其用哉仰惟乡耆等并玉山高族金堤胜侶列子弟於千城耀衣冠於百代或以风云去国公孙跃马之年钟鼎从王诸葛攀龙之日门庭相接雕甍将绮栋连陈机杼相和凤掇将虬梭交响金浆玉饌食客三千緑帟青裳家僮数百冲襟渺识人多江汉之灵丽藻华文代有云渊之气北斋开敞南馆虚闲诗酒同归琴书合契忘机得意耻嵇阮之交疎虚席延宾恨原尝之客少实烟霞之藪泽风月之津梁者乎刘仲文之远识不以乾没诣梁城闵仲叔之高风不以口腹累安邑虽其已没生气犹存况乎属宇宙之明当天下之泰不能俯拾青紫高视縉绅攀北极而谒帝王入南宫而取卿相脇肩侧足求哀鍾釜之间低首俛眉取济升斗之末嗟乎诚下官所以仰天汉而郁拂临江山而慷慨者也但时可以不遇道可以未行志愿可以未成功业可以未就古之才足以辅王业蹶迹屠钓之间功可以济巨川藏身版筑之下百里奚之负贩陈汤之丐贷而况於庸者哉此仆所以骏奔於顾盼之余自致於恩光之末也且夫精诚所感尚动神明意气相交岂惭车马倘能投心季子遥存素紵之恩援手应侯先致绋袍之赠岂人之情也能无报乎方今白藏绍序朱律谢期天高而林野疎候肃而江山静轻蝉送夏惊晚吹於风园旅鴈乘秋动宵吟於露渚丝纁成於南亩秔黍被於东阡时计有储愿履多福下官薄游绵载飘寓淹时欢蹶相仍忧虞自积陟梁鸿之峻岳何暇长謡临阮籍之长途唯知恸哭庶凭賙给以济飘危轻诉短怀伫流嘉耗

又

蜀都广镇岷?奥壤山分玉宇水向金陵景贶有期英灵间出荣问休畅幸甚幸甚夫神有可迫淥波惊七柱之音道有可符玄霜扣九钟之节岂道穷精密妙听察於无声理实杳冥玄应通於不测波流柱响波无入柱之因霜落钟鸣霜非扣钟之具况乎言忘意得臭味相求目击道存神明已接郑侨之逢吴札无谓殊方阮籍之对嵇康自然同气仆虽不敏尝从事於斯矣尝谓薰蕕不共器梟鸾不比翼是以类乎方者按风云於千里乖乎类者起山川於一面抑尝闻之士之生也其迹可摈而道不可藏其身可辱而志不可夺其有拂衣投臂遯形沧海之隅裂裳裹足独立高山之顶量腹而食度身而衣以钟鼎为刍豢以衣冠为縲紲方欲策鸾凤而抚云英鞭虹霓而采烟液其次排玉阙指金门成贾谊之谟树终军之策因机入务怀素将相之门沐露沾霜拥簪公侯之室然则拾青紫於旦暮取功名於俄顷演文物而动寰中腾声名而振天下若下官者可谓惭二途矣而敛手长揖强颜高视低心於蹇蹶之辰忍耻於栖惶之日哉渭滨留钓鹰 扬之业未萌緇源滞牧鸿渐之资盖寡及其攀穹运接灵期乘云雷而清八极和陰阳而调万品则知冥机所运吉凶於倏忽之间玄命所移飞伏於斯须之际日月自至聊

复尔耳方今炎飈谢节爽候关辰风高而宇宙清霜下而亭郊肃归云止鴈流曙响於东津落照开鸿写晴规於北岸萤疎夕砌蟬促朝林感序缘情登高寄赏仆一违秦陇再革炎凉戒征轴而无因指归途而有倦故乡超旷层山重复吴宫尚远频惊去燕之心楚峡犹賒已下闻猿之泪徒以风猷未隔道义相存幸承知己之心稍缓他乡之思昔虞公再见悬光白璧之前季布一言犹定黄金之诺况交已成於杵臼道已茂於金兰希照穷途远流嘉贶若使恩裁口腹空留安邑之宾惠阙始终取恨昌亭之客

与契苾将军书

昊天不忱哲人终否毕公逝矣伤如之何敬想情则懿亲义惟良执非夫人之为恻其谁为恻乎仆与此公早投交契夷险之际终始如一常思并建忠孝之蹟共申家国之雠壮志不就古人所悲何图一旦长诀呜呼哀哉管仲不存叔牙空在子皮已丧子产何依兴言追昔良增痛悼适得韦四郎书具承大郎雅意知欲以此公碑志托之下走夫抚今怀昔理寄斯文旌德叙功事属知己是以子期幽思感叔夜之形言伯喈雄藻待林宗而无媿下走虽不敏幸托深期此而不为谁当为者但恐位卑先達才非拔萃虚承厚睠不副高闻谨遣舍弟勋往面取进止临书啜泣惨惶不次

上百里昌言书

勃言乡人奉五月一日海子弟各陈百里之术宣於政者承命惶灼伏增悲悚勃闻古人有言明君不能畜无用之臣慈父不能爱无用之子何则以其无益於国而累於家也呜呼如勃尚何言哉辱亲可谓深矣诚宜灰身粉骨以谢君父复何面目以谈天下之事哉所以迟迴忍耻而已者徒以虚死不如立节苟殒不如成名悔过傥存於已为仁不假於物是以孟明不屑三奔之诮而罢匡秦之心冯异不羞一败之失而摧辅汉之气故其志卒行也其功卒就也此言虽小可以喻大此勃所以怀既往而不咎指将来而骏奔割万恨於生涯进一簣於平地者今大人上延国譴远宰边邑出三江而浮五湖越东瓯而度南海嗟乎此皆勃之罪也无所逃於天地之间矣然勃尝闻之大易曰人之所助者信也天之所助者顺也是以君子不以否屈而易方故屈而终泰忠臣不以困穷而丧志故穷而必亨今交趾虽远还珠者尝用之矣书不云乎弗虑胡获弗为胡成不胜愤激之至谨上百里昌言一部列为十八篇分为上下卷庶竭私欸少裨公政追思罪戾若投水谷谨奉言疏不备勃再拜

王子安集卷九

卷十

钦定四库全书

王子安集卷十

唐王勃撰

论

三国论

论曰汉自顺桓之间国统屡絶奸回窃位阉宦满朝士之蹈忠义履冰霜者居显列则陷犯忤之诛伏闾巷则婴党锢之戮当是时也天下之君子扫地将尽虽九伊周十稷契不能振已絶之纲举土崩之势明矣嘉平中大黄星见楚宋之分辽东殷馗曰其有真人起於谯沛之间以知曹孟德不为人下事之明验也先时秦帝东游亦云金陵当有王者兴董扶求出又曰益州有天子气从兹而言则长江剑阁作吴蜀之限天道人谋有三分之兆其来尚矣然废兴有际崇替递来每览其书曷能不临卷而永怀抚事而伊郁也尝试论之曰向使何进纳公业之言而不追董卓催汜弃文和之策而不报王允则东京焚如之祸关右乱麻之屍何繇而兴哉至使乘輿蒙尘於河上天子露宿於曹阳百官饥死於墙壁六宫流离於道路盖繇何公之不明贾翊之言过也於是刘岱乔瑁张超孔伈之徒举义兵而天下响应英雄者骋其骁悍运其谋能海内嚣然於兹大乱矣袁本初据四州之地南向争衡刘景升拥十万之师坐观成败区区公路欲居列郡之尊琐琐伯珪谓保易京之业瓚既窘毙术亦忧终谭尚离心琮琦失守其故何哉有大贤而不能用覩长策而不能施便谓力济九区智周万物天下可指麾而定宇宙可大呼而致也呜呼悲夫余观三国之君咸能推诚乐士忍垢藏疾从善如不及闻谏如转规其割裂山河鼎足而王宜哉孙仲谋承父兄之余事委瑜肃之良图泣周泰之痍请吕蒙之命惜休穆之才不加其罪贤子布之谏而造其门用能南开交趾驱五岭之卒东界海隅兼百越之衆地方五千里带甲数十万若令登不早卒休以永年神器不移於暴酷则彭蠡衡阳未可图也以先主之寛仁得衆张飞关羽万人之敌诸葛孔明管乐之俦左提右挈以取天下庶几有济矣然而丧师失律败不旋踵奔波谦瓚之间羈旅袁曹之手岂拙於用武将遇非常敌乎初备之南也樊邓之士其从如云比到当阳衆十万余操以五千之卒及长坂纵兵大击廓然雾散脱身奔走方欲远窜用鲁肃之谋然投身夏口於时诸葛适在军中向令帷幄有谋军容宿练包左车之计运田单之奇操悬军数千夜行三百輜重不相继声援不相闻可不一战而擒也坐以十万之衆而无一矢之备何异驱犬羊之羣饵豺虎之口固知应变将略非武侯所长斯言近矣周瑜方严兵取蜀会物故於巴丘若其人尚存恐玉垒铜梁非刘氏有也然备数困败而意不折终能大启西土者其惟雅度最优乎武侯歿刘禅举而弃之覩譙周之懦词甘忿愤而忘食闻姜维之立事又慷慨而言憊惜其功垂成而智不济岂伊时丧抑亦人亡乃知德之不修栈道灵关不足恃也魏武用兵髣髴孙吴临敌制奇鲜有丧败故能东擒狡布北走强表破黄巾於壽张斩眭固於射犬援戈北指蹋顿悬颅拥旆南临刘琮束手振威烈而清中夏

挟天子以令诸侯信超然之雄杰矣而弊於徧刻失於猜詐孔融荀彧終罹其災孝先季珪卒不能免愚知操之不懷柔巴蜀砥定東南必然之理也文帝富於春秋光膺禪讓臨朝恭儉博覽墳籍文質彬彬庶几君子者矣不能恢崇萬代之業利建七百之基骨肉齊於匹夫衡樞委乎他姓遠求珠翠廢禮諒闇之中近抱辛毗取笑婦人之口明帝嗣位繼以奢淫征夫困於兵革人力殫於台榭高貴鄉公明決有余而深沉不足其雄才大略經緯遠圖求之數君并无取焉山陽公之墳土未乾陳留王之賓館已啓天之報施何其速哉故粗而論之式備勸戒俾夫來者有以監諸者焉

八卦卜大演論

昔者聖人之作易也始畫八卦以通神明之德以類萬物之情以為分太極者兩儀也分四象者八卦也成八卦者十六將也司八卦者十二月也分十六將者三十二候也分十二月者二十四氣也分三十二候者六十四卦也司二十四氣者三十六旬也進退於三百六十六日屈伸於三百八十四爻往來飛伏之理盡矣其孤虛消息之端極矣三才之道不可不及也五行之義不能復過也翕之以幽明張之以寒暑會之以生死申之以去就禍福生焉吉凶着焉成敗行焉逆順興焉賢者識其大者遠者不賢者識其小者近者奉之者則順背之者則???圓立者稱聖偏據者號賢嘗試論之曰三才易之門戶也八卦者易之徑路也引而伸之終於六十四卦天下之能事畢矣陳而別之極於三百八十四爻天下之微理罄矣夫陰陽之道一向一背天地之理一升一降故明暗相隨寒暑相因剛柔相形高下相傾動靜相乘出入相藉泯之者神也形之者道也可以一理徵也可以一端驗也故天尊則地卑矣水濕則火燥矣山盈則澤虛矣雷動則風適矣是以天下有風可以姤矣則地中有雷可以復矣天下有山可以遯矣則澤上於地可以臨矣天地不交可以否矣則天地既交可以泰矣風行地上可以觀矣則雷行天上可以大壯矣山附地上可以剝矣則火附天上可以大有矣風行水上可以渙矣則水在地上可以比矣雷出地奮可以豫矣則風行天上可以小畜矣雷之與水可作解矣則風之與火可以家人矣雷在風上可以恒矣則風在雷上可以益矣風在地下可以升矣則雷在天下可以无妄矣風在水下可以井矣則雷在火下可以噬嗑矣風在澤下謂大過矣則雷在山下可為頤矣雷在澤下可以隨矣則風在山下可為蠱矣澤上有水可為節矣則山下有火可為旅矣雷在水下可為屯矣則風在火下可為鼎矣水在火上可為既濟矣則火在水上可為未濟矣澤中有火可以革矣則山下有水可為蒙矣火在地下可以明夷矣則水在天下可為訟矣地下有水可為師矣則山下有火可為賁矣澤上於天可為夬矣則澤下有水可為困矣山下有天可為大畜矣則澤下有地可為萃矣以山在澤上可為損矣則澤在山上可為咸矣澤上有火可為睽矣則山上有水可為蹇矣上天下澤可為履矣則地下有山可為謙矣澤上有風可為中孚矣則山上有雷可為小過矣山上有風可為漸矣則澤上有雷可以歸妹矣此天地以對成之義陰陽反合之理故卦相次則反爻以成義易之八卦是也八八相生則錯卦以興理因而重之是也故聖人之道可縱焉可橫焉可合焉可離焉逆而陳之未嘗逆焉順而別之未嘗順焉三畫以變雖天地之數可无韜也九六相推雖萬二千五百之浩蕩不能踰於三百八十四三百八十四之糾紛不能踰於六十四重之以六十四不能過於八卦張之於八卦不能過四象紀之兩儀兩儀之理達而太極得矣故古往今來寒進暑退死生亂動是非譽結未嘗非兩儀也而未嘗離太極也故曰有寒有暑則兩儀不廢也无思無為則太極未

尝远也见之则两仪忘之则太极夫然故不舍二求一未尝离动以求静未尝离动以达静也有可有不可非圣人之谓也无可无不可是夫子之心也然天下之理不可穷也天下之往不可尽也有穷尽之地者其唯圣心乎有穷尽之路者其唯圣言乎故据沧海而观衆水则江河之会归可见也登泰山而览羣岳则冈峦之本末可知也是以贞一德之极权六爻之变振三才之柄寻万方之动又何往而不通乎又何疑而不释乎故孔子曰必也正名乎名者义之本也非圣人孰能正之哉若抑末执本研精覃思非圣人之书则不读也非圣人之言则不取也庶几乎神明之德可通乎万物之情可类乎本末之思也夫何远之有君子可不务乎哉

平台秘略论十首

孝行一

论曰昔之列桐珪建茅土者非一君焉至於孝思可称仁风茂着存乎緇牒十一而已岂非生於深宫之中长於妇人之手膏盲积乎骄慢情奔沦乎嗜慾呜呼有国有家者可不诫乎

贞修二

论曰美哉贞修之至也或抗情激操仗清刚而励俗或理韵和神抱直方而守道或旌奇表善擢才於不次之阶或剖滯申嫌措辞於难犯之地并能以礼昇降以时舒卷既明且哲以保其身盛矣哉原夫御俗裁风变彝伦者寄乎直全身远害得随时者存乎变夫然故进不违义退不伤生清贞静一保其道委迤屈伸合其度易曰君子或出或处或默或语天下何思何虑同归而殊途百虑而一致此之谓也

艺文三

论曰易称观乎天文以察时变传称言而无文行之不远故文章经国之大业不朽之能事而君子所役心劳神宜於大者远者非缘情体物雕虫小技而已是故思王抗言词赋耻为君子武皇裁勅篇章仅称往事不其然乎至若身处魏阙之下心存江湖之上诗以见志文宣王有焉

忠武四

论曰陰阳代兴刚柔合运威恩参用以成化文武相资以定业况乎康侯自我宗子维城者乎城阳之权略明决卒摧吕氏之变任城之志意刚断实启有魏之业盖有助焉陈思雅怀忠义勇形家国表奏永昌洞晓兵数绩着疆場长沙武陵亦足云也

善政五

论曰东平以盛德匡时大兴礼乐齐献以至亲统物光济中外淮阳安定峻必行之典安陆扶

风深受遗之泣能义形家国理极忠贞使黄河如带垂芳不朽盛矣乎守方雅以调蕃政用公直而掌朝论昂然直上凛有生气衡阳太原亦足云也

尊师六

论曰前史称良药苦口而利於病忠言逆耳而利於行岂非事情竭於不顾主色期於难犯中人以下罕免斯累其有抗辞必尽忠烈横匪石之心闻善若惊君王动顺风之请相须之际良可咏也清河之恭慎真恳雅为

上引圣朝下托师傅和矣哉

褒客七

论曰原夫重艺尊师登奇伫逸道存万里神交一面故有推轮拥簪寡人忘千乘之荣越席分庭上才当四海之礼斯实藩邸之盛事间平之用心也而有矫情役智扬逸名利之间窒隙蹈瑕乾没英翹之地便辟脂韦饰其迹甘言巧辞运其辨假君王之顾盼用君王之威福传曰好善而不择人则前代有以之倾矣至於兴谐文雅赏尽烟霞月庭广辟风闺洞敞西园故事下兰坂而宵歌东苑遗尘坐槐庭而晓赋折旋书艺之园翱翔舞咏之隙洋洋乎亦为乐之一方也

幼俊八

论曰夫滥觞悬米翻浮天动地之源寸株尺藁擢捎云蔽景之干岂非积微成大陟遐自迓易曰山下出泉蒙君子以果行育德故考其前事备之於篇

规讽九

论曰夫陵谷好迁乾坤忌满哀乐不同而不远吉凶相反而相袭故有全中率行用心於不争之塲杜渐防危投迹於知几之地昔之善持满者用此者也谚曰祸不入慎家之门前代有以之兴矣至若中山激难重存亲礼武陵变色复延情爱子建之陈辞贡愤长沙之发对因机虽亦各达其心未若洪庆之希声也

慎终十

论曰诗云靡不有初鲜克有终若夫东平之奉宪遵约耿介原陵之奏中山之见贤思齐殷懃濮阳之托庶几乎可谓慎终矣至子尘之奉行文处中慰之远述河间陈思尅已并未易诬也【子尘以下多讹误】

王子安集卷十

卷十一

<集部,别集类,汉至五代,王子安集>

钦定四库全书

王子安集卷十一

唐王勃撰

颂

乾元殿颂【并序】

臣闻鹏霄上廓琼都开紫帝之庭鳌纪下清珍野辟黄灵之馆兼山配极照鸾阙於霞标荐水涵元湛骊宫於雾壑斯则神徵语恠功潜鸟迹之初理涉非经道昧鹑居之始授凤书而稽碧落仙构罕存按龟籙而质黄图金模间起粤若风移处闇增巢恢火运之机业拒向明上栋括河图之奥三堵布政咏匪日於灵台百堵陈诗颂斯干於考室亦有黄轩瞰月樵门颓九洛之功璿闥排烟牧野构三河之酷御燕台而临北极缺王度於祈招列云阁而拒南山陨皇谟於轺道然则卑宫丧礼采椽轻四海之尊丰屋延灾柏梁非万乘之有虽因时立事奢俭殊流而弘道在人兴亡迭运灵光未造不窥九室之荣景福宏规犹拥三方之衅瞻风旧史逮曹马而无讥观迹故墟历周隋而未得自我唐太陵迁构均五方於鹤几之前中野凝图调六气於虬牀之下坐圭台而清俯仰晷纬齐明临鼎邑而重威灵云雷合响得玄功於大壮其至在兹乎我大唐鸡浑制极树神宰而制山河鹤?裁仪辟太虚而有天地黄精吐瑞潜龙苞象帝之基紫气徵祥鸣凤呈真王之表高祖太武皇帝虹星湛色开宝胄於金壶蛟电凝陰发皇明於石纽白蛇宵断行移海岳之符苍兕晨驱坐邁云雷之业属东隣委馭扇虐政於丛祠北拱隳尊紊皇图於宝极蜚鸿集野瞻乌鲜投足之因青犢啸风羣鹿无择音之所天街五裂截鲸浦而飞芒地纽三分触鳌山而按节玄虬在御扫圻甸而廓星都黄鸟分麾动扶摇而骇云阵鑣官钺跨高陌而登元轡野韬戈陟圯坛而拥号皇图不恃圣人追卷领之风神器无私才子奉褰裳之运太宗皇帝云房揖契压麟玺於庭轩雷渚翔英扰龙铃於高席八能亨运抗鵷邸而杖朱髦十乱恢基临鹤州而拥黄钺唐云秘族潜开白水之徵代景回轮光践丹丘之运权輿象纬削茅社而建琼桃草昧风云席罗图而创璿历紫庭合粹括宇宙於宸襟丹宸凝尊运陶钧於宝思摛碧霄而链石上清耀魄之宫诏寰海而捐珠俯睇阳侯之室功驱偃伯顿鸛视於华封道被来王静龙吟於武库玄枢上运卜年开累圣之符丹竈昇遐遗范敞谋孙之画皇帝陛下椒庭袭庆曜璿萼於霞庄兰殿分休湛珠衡於月馆道凝琼镇下苍掖而照重熙业峻铜楼凭紫轩而揖羣后环四瀛於舜抱漏蚁覃津栖十景於尧衿巢螟荷照上元开籙宝龟定皇邑之模下武崇基飞龙锡帝台之构贞明启运齐玉镜於鸾门易简成功偃铜符於鹤仗怀降尊於襄野太阶忘七起之劳念负重於焦原巾席托三危之险临翠舫而则道天孕时成坐玄扈而被图神超物妙皇后星浚纵淑曳珠紱於铜臯云野疏祥抗琼枝於桂浦素蟾登庆六虚充

牝马之贞丹雀衔林三雅合关雎之好璿宫夜静居龙嚳而调元金宸晨开御驾阶而缉化芝庭揖训远清和凤之仪兰佩承风竞峻当熊之节皇太子承云紫座翊八柱於乾维湛粹青衢揖三枢於地户黄离踵曜太阳分铎树之辉苍震荐音少海控银河之色鹤笙飞奏想丹驾於琼山鲍俎捐芳齿玄冠於宝序彤闈问竖礼崇监抚之威黼席兴贤义极君亲之爱若乃东门恤胤叠仙构於熊山西苑承家导灵波於鴈沼桐圭作瑞凤毛曜丹穴之英茅壤分维麟趾冠玄丘之俊巽宫延粹辟朱柱於娥台兑野流芬疏紫兰於别馆频隈毓范云局分戚里之驩覃凝规星阁絶郎官之请雕龙命职纵跳泽而骧鳞翠鸚调司顺义颺而抚翼月轩宵伫虞谿降璿纬之精震帐晨披姜水洞金韬之蹟飞鹤书而抽海状桂壑於是投纶转麟旆而揖山容松涧繇其削衽轩图瑞霏泛花绶於鸡林农纪祥炎濯兰纓於凤水仙台倂务三珪铨棘序之风天秩调邦六府变槐衢之典金門献纳纵麟笔於苔牋石馆论思核龟章於竹槩淹中访礼蹲龙摇壁水之波稷下谈经飞兔跃环林之秀词庭吐凤翫鸟迹於春黄书帙翻萤阅虫文於夏阁杏花千亩绀轡照帝籍之功桑柘三宫玄纁降亲蚕之礼圆丘上辟奉苍璧於灵坛方泽下凝列黄琮於宝墀朱弦翠璫履霜怀四响之尊复溜重檐涓日正三纲之首五灵奔庆冠蛇泽於黄枢六祀衔欣扬麟烟於绀席遗弓积慕深太庙之仪执豆推恩道振明堂之礼瑶山广乐备逸调於宫悬洞庭仙奏纳遗歌於帝府九韶分唱后夔清桂序之音六变同和飞凤掌梧轩之律樽俎折旋之数苞举陰阳堂庭节奏之规弥纶宇宙灵襟索隐控风伯於词林睿想鈎深诏天吴於笔海神穷独照探赤水之珍思洽几深迴写丹谿之韵金坛紫露映银籀而翻华瑶林白雪藻琼章而吐绚蟬机撮化铜浑将九圣齐悬虬箭司更银漏与三辰合运爽鸠分职素云頽鸟啄之祥神解关司玄水照龙颜之则黄沙鞠草剗丛棘而迁讹丹石滋苔仰甘棠而息讼融臯再稔方闻外户之謡昧谷千箱坐溢康衢之奏百城烟峙望秋露而乘风千室云开合宵霆而组化彤帟独选熊幡下芦鴈之祥墨绶分贤犀检降槐鸾之祉筠簪伫信髦士剖竹而相寻苇杖沾仁鮐叟攀轮而不暇龙蛇可践野人丰荷杖之驩鸡犬相闻城尉辍鸣桴之响五云抽润湛芳气於璿台六府威殷唱丰歌於铜阙不戒而畀东户恩周动植之津博施而举南风化偃胎萌之神谋备预俨七萃於丹枢遂略防微肃千庐於紫卫元戎握节黄公授犀阙之图帝座闻輦玄女荐龙庭之策赭柯捭刃中权决胜於两阶白羽俄麾善阵推亡於四表朱厓反景之域削蛇弭於文黑山明月之乡委龙琛於武帐锦轩星鹞控乾络而观风绣服霞惊泱神紘而问俗川浮没羽鲸谿静丹浦之虞陆荐飞毛熊羆动青云之侦银关骤雨望紫陌而趋恩铁幌驰风计彤闈而沥思赤马文援之宝丛积乎郊虞紈牛露犬之贡满盈乎储邸青邱画野不踰征赋之乡苍水奉图未尽提封之贯且夫纬武经文宏业也含幽育明至诚也混齐六合大功也规模百代昌数也故能袭九空而宁庶物划千里而统诸侯休徵象德而动嘉符触类而至风扬晷洽藻乾庆於芳年司节河清霽坤祯於明渚瑶枝结庆泉埃荡玉盖之文琼液浮甘天酒缀金茎之色黄蕤紫脱湊仙颖於中畿翠蕙丹萸叠灵株於上序骈眸候日漾影蒙池比翰翻风栖光若木祥飞井络震鳞题瑞朔之元祉绚新郊耆兽纪和年之序具灵篇之絶覘究仙谍之殊休天人之际交矣皇帝之道备矣繇是三灵物覩扣兰禁而栖诚九服子来咏嵩宫而骋力去奢去甚不矜黄屋之隆匪朴匪雕方顺丹墀之请宸规相宅考周旧於灵都睿览思和获秦余於正殿羣臣列陞奏萧相之遗模天子临轩采荀卿之故事炎洲八桂籛仙拱於林衡岱畎五松委灵材於梓匠衢宫记范万机抗九户之尊海孽移琛千栾省十家之费飞廉卷霭彻烟极而浮蕤屏翳收津划星墟而置槩瑶阶百雉光悬宝露之坛琼壁万寻影粹崇霞之阁拖虹梁而四注星汉亏於上荣叠云栋而三休寒暑隔於中溜雕楣鹤企沓势分规绣

桷虬奔殊形别起圆璫布藻罄羽璧於狼泉方镜披莲孕化玃於蜃浦芝楼对幄薰传五日之风芸阁列钱彩锻三旬之雾文疏罩迴陰兔息肩於綺寮翠幌笼霄阳乌铄翼於珠网丰隆按节下复櫟而司阶列缺施鞭低丛檻而假道温房伫幸煦芳景於佳辰凉室乘闲凜徂飈於火序金铺夕照若帝圃之辉琼英宝缀晨悬类阿房之聚银烛烟丘碧桂翊珉陛而披香雨岫頽筠夹璿流而扬影九衢翻翠襍仙卉於中逵四照霏红间灵葩於右城神禽率舞光浮肆夏之轩瑞鸟相鸣响叶钧天之乐鈎陈宿列俨双碣於丹青綺缴霞周辟千门於紫露尔其左局嵩镇申侯降太室之祯前枕莘郊伊尹发空桑之秀揭熊山而北眺贝阙犹存覩龟溜而西分琼台易接总交中宇廓川陆而疏畿竟想善邻揆风霜而建野然则因秦构极祖宗耀金策之符作洛恢基我后创璿居之始援天引圣隔代重晖横紫都而可袞配玄宫而非远故能使神光夜烛镜麟趾於文除仙滄晨华委鸾章於绣础灵爻密发八方昭大有之和宝篆潜开六合启同人之会两仪交庆虚碧墀而翹旌万宇披欢指苍车而候跸虽青蒲颂德东朝献龙凤之图而丹极鸣谦南面动貂羊之诏百神推策望璆怪而?诚三让奉符顾瑶坛而肃事龟书吐瑞按五校而分营凤策扬辉翔八鸾而节步帷宫雾转列芝盖於中天帐殿星离轂蒲轮於大野紫鳞充饗若大帝之共临素鹤翔华类羣仙之广宴花开瑞雪委琼饌而调芳彩绚祥云夹珠旗而曳影功推三祖银绳勒东岱之威业峻一人金策奉南山之壽道既成矣玄符集矣代既贞矣元勲缉矣运三辰而虚玉柄风兑涣其中孚悬五礼而偃金科雷坎光其作解奔烽举爵溢仙酒於中衢叠鼓分肴浹宸辉於下里吞九重而上运控八圣而遐征翔赤驥而睇风区吟翠虬而掩霄甸隐隐轰轰雷动天惊回輿斜眄而降乎乾元之殿司宫庀职肃坻墀而神行掌舍巡方焕岩廊而洞启赫若朱螭负汉而辉横海之鳞默若苍鹏架壑而振垂天之翮千官晓次僊银榜而端簪万户宵披候琼膏而肃带灵戈列陛天官具三揖之仪云輅充庭宗伯寅九宾之礼瑶鲸戒响悬猛簏於端闥铜狄分形肃严局於左序排紫微而立极宸仪冠明后之三俯黄道而披轩仙历用乾元之九荡荡乎何圣人之无外巍巍乎而神功之不穷也臣勃席芳十步企景三冬虽承宣室之谈犹窘灵台之影仙坛远秘已多谢於祥鸛大厦初成复攀荣於贺雀慨深梁甫终乖捧日之欢思极甘泉未动凌云之价神图不测固流绚於丹縢微志可存庶镌芳於翠琬敢献颂曰

紫局垂耀黄枢镇野银树霜披珠台月写响明立极横神廓社大壮摛爻斯干韵雅【其一】

鶉居化没狙讹道长琼构霞明璜轩露敞弃人崇欲违天蠹象南巢不救东邻长往【其二】

瑶緘考懿金板藏功道凝茅屋业盛蒿宫龙阶察祲鵠阁调风推访华礼酌俭思冲【其三】

悬厘结叠传翼生灾千蕞岭接万栱星开争图绚侈福极凶来风寒碣馆露惨苏台【其四】

十馆莹秦金房砥室千间架汉韬云闕日济恶承危同亡异术倾輶未远遗墟继出【其五】

龙川结祸鹤塞称符尘惊八际雾惨三都穹庐宝极罽幕璿枢司宫坠典掌舍沦图【其六】

苍衢毓祉丹丘表圣凤矫仙枢龙回宝命道凝金册功驰玉镜紫气抽?黄晖叠映【其七】

神稽鹤迹播鸡浑重光累极翼子谋孙经天纬象就日提元鸾轩湛粹凤几裁尊【其八】

祥抽紫历业照彤管珍雀朝翻仙蟾夜满丹墟献迹青台坠卵椒闾仪风芝闾奉欸【其九】

登三建绪明两开仪龙譙雾郁鹄禁霞披浪分璿渚景峻瑶枝黄扉晓列丹毂宵移【其十】

龟文猎彦麟旌访逸桂客攀荣松宾改律紫鹄开纪丹虬耸秩纵壑抟颺登山捧日【其十一】

功融棘序道备槐庭不仁者远惟道斯行烟摇墨绶电转朱戟境怀春翟野散秋螟【其十二】

郑竹分科燕棠辍讽铜机化极珠囊业洞礼贵丹虬乐调朱凤珠垠献宝绵乡委贡【其十三】

龙关静析鹤塞投弦歌呈豹尾舞进鸢肩铜铙月斥铁鞬星悬绳幽架险驿雾驰烟【其十四】

雾坛凝紫河宫湛碧翠蕙翻颺丹萸候魄霜均电散连珠契璧藟盖笼霏花衢坠液【其十五】

年和政美化极风调灵台軫咏考室兴謠循图访典去泰捐雕道存南面让屈东朝【其十六】

望云裁构笼霄建宇方镜星离圆璫月聚梓匠倾思林衡授矩画拱栖烟文轩架雨【其十七】

芝房叠翠桂庑流丹霞张万户雾葺千栾重局驻燠洞牖栖寒神加有叙贶入无端【其十八】

帝图临御皇僚萃止电戟挥霜云旌拒暑紫宫可逼黄街易履凤础腾文麟庭抗礼【其十九】

珠泥畅绩银绳郁契鹤岭云明龙坛景惠道超中古功推下济惟帝惟天惟天惟帝【其二十】

拜南郊颂【并序】

微臣上稽龙繇下阅龟谋观天地之至道考皇上之大节武宣七德未尝踰息乱之乡文招九

功未尝出昇平之域并能悬日月而高视驾雷雨而先鸣或皮币而践天阶或干戈而蹶乾步至於理定创礼功成作乐振长策以叙诸侯设灵机而制羣动犹虞阶已泰不能息洞庭之诛夏载克宁不能罢会稽之戮故将体刚柔而立本法震曜而崇威一戎而?县平四罪而华夷服然後黄旗大辂诏殊号於圆丘电转云迴奏玄符於孝理天下黎人知四海之安乐寰中殊域奉三宁之康泰德兼祥风洒道与和气游不言而大宝用贞无事而元功有立舍彼代也其谁与哉若夫应运而生继天而作鼓动千载之下超腾百王之上遂能发轩庭之景曜蹶隋运之颓风揖让而取文明指麾而清函夏则我皇唐得之矣高祖以黄旗锡瑞静云火之横氛太宗以赤羽登期补星辰之絶缕授瑶图於斯邑代璿历於均台人更三圣道昭千古於是俛临睿极趋四荒於凤阙之前端委庙堂调万国於龙轩之下八鸾徐动顿汤文於後尘九骏长驱伫尧舜於中路邦家之具得矣易简之业存矣犹有朱蒙戾俗违光蓬艾之间青激遗眦假气陶钧之内背熊山而构虐拥狼潭而稽诛窃瀛海之风波弄乾坤之纲纪汉图西返惟收五都之名魏律东穷未出三韩之险奸谋蓄於有渐逆节成於不悔长蚊蚋之雷霆附豺狼之羽翼岂知夫至人无外抚天下以为家真数有归吊羣方而罪已三门遯甲黄公成不战之师五垒神兵玄女下先登之策肃牙璋而按律辉旄节而分麾降南宫之元老裂西营之毅卒良将首路偏戎竟野轴轳万里旌旗四合金箱玉匱司空凭首胜之威鸛视龙趋将军仗万全之略负鰲丘而峻壁据鼇壑而深沟一鼓而亭塞无尘七纵而江山失险伐罪以明而不以衆怀远人於絶境均惠化於殊隣登若木以照临折红桃以延伫然後分州列镇对明月以收营返旆旋戈部玄云而振旅望神都而献捷仰灵社以书功辛亥谒於昭陵癸丑告於太庙时乘黑帝月旅玄枵大唐有国之五十一年皇帝有天下之一十九载也元恶既殄万宇清矣元勲既辑万宝成矣以为周郊上帝裁延肃慎之宾汉礼甘泉未拯朝鲜之乱想玄功而反侧奉先旨以迟迴思答上灵之心以洽庶黎之望爰考古日遂净行宫有司具典乘輿乃出抚玄蚪戴翠凤翬鼓按节鲸钟疏响千乘岳动万骑林回星陈而天行雷震而雾合是时未登夫泰坛也乃斋帷宫宿帐殿华盖移影鈎陈从蹕千营夕布亘苍野而烟凝万幕宵悬背黄闐而雾列既而屏翳清晓飞廉警旦孙叔奉饗王良聳策云藏星謚宇旷山明旌轩具照箫笳互凝陟名岳以告成历神丘而展事国容象物而动朝章视令而肃宸仪有睟虚徐大帝之庭列侍无譁髣髴华胥之国於是袞袞服戒俎豆端瑞班俨华旒乐悬六代礼备三古奠惟苍璧籍用白茅鸣孤竹之箫管奏空桑之琴瑟感格以诚不以事动植咸驩敬神以道不以华天人合应然後驻声名於上邑反文物於仙宫因雷雨而作施法云天而用响风行电举未注景而浹九埏野忭途歌不崇朝而晏六合我之玄极孚矣我之能事毕矣趋帝寰而振足越皇衢以骧首不其休哉虽睿化无方比神图而絶唱而小臣不佞抚洪笔而当仁敢作颂曰

辽河巨浸碣石危峯城分玄菟塞接黄龙凭遐作梗恃险忘恭人残鬼哭主闇臣凶有晋不纲戎麾内逐帝隋失御皇輿外鹜九县尘征三灵雾黜长兹下慢逋我天戮五材无陨千龄有圣武创元基文清宝命波恬四海明宣七政息衆以宁绥荒以令飞龙继迹鸣凤重光遂均夷夏迭用柔刚戈船泛月剑骑横霜风驱海石电扫辰阳帝师无战神兵有伐丞相陪麾司空伏钺危云旦起长星夜发万垒争屠千城自蹙功超薄伐义极兼该殊方底定善阵徐迴归俘献捷课绩分材建侯清庙偃伯灵台考事龟谟凝清凤展仰观俯察享神作祀道则推天功非在已丰隆旦出招摇夕指神坛岳立斋馆云深釜旗晓引葆吹晨吟山明野彻日降天临锵锵盛服肃肃珪簪俎豆毕陈笙鏞间抚玉觴分献金罍畅矩青帝鸣琴朱灵会舞上和下悦神歆神聚

收驩巨野反旆灵躔思周宇宙乐极寰埏德因时立颂以词宣帝之功也臣何饰焉

王子安集卷十一

卷十二

钦定四库全书

王子安集卷十二

唐王勃撰

颂

九成宫颂【并序】

臣闻在天垂曜璿宫列乾象之墟在地班形珠阙镇坤灵之野泊夫三精辘运即寥廓而为宫九圣旋游遍洪荒而可宅则有瑶房玉室崑山分大帝之庭金屋银台沧海濯玄元之宇岂非神明其道骋仙轡於无垠浩荡其居示清都於不宰若夫扃牖六合奔走八神占日月而揆山川驾陰阳而法天地非圣人其孰能与於此乎至若文开遯甲仇峰城苍后之躔乐奏钧天峒岭驻黄轩之驾业融环堵下姑射而寻真道济岩廊望衡山而展事斯则三阶遍下唯临布政之宫六位时乘未及巡方之馆其後两龙齐鹜抗琼闕而同嬉八骏高骧指瑶池而结兴殷风不竞砂丘雄别馆之娛秦道无章云阁徇殊庭之赏於是功亏大壮颂阙祈招丰屋同忘危輶继及遂使来年侯迹名山为纵观之場并海遵河沃野尽行宫之地皇天震怒於上苍黎眈恻哭於下土其有斟酌千古文明一代蒿官不陋茨山可仰祈诚东岳唐帝复衢室之尊用飡西岐天子合钧台之运得其道也盖有存焉国家梯霄架极罄域裁基纂高邱白云之胤郁函都紫气之兆宸扉既辟一宇宙而来王圣籙潜跻贰乾坤而作帝高祖天旗夜立制黄马而先驱太宗日驭晨飞驂緑蟠而首出虽立极承祧之业进烛前文而重光累洽之符归功下武陛下承灵太乙踵睿登三星虹?祉电虬发庆丹书碧篆神符焕河洛之文玉斗珠衡天骨挺皇王之表用能舍桐圭而宣匕鬯肃玉籍而揖宗祧写霽九天腾景万里御风雷七曜於上博临之功显用山川六府而下辅相之宜得玄宫密运敷造化於灵襟黄屋神凝创经纶於宝思凤闈宵静陰灵宣玉闕之华鹤禁朝趋离象峻铜楼之景川分帝子控鯤壑而疏源岳动天孙拥熊山而列镇其化成也如彼其强干也如此犹乃停旒正室严紆中轩玉阶匪泰金門为险伫虹旃於月涧岳渎生光飞鹤盖於烟臯江湖动色桃溪逸彦塞丹井而归风松磴遗英斩玄关而奉制位兼河海九卿参巨济之功道合星辰三事郁经天之象朱轡緝化泣故老於中溪墨綬宣风绕春童於上陌王化之基已洽天工之代有序建铜仪而测曜象纬齐悬按璿玑而书云祲氛叠举祥飏十二紫鵷调夏谷之音大礼三千赭虵应黄钟之曲蚕功顺令业着於青裳蜃磨迎春恩周於黛耜黄砂静瀝爽鳩兴顿足之悲丹石销冤神獬辍推锋之计咏时和於帝壤动植咸驩歌道泰於华封昆虫自乐星墟列将辉玉节而长驱天策神兵下金坛而决胜横磨赤坂葱山成不战之郊命繳青丘桃野见其亡之兆烟驰火徼励珠产而移琛雪鹜冰洲驾瑶谿而纳賚乾坤径复载遵赤县之封曦望环周末出黄图之域故夫含吐万物至功也制平八表大业也一陰一阳神道也乃文乃武圣图也用能使天不爱宝地不藏珍日月五行风云四序龙章凤彩舄奕於郊墟黄铉紫玉磊砢於垺圉集风云於翠簷浴甘露於朱英泽马飞鑣山輿

结辙殊徽狎至祥书竭东郭之毫累译同归朝册尽南山之竹然後瑶坛备物陈帝服而展皇仪石室畴庸登太山而小天下功弘事毕狭广宙而三迁风举云摇历神都而一憩考遗基於汶上稽典故於淹中光总章之瑞纪嗣乾封之宝历大矣哉昇中作睿握四海而为尊则大斯模肇三宫而配永凭太室而高视灵坛八百坐明堂而恭已诸侯一万时既贞矣襄城辞访道之游功既成矣玄圃顿寻仙之驾繇是南宫奏议和玄禁而成章西土讴歌指皇舆而伫眷咸以珍台靓穆阳灵开避暑之宫清序钧调景福制追凉之殿然则高栋深宇威神之大节也顺气发生巡游之大功也况乎石城金室偏兴井鬼之区珠藪瑶池宛在秦幽之境应雷駟而出豫苍帝其时囿炎馭而思和朱明不远虽途吟野忤黎元忻望幸之符而屈已从人天子下劳谦之诏候离局而从宴尚惕三危清近县而移銮犹详再驾以为三十六所帝刘非舜禹之心四十二宫全赵异成康之历咏荆台而夕厉思蒲坂而晨凝方奉後天之期俯顺观风之请万灵禋祀三辰合庆姬文考筮容成奏日千旌凤转俨镂象而星陈万骑龙嘶伐灵鼉而晓彻静帷宫於綠野肃帐殿於黄街奔欐枪而走陆梁陈浮灵而候明月前驱电竦下列缺於腾鞭後乘雷惊起丰隆於骤轂琼戈昼洒太阳疲转日之锋玉剑宵翻悬象睹冲星之气天旋雾散岳运川回林兵护野方神启路黄麾紫盖襍精气而西浮云动神行背封峦而右指吐雾驰风以臻夫九成宫礼也尔时峰横地乳景戴天麋分闾井而图基?秦星而耀址灵墟宝藏代兴汧雍之间峻阜长岑叠镇岐梁之域丹溪碧洞吐纳虹霓偃柏丛篁腾迁雨雾获秦余於故兆地拟林光访周旧於遗风山连水泝前趋剑栈玉垒千寻?望斗城金墉万仞架陰丘而北走境瞰鄜祠分沓嶂而西驰涂交陇坂仙都密迩犹连上苑之局灵宫岿然直透崇冈之曲即桥基於礪道利在斯干因拱木於虞衡规同匪日弥峰跨谷层城万转历险乘危回廊四注山只尽石出微道而终年风伯羸粮半长途而中宿架千楼而?极烂若神扶罗万户而窥天巍如化立离堂早照皦日笼光於綺寮合殿宵深归云纳影於重庑珉房砥室画拱相望綠岫红岩雕栊间出玄熊蛭?俯栋宇而危心青鸟归飞仰灵轩而坠翼转飞檐於秀嶠上出重冥?反宇於回谿下临无地红葩紫葍垂倒井而披文金鎖银铺接重局而炫色俨鈎陈於汉陌泰阶非远设陛戟於烟庄仙梯可陟华璫璧散挂明月於崇朝密网珠连落奔星於已曙丹梁发秀彩沓虹文皓璧凝鲜光含蜃气铜龙对溜接飞泉而瀑流铁凤连蕤遡还飈而伫立虽南躔统序北室开荣凜劲气於丛檻起凄风於洞穴踰乌失轡出涧户而无光金兔低轮下山扉而变色陰庭阻夏祝融无窃据之因邃屋乘春颺颺定忘归之策飞廉扣响赴北阙而神寒屏翳收津局南端而股战苍苍八桂白露为霜落落千松玄陰昧景金人列陛来危砌而思褰玉女窥牕伏增峦而请纓阳秋代驾不凋仙圃之华天地为鑪未解幽陵之冻至若气清乾步景霁山维栖翠霭於崇荣列朱霞於复榭琼枝累道移綴文?碧树周阿光摇镂檻静帘帷而洞启穆羽相和肃坻墀而天临纖尘不动宸仪有睟蓬萊与城阙俱荣羣后多欢薜萝共簪裾合赏岩花落砌綴龙宸而成文嶂叶交轩拂鸾旗而追影鑪峰转霽香传玉几之风石瀨鸣湍响入铜壶之水乃有陵阳驾鹤奉丹墀而称臣子晋吟鸾下青蒲而谒帝箕精失耀傳說恭命於东厢?宿低芒庭坚奉职於西序三台九署云端极目霓裳风?阙下相寻张良卧疾攀赤松而有地綺季来朝歌紫芝而忘返若夫功成盱食道济宵衣汉宫追听览之余尧殿得巡来之隙霞登月憩光睿幸於彤闈玉振金声藻宸章於翠掖洛阳才子承闲尽宣室之谈蜀郡词人还奏动甘泉之赋复有轩庭十四出桂闥而乘茵永巷三千望椒涂而奉币翊鸾台之广宴扈鸳砌之仙游罗綺芳兮四面春环佩鸣兮九重暮风闺夕敞?少女於歌筵月幌宵朧下嫦娥於舞席玄房埃宴云姬辞豹尾之欢绀幄承顏星媛入鱼鳞之戏若乃屯营栢比対合道而斜趋廨寺碁分混文昌而外属

周朝瑞鸞声参叶律之宫陈宝鸣鸡响杂司晨之序名都广会间阎万室帝籙仙垣亭臯千里山村野塾家连菌草之园谷饮川居户有桃符之水故夫恩加草树囿原泽而无私道被翔行苑山川而不禁每至旻天戒序高风啸律虞官献秋猕之仪司马奉梁鹇之典将军布卒略玄灞而东驰都尉关营绕黄山而北睇於是逢蒙列阶蚩尤并穀材官发射期门走仞仗玄麾而直指鸛视千羣奋朱鬣而横行龙骧万计层旗广旆出宇宙而三驱叠鼓鸣钟连雷霆而一呼前旌逐日夸父断黄河之流後骑超山共伯挟崑仑之柱近陵吐焰縶奔电於长锋灌莽生尘隕飞霜於劲鏃合戈鋌而照地猛兕知穷振罟网而笼天腾龙失据崩林磔石毛羣无挺险之资?泽风山羽族落垂云之影长围躩蹀得骏马於秦垧大辂徜徉载飞熊於渭浦然後还师振旅考事陈功皮轩按节牙璋复路视余生於大野誓广校於长阪班腥於馘薛之墟有蜡於长杨之馆命奔蜂而举醕火照甘泉总轻骑而行庖云惊上路声兼万龠歌钟空广乐之庭礼被三雍玉帛尽涂山之会龙胎凤卵入禹膳而调芳石乳琼浆委尧樽而湛色恩沾下帛宴液仙宫虽大夫思濯鵠之欢而天子可回鸾之奏然後拜厘清庙考德斋宫用玄工而不有宅太虚而无迹动崇易简规万祀而化黄金道贯幽明徵百灵而响丹甌得玄珠於舜海尚警冰危朗天镜於尧仪犹勤日昃?恭上帝东朝悬待谏之旌清问下人南面听登闻之鼓则有郊童俟蹕敢让天师野老排闥唯歌帝力风行比屋忠臣收折檻之谋化溢康衢良使息埋轮之请设神规而动俗庶绩其凝握元符而发祉殊方合应华胥已泰济羣生於不死之庭间阎可观致仙历於无穷之境荡荡乎发育万物而显诸仁洋洋乎包举六气而藏诸用均两仪而得一耻三皇而不四者矣臣勃东臯贱节北臯幽姿常叨召见之恩骤玷明?之列书生谒相望阙推轮下客游梁荣参赐帛终童立志空投函谷之繻马令同时未给尚书之笔虽玄机妙键已寂兆於忘言而咏德陈功请追声於匪颂其词曰九门浩荡三山超忽帝坐金房仙成玉阙浮丹丽紫栖霞冠月真匠难徵虚谈易越【其一】

旋窥凤纪极睇龙坟层巢化没上栋爻分茅宫蔽雨松殿来云犹迷匪陋尚缺斯文【其二】

道伦明一风迁继五礼讚三宫诗歌百堵黄图未洽紫庭无辅局促墉垣逡巡度矩【其三】

盛衰环袭冲盈舛骛璿宇夏关瑶局殷树奢穷地络毒流天步相日遄奔寻云速仆【其四】

灾延六国运逼三川分雄竞侈礼僭图全飞薨月径列庑霞阡乾谿败楚碣石亡燕【其五】

阿房秦构文轩五里建章汉立仙闕万庀诡代齐泾违天纵已望夷有衅甘泉不祀【其六】

宛郊嗣籙譙乡警衆蜀跨梁岷吴吞楚梦相宜裁轨崇楹累栋云阙同华泉台罕共【其七】

晋图终否胡风肆极雾黥丹圉尘埋紫域皇阶不守帝庭无色帟殿相临璵墙间饰【其八】

南承有宋北泊亡随功慚户牖守在城池楼船水觜车阵山窥吴庭再毁代鼎三移【其九】

火德初融江阳振旅奄收淮船遂朝吴渚象错骄秦龙舟坏楚雄图乃溢倾宫不处【其十】

海岳呈华风雷写庆剪诸戎首光我灵命紫气云蒸黄星月映轡商为业遵唐启圣【其十一】

景闕丹绳祥抽翠籙格天垂范模神鹞躅朱极重光黄离继旭道清金镜时和玉烛【其十二】

徵规凤闕毓训鸾闱桐宫宿列桂邸霞飞台精变道岳耀裁几朝盈振鹭境比驯翬【其十三】

武韬弓矢文经步骤爽鳩议狱龙师掌奏玉帛华夷提封宇宙译书岁欸祥图月凑【其十四】

帝功得一乾元用九镂玉天齐涂金社首神京四邑明堂八牖燮而可大为而不有【其十五】

璿宫望幸幸封伧悦伺隙披图乘时徙轍赤駟俟驾苍虬按节月车宵移星闾晓列【其十六】

方神护野岳将清涂回麾峤路逗謁山枢千灵电骛万辟风趋钧台有问峒岫无虞【其十七】

五城分秀双岫抗影画拱弥峰雕甍亘岭烟闺夜谧云房昼静竹殿栖寒松轩秘景【其十八】

紫庭晨御彤闱早辟天子凝旒辟公奉璧薜萝齐致簪裾混迹仙鹤随轮灵鳧坠舄【其十九】

风扃濬敞震廓藻邃玉网星开金铺月坠山楼兽矫云台乌次复嶂披丹回流转翠【其二十】

仇夷圣宅姑射神心乐翔丹凤使引青禽羲坛叶暗禹洞花深沼分瑶水苑跨珠林【其二十一】

顺时宣节分戎讲将星骑朝飞云罗夕张宝鸡获祉非熊入觐驾掩岐蒐礼高秦望【其二十二】

酆庭未远涂山有戮襄野迷轩清都宥穆罕夷乾步徒丰帝屋光总大猷允归天禄【其二十三】

命官垂训灵台韵雅功映寰中颂流天下皇图已泰鸿笔难假帝有力焉恶非能者【其二十四】

王子安集卷十二

卷十三

钦定四库全书

王子安集卷十三

唐王勃撰

碑

益州夫子庙碑

述夫帝车南指遯七曜於中阶华盖西临藏五云於太甲虽复星辰荡越三元之轨躅可寻雷雨沸腾六气之经纶有序然则抚铜浑而观变化则万象之动不足多也握瑶镜而临事业则万机之凑不足大也故知功有所服龟龙不能谢鳞介之尊器有所归江汉不能窃朝宗之柄是以朱阳登而九有照紫泉清而万物覩粤若皇灵草昧风飏受河洛之图帝象权舆云凤锡乾坤之瑞高辛尧舜氏没大夏殷周氏作达其变遂成天下之文极其数遂定天下之象衣冠度律随鼎器而重光玉帛讴歌反宗禋而大备泊乎三川失御九服蒙尘俎豆丧而王泽竭钟鼓衰而颂声寢邵陵高会诸侯轻汉水之威践土同盟天子窘河阳之召三徽制度乘战道而横流千载英华与王风而扫地大业不可以终丧彝伦不可以遂絶繇是山河朕兆素王开受命之符天地氤氲玄圣举乘时之策兴九围之废典振六合之颓纲有道存焉斯文备矣夫子姓孔氏讳丘字仲尼鲁国邹人也帝天乙之灵苗宋微子之洪绪自玄禽翦夏浮宝玉於南巢白马朝周载旌旗於北面五迁神器琮璜高列帝之荣三命雄图钟鼎冠承家之礼商丘诞睿下屬於防山泗水载灵遥驰於汶上礼乐繇其委输人仪所以来苏排祸乱而构乾元扫荒屯而树真宰圣人之大业也若乃承百王之丕运摠千圣之殊姿人灵昭有作之期岳渎降非常之表珠衡玉斗徵象纬於天经贊据龙蹲集风云於地纪亦犹三阶瞰月恒星知太紫之宫八柱冲霄羣岭辨中黄之宅圣人之至象也若乃顺时而动用晦而明紆圣哲於常师混波流於下问太阳亭午收燭火於丹衡沧浪浮天控涓涔於翠渚西周捧袂仙公留紫气之书东海捩衣郯子叙青云之袂接輿非圣询去就於狂歌童子何知屈炎凉於诡问圣人之降迹也若乃参神揆训録道和倪辱太白於中都绋乘黄於下邑湛无为之迹而衆务同并驰不言之化而羣方取则虽复霓旌羽旆齐人张夹谷之威八佾三雍桓氏逼公宫之制泊乎历阶而进宣武备而斩俳优推义而行肃刑书而诛正卯用能使四方知罪争归旧好之田三家变色愿执陪臣之礼圣人之成务也若乃乘机动用历聘栖遑神经幽显志大宇宙东西南北推心於暴乱之朝恭俭温良援手於危亡之国道之将行也命道之将废也命归齐去鲁发浩叹於衰周厄宋围陈奏悲歌於下蔡圣人之救时也若乃筐篚六艺笙簧五典折旋洙泗之间探蹟唐虞之际三千弟子攀睿化而升堂七十门人奉洪规而入室从周定礼宪章知损益之源反鲁裁诗雅颂得弦歌之首备物而存道下学而上达援神叙教降赤制於南宫运斗陈经动玄符於北洛圣人之立教也若乃观象设教法三百八十四爻四十有九穷神知化应万有一千五百五十有五成变化而行鬼神观陰阳而倚天地以鼓天下之动以定天下之疑索衆妙於重玄纂

羣微於太素聖人之贊易也若乃靈襟不測睿視無涯石磬昭集隼之庭土缶驗羶羊之井稽山南望識皓骨於封禺蠡澤東浮考丹萍於夢渚麟圖監遠金編題佐漢之符鳳德鈎深玉策筮亡秦之兆聖人之觀化也時義遠矣能事畢矣然後拂衣方外脫屣人間奠楹興夕夢之災負杖起晨歌之迹撓虹梁於大廈物莫能宗摧日觀於魯丘吾將安仰明均兩曜不能遷代謝之期序合四時不能革盈虛之數適來夫子時也適去夫子順也為而不有用九五而長驅成而勿居抚云霓而高視聖人之應化也自四教遠而微言絕十哲喪而大義乖九師爭大易之門五傳列春秋之輻六體分於楚晉四始派於齊韓淹中之妙鍵不追稷下之高風代起百家騰躍攀戶牖而同歸萬匹驅馳仰陶鈎而共貫猶使絲簧金石長懸闕里之堂荊棘蓬蒿不入昌平之墓聖人之遺風也遵揚十聖光被六虛乘素履而保安貞垂黃裳而获元吉故能貴而無位履端於太極之初高而無名布政於皇王之首千秋所不能易百代所不能移萬乘資以興衰四海繇其輕重虽復質文交映瞻禴祀而長存金火遞遷奉琴書而罔絕盖易曰觀乎人文以化成天下又云聖人以神道設教而萬物服焉豈古之聰明睿智神武而不殺者夫國家襲宇宙之淳精据明靈之寶位高祖武皇帝以黃旗問罪杖金策以勞華夷太宗文皇帝以朱翟承天穆玉衡而正區宇皇上宣祖宗之累洽奉文武之重光稽历數而坐明堂陳礼容而謁太廟八神齊飨停旒太史之宮六辨同和駐蹕華胥之野文物隱地声名動天樂繁九俗礼盛三古冠帶混并之所書軌八紘閭閻兼匝之鄉烟火四極竭河追日夸父力盡於楹間越海陵山豎亥塗穷於庀下薰腴廣被景贖潛周乾象着而常文清坤靈滋而衆寶用溢金膏於紫洞雨露均華栖玉烛於玄都風雷順軌丹萸翠菌藻繪軒庭凤彩龙姿激揚池籞殊徵肸蠭不召而自至茂祉昭彰無幽而不洽虽復帝臣南面降衢室而無為岱畎東臨陟名山而有事靈命不可以辭也大典不可以推也繇是六戎宵警橫紫殿而撓金五校晨驅蹴玄云而噴玉星羅海运岳鎮川渟登碧墀而會神只御玄坛而礼天地金箱玉冊益睿算於無疆玳撿銀繩署靈机於不竭功既成矣道既貞矣历先王之旧國懷列聖之遺尘翔赤驥而下云亭吟翠虬而望邹魯泗濱休駕杳疑汾水之阳尼岫凝鑒暫似峒山之典乃下詔曰可追贈太師托盐梅於异代鼎路生光寄舟楫於同时泉涂改照咸亨元年又下詔曰宣尼有纵自天体膺上哲合兩儀之簡易為亿載之師表顧唯寢廟義在欽崇如聞諸州縣孔子廟堂及學館有破坏并向來未造生徒無肄業之所先師闕奠祭之儀久致飄零深非敬本宜令諸州縣官司速加營葺九隴縣學廟堂者大唐龍朔三年鄉人之所建也尔其州分化鳥境属蹲鸱紫錦室於中区托銅梁於古地玉輪斜界神龍蟠沮澤之云石鏡遙臨寶牒秘禹山之影天帝會昌之國上照乾維英靈秀出之鄉傍清地絡庠序繇其糾合纓弁所以会同文翁之景化不渝智士之風猷自遠於是雙川旧老攀帝獎而翹心三蜀名儒想成均而变色探周規於旧宅詢漢制於成都開基於四會之躔授矩於三農之隙土階无級就击壤於新歡茅茨不剪易層巢於故事庄坛文杏即架椽栳樊谷幽兰爰疏戶牖儀形莞尔似聞沂水之歌列侍閭如若奉農山之對緇帷曉辟橫紐帶於西河絛帳宵懸聚青衿於北海虽秋礼冬詩之化已洽於齊人而宣風觀俗之規實歸於上宰銀青光祿大夫譙國公諱崇義大武皇帝之支孫河間大王之長子高秋九月振玉贊於唐丘寶算千齡跃璇蚪於大渚我國家靈命東朝抗裘冕之尊宗子維城南面襲軒裳之重折玄元之胤緒拥朱虛之祿位拜玉節於秦京輝金璋於蜀郡玄机應物潜銷水怪之災丹筆申冤俯絕山精之訟魏文侯之拥簪道在而謙尊董相國之垂帷風行而俗易司马宇文公諱純河南洛陽人也皇根帝緒列五鼎於三朝青琐丹梯跨千尋於十紀仲举澄清之轡未極夷涂土元卿相之材先登上佐水壺精鑒遥清玉垒之郊霜鏡悬明下映金城之域县令柳公諱

明字太易河东人也梁岳之英长河之灵沐云汉之精粹荷天衢之元亨旌旗赫奕於中古珪组陆离於下叶凤岩抽律擢层秀於龙门骊穴腾姿吐荣光於贝阙自朱丝就列光膺令宰之荣墨绶驰芬高践郎官之右仙臯旦举影入铜章乳翟朝飞声含玉轸临邛客位自高文雅之庭彭泽宾门犹主壶觞之境旷怀足以御物长策足以服人重泉之惠训大行单父之讴谣遂远犹为夏弦春诵俗化之枢机西序东胶政刑之根本上祇朝宪下奉藩维爰摛复庙之仪载闡重栏之制三门四表焕矣惟新上哲宗师肃焉如在将使圆冠方领再行邹鲁之风銳气英声一变賁淪之俗於是侍郎幽思摛凤藻於瓊林丞相高材排龙姿於璧沼遗荣处士开帘詮孝悌之机颂德贤臣持节听中和之乐其为政也可久其为志也可大方当变化台极仪刑万宇岂徒偃仰听事风教一同而已哉勃幼乏逸才少有奇志虚舟独泛乘学海之波澜直轡高驱踐词場之阡阬观质文之否泰衆矣考圣贤之去就多矣自生人以来未有如夫子者也嗟乎今古代絕江湖路远恨不得亲承妙旨摄齐於游夏之间躬奉德音攘袂於天人之际抚身名而永悼瞻栋宇而长怀呜呼哀哉敢为铭曰

五帝既没三王不归天地震动陰阳乱飞山崩海竭月缺星围礼乐无主宗禋遂微【其一】

大哉神圣与时回薄应运而生继天而作龙跃浩蕩鹏飞寥廓奄有人宗遂荒天爵【其二】

尼山降彩泗滨腾气志匡六合神经万类夹谷登庸中都历试睿情贯一玄猷絕四【其三】

栖遑教迹寂寞河图违齐出宋历楚辞吴风衰俗毀礼去朝无麟书已卷凤德终【其四】

杳杳灵命茫茫天秩吾道难行斯文易失式宣六艺裁成四术虚往实归外堂内室【其五】

邈矣能仁悠哉化主力制羣辟权倾终古陆离彩灿蟬联茅土涉海轻河登山小鲁【其六】

皇家载造神风四极捡玉题祥绳金署德聿怀圣迹同享天则乃眷台庭爰昇袞职【其七】

玉津同派金堤茂版智士高风文翁泽远毗淳壤沃声和俗愿载启仁祠遂光儒苑【其八】

沉沉壺奥肃肃扃除灵仪若在列配如初槐新市密杏古坛疎楹疑置奠壁似藏书【其九】

泛泛寰中悠悠天下徇名则衆知音盖寡硯石参琮迷风乱雅仲尼既没夫何为者【其十】

彭州九陇县龙怀寺碑

粤若真元混沌抱一气於天门象化童蒙构三灵於地户繇是金城逆顺山河假成器之因玉烛沉浮风火兆流形之蘖悬大明於日月适滯泉宫设巨浸於云雷终迷毀宅太极所以散而为两洪飈所以吹而为万虽复卑高异列俱沉方内之游坳集横流共失寰中之契岂夫湮盘深视不背色以求真般若长驱每乘空而得静则知一名同出陰阳为破道之墟万象皆空天

地即降魔之境莫见其俯仰不知其去就至自於太虚复归於无物其建言立德开业成务握大柄而推造化执洪鑪而诰元始四门幽辟顾非相而迟回三驾晨严临有为而出顿岂不知羈孤长路终婴旅泊之虞舟楫中流未释风涛之苦将以宅心者寂虚室所以合符应物者神明镜繇其不倦故能商榷宇宙指麾权实演羣生而非其力存庶品而非其有千峦闭景似居蓬艾之间双阙临空若在江湖之上其释迦之冲用乎龙怀山者井络之所交会岷隅之所控带攢峰北走吐香嶂於玄霄巨壑南驰歎洪涛於赤香城宝地左右林泉碧岫丹岑往来烟液时有法会禅师者俗姓楮氏吴郡钱塘人也金章锡美河陰传九命之尊玉铉乘荣江左受三台之贵地灵人杰自朝野而重光学府文宗冠南都而独秀法师紫星降彩红云受气应积善於高门契冥缘於累世果浮觞引潜图彼之功聚砾延砂即揆为山之业灵枢密运辟仁路而长鸣慧刃高挥斩邪关而洞照以为冥机体化毫髮莫滞其真执数逐微乾坤不容其算於是四禅幽观破铜堞而出无明三昧雄图排铁围而泯非相法云自在吐纳龙宫贤圣不仁奔驰象域将使三千塔庙知真实之玄津万亿幡幢入空虚之秘藏安心乐土遯影灵关以开皇元年憇于兹岭灵墟福地已被神功玉牒金绳未光朝命蜀王秀以文昭建国帝子专征仗巴服之尊名裂叩荒之宝命彤駢僭帝躋万骑於铜梁阜盖图王警千乘於玉宇镜山南望志狭彭渝锦水西浮耻朝江汉开实沉之壁垒啸京叔之风尘拥龟堞而托殊方凭爵堂而傲天子威权所制胜兵数十州雄视所临经涂五千里三英赋雪瞻秋月於梁台八叟吟风传朝云於楚馆思弘正法广召名僧振锡云趋乘杯雾合禅师括囊泉石韬迹烟霞攀紫桂而同尘守青莲而向晦冲飈荡岳宁移忍地之灵烈火焚山不挠坚林之色王心有悟时加优礼顺风拜道封山谢失发净财於广内揆仙室於重幽因嶂为壁凭嵯列户以开皇五年始赐额为龙怀寺地邻緜左遂均緜上之恩山似龙盘即建龙怀之刹尔其崇峦经复复礧紫回高丘泄云长林翳日增琼垣於下麓揆瑶构於中岩香阙神行珍台妙立玉蚪衔霭絕游气而负苍天金凤连薨排烈风而瞰玄圃延緑房於叠巘上拂霞庄蔓丹阙於重磎下披泉户阳开陰闔变霜露於旋回螭动螟飞起雷霆於指顾玉堂朝亘影袭长虹珠殿宵浮光含列宿禅师歿後爰有孝恭法师智开法师弘向法师宝积闍梨四上人者并禅师之上足而法门之领袖也五明衢路控引情宫八解源流朝宗性海其深为宝投白玉於崕岩无碍居真得玄珠於象罔住持真界栖息妙涂俱探寂灭之源各证菩提之域虽业定人境照已极於无方而道寄生成功遂覃於有相演中乘之奥义增上栋之宏规万栱不蹇千门有阔俄而帝隋大去皇家小往天地闭而贤人隐云雷屯而巨宝衰毒龙横雾四天沉暗逆之悲醉象驱风三界溺崩离之酷上人慧机幽晤定识潜融知佛日之恒明审王风之尚静芝歌商岳揆鸡岭而同归茅藉磻溪与猴江而共致遯俗无闷因时有待泊丹陵启秩赤县居尊迦维授手波旬革面十千天子新朝帝释之宫八万仙人始向毗耶之国一音演而荒景服三圣澄而礼乐备繇是巴方旧彦蜀城遗老仰慈门而知户牖升福田而喜畊凿雕鞍绣辔瞻鸞鹄而驰魂黼带縵裾指鸚林而驚歎宝瓶宵注润浹尧旬玉塵晨麾风调舜历咸以为假沉其性迷生安视聽之功动乱其心穷子失肌肤之恋江连巫峡始绊心猿山对禺同终维意马贞观年中积闍梨等乃宣昭遗址发挥精舍容成校历揆日用於天经隶首陈章算神功於地籙回廊?篠自吐风飈列榭峥嵘坐含云雨图碣宫之妙质俨庐舍之真容宝珠周映银龕备色逸多垂足似临兜率之天师利分身若赴维摩之境灵仙可接藻绘无施真应难微雕镌有寄若乃巡积岵历森沉天花照而高月落地籟惊而幽泉涌紫兰花径香侵柏叶之鑪緑草纹茵影入芙蓉之座真童凤策即践金沙仙女鸾衣还窥石镜岩庄转梵杳冥松桂之墟礧石栖樺寂寞藤萝之院法鼓奏而寒山旷洪钟鸣而晓壑静

頽苔翠蘚具不尽之灵衣石乳琼浆入无生之妙饌肃肃焉遥遥焉信调御之珠庭而列真之甲第也爰有上座玄鉴法师等并六尘无我四谛非他奉乾越之微言守楞伽之奥府法雷潜吼鼓动风烟慧日扬明照临丘壑青汉坐定见心宅之恒灵丹洞行忘觉身城之每化须弥不动迴镇阎浮闍崛安居下观切利开四生之广路叙六趣之彝伦足以遵扬真绩恭宣来命者矣县令柳公讳明献字太初河东人也太玄降气中黄授彩袭周鲁之荣基吐河汾之灵液四科高第振风翮於三冬万室崇班局云骖於百里既而政成黎颂道洽毗讴假无上之幽筌毗不言之景化弦歌在韵将宝偈而齐归铜墨成章与梵天而共贯琼波湛淡沃荡云雷珠灌萧条蔽亏烟雨贞机罕应良谈於好事之游朗调多奇高赏尽名山之曲下走东臯事失南州涂穷欢孔席之栖遑笑杨岐之浩荡薄游兹邑喜见高人三接而定琴樽七纵而擒风月林宗有道相期清浊之间平叔能言见许天人之际从容宴语契阔胸怀欣性情之同冥感形骸之共遣虽玄都妙域已贵於忘言而义塾文场窃申於知己敢作颂曰

妙象无倪神功有涉湛淡名器崩腾事业慧路翹车禅河?戢控引羣品轮回庶劫纵横宇宙反覆山川言因境立道寄形詮爰稽福地式揆珍田丹溪漏日碧洞栖烟闍都玉檻须弥石室榛灌溟蒙风云萧瑟睟容乃眷禅徒有謐叶磴三休花岩四密崇峦架殿叠嶂营楼千楣凤起万拱鸾浮星开绀髮月湛青眸神宫不夜邃阁长秋户临重嶂牕分絶岭半汉香浮中天梵警鹤林圣迹龙泉佛影鸟思山空猿悲峡静森森巨柏落落长松月出东岫霞生北峰山人自狎野老相逢白云屡断青溪几重彭泽之令临邛之客比德山藪重规泉石法宇成言慈门致役糠粃吏隐薜萝心迹吾生扰扰与道遑遑殷勤颂咏惆悵津梁投功翠碣助化玄场百年之後苔蘚苍苍

王子安集卷十三

卷十四

<集部,别集类,汉至五代,王子安集>

钦定四库全书

王子安集卷十四

唐王勃撰

碑

梓州玄武县福会寺碑

若夫考龙图而括运抚麟笔以伤时天地闭而贤人隐周孔逝而微言絶岂非太阶无象三辰鲜道叙之因沧海为陵百川有横流之势况乎法身长往顾糟粕以空存化迹繁流仰舟航而遂远虽复功推八正犹迷鹤树之谈道亚三明未覩龙宫之籍则有妙音难遇瞻雪岭而投躯真谛希声仰云山而破骨优填企景新雕白玉之龕般若寻风而化黄金之像三千宝座回出天宫八万珍台遥临净域非惠图之冥感孰能臻于兹乎福会寺者隋开皇中之所建也尔其峰峦地列东分井络之光楼雉云横西睹禺同之奥北弥丰邑里閤千甍南控平江波潮万里拥亭臯之絶势昇林野之殊形肇开修竹之园式揆旃檀之刹法川高辟慈宫峻敞文璫宝缀环日月於重廊翠栱丹楹起虹蜺於复殿真容俯映福衆爰依?筵交烛禅房互启山神献果还栖交露之台天女持香即遶飞花之阁轮辉夜满抽紫焰於金山毫相晨临发珠华於玉地爰有县令柳边河东令族大业之年来光上邑高人奉檄功为铜墨之先令宰鸣琴课穆弦歌之最眷香城而惻念披道肆而惊魂示怀延獎思弘末教乃於寺内起重合一所乘烟置臬揆日端绳层榭三休凋檐四注奔星挂庑混珠网而同归明月窥轩杂璫璫而共贯仍抽丽笔俯刊贞琰词源迅委振法海之波澜义宇宏深接禅宫之阃奥昔者陶潜彭泽罔闻仁祠之风潘岳河阳未入菩提之域兼其美者着在我柳君乎俄而帝隋方否三官失龙凤之图皇业未昌九野被豺狼之毒虽复餐砂茹石窥剑道而回心蜂聚泉腾指铜梁而革面自非法云西睠潜销火宅之氛慧日东来回朗昏衢之景则安能冥资福地显沮魔军波清於振壑之隅燎息於炎昆之曲泊乎大钧无事神器有归清玉户而帝寰中转金轮而王天下玄塲佛境与天壤而惟新莺树鸡林共风云而改旦功既成矣时既贞矣紫宸有裕苍甍胥悦都人狎至瞻鴈塔而欢心野老相趋寻鹿园而顿颡或至诚冥发争知不尽之虚或道恩?流竟委忘缘之施乃於寺内造菩提塑像一座实彭氏絶羣之迹洞参瑶铄体备丹青得埏范之奇模尽陶甄之能事功分实相变入冥机丹果长春青莲不染灵仪若动似临王舍城中神足疑行即坐菩提树下银牀地涌宝帐犹悬珍木天成金花不落总章元年又奉为皇帝更造八菩萨像成於净境别峻崇堂而力寄羣缘功难独举遂令衆情驰骛空怀更始之图灵座端严未得安居之地时有弘演上人自丹鸟下日昌帝籙於明堂青鹤乘霄降仙苗于大室轩冕将风云交映钟鼎与山河共远法师宿持真谛幼挺殊姿拔五翳於长驱登四禅於回观以为德因时建澄什继踵於西都

道冀人弘林远随肩於南国痛迷生之诡矫悲正觉之陵夷思欲树真气於未萌绪崇因於已往遍游净境历聘遐方至总章二年憇于兹刹身持宝印口出神珠心动巴南化行蜀右法罗潜举驯鸟性於慈林慧镜?开息猿心於定水亦有情鈎五缚遥腾解脱之川想痊六尘回拔沉迷之域名臣长者捐玉佩於银庭善女灵姬落金环於宝地贪机雾涤法施泉流林衡抡杞梓之材班匠献鈎绳之巧千栾电纠万桷霞张飞陆缘薏曾构架景琼缸杳照乘绀壁而宵分珠箔重华掩青疏而晓乱红葩植井彩缀河宫丹桂承梁香交列肆天倡梵乐肃然忉利之天藻盖琯璫焕若摩伽之殿岂精力之玄感而神化之曲成乎直岁寺主等州闾盛族鷺鹭荣因昇慧圃而功成践魔庭而战胜排四门而独往共极邦缘攀十地而遐征同趋觉路县令虞洽旌旗百代剑履三朝匡帝座而南征拥台庭而北面星像垂祉川岳载灵豫章七岁麒麟千里雄情负俗郁王佐之宏图英识迈时得公门之逸气既而拂衣华族入天邑而观光列板仙台出灵关而作宰泉鱼狎夜多单父之深恩陇翟游春嗣中牟之善政有条不紊施缓政於繁绳断讼有神下高锋於错节因以激扬大化潜滋比屋之封光启令图预积攀轮之慕县丞裴休家接朱栏誉流丹阙轩裳照绪忠孝荣门鸟鸣有伐木之歌龙文非刈蓬之具高材列务盛德分司翰墨不足留神琴罇申其徇性十旬休沐奄有泉林千里邀迎乃疲风月青骊蹀躞终喷玉而悬云素鹤徘徊具衔珠而犯露加以沉研有地题桥八解之津诱劝无方叱御三乘之路故能使幽明仰德法俗依仁攀海祗而如归挹衢罇而下瞰乡望等龟灵高族骥子名家关锦室於中堂分绮疏於甲第或望雄都鄙代列歌钟或业预云雷门藏玺诏文塲促席有江汉之英灵武观连衡得岷峨之锐气竝能驰心彼岸欲临海而褰裳投足化城下悲思而反?下官薄游江右旅寄城隅怀道术於百龄接风期於四海依然梵宇欣象教之将行莞尔公庭惜牛刀之遂屈虽文殊辩论妙悬解而忘言而伯喈雄管叙真宗而罔媿敢巡此义乃作颂云金堤迴邑玉峡长澜城阙纷乱江山耸盘云屯胜邑雾启禅坛右紫层雉左控崇峦竹园精舍檀山香合万栱腾虬千楣跂鹤晚星疎翠朝霞泛腹鼓奏泉流钟鸣霜落时经失道代历交呈神宫不挠法衆无惊金轮遽晓玉镜施明功照佛刹化被王城帝图冥运真仪濬发贝齿含星流毫推月鸟离山扃龙还海阙宝树刑留天宫匠设爰有真人式宣慈主发迹江甸驰声蜀宇望远连规攀澄袞矩力穷兴道功周廊庑羣缘肸鬻衆福氤氲丛楹列电高栋衔云银龕曙抚玉座宵分琼玊有烂藻绘多文郁彼巘邑猗欵上宰松桂连华鸳鸾集彩禅津有裕至公无待火宅可辞舟航斯在我之飘寓邈矣来游山川俯仰道义淹留承风郭外撰缀江幽玄机胜笔天地相周

梓州飞乌县白鹤寺碑

原夫玉都琼室紫垣光大帝之庭金阙银台玄壁杜羣仙之域故能使神明有宅驾日月以长驱鸾凤知归抚云霓而上出斯则曾巢瑾穴上皇迷栋宇之尊考室灵台中右识岩廊之贵然後冕旒前序提四海以为家登步大阶列千门而有闕况乎 山形见?行草昧之先德水源深光宅乾坤之右虽鹤临西閼龙宫与王法同亡而象化东流鴈塔与遗仪继起白鹤寺者盖菩提寺之余址梁武皇之所建也香城福地之旧三巴五蜀之湊裂岷山之奥域分井络之荣光西包玉垒之墟北瞰铜陵之野南扃列第门庭万家东户连峰冈峦千里实伽蓝之胜迹得迦卫之英模凭絶磴以图规俯长溪而作固自金陵不竞玉镜无章城池兴南露之悲亭障切北风之候崩山鬪水触地网而三分坠月奔星划乾纲而五裂中原错戾慈门为虎豹之墟沧海横流定水穴鲸鲵之浦怀山既荡法衆咸沦林院榛芜轩堂委寂遂使悲生弃井堙玉甃於三

泉叹积为山移琼峰於九仞皇上摄千秋之宝运绪三圣之宏机挟宇宙而先神御雷风而首出灵功不宰华夷沾共贯之恩至道无私霜露得平分之序考祲图於日慎寤寐同符稽妙册於年刀幽明合贖然後东巡巨镇追六圣而抚寰中南面天坛朝万方而小天下皇威既畅宝应齐归川岳荐灵风烟动庆丹鸟抱日疑增帝阁之华素鹤低云若赴仙庭之会昔白鱼黄竹业未峻於封崇赤鴈芝房名不登於梵宇爰徵瑞典肇锡嘉名重兴波若之台更起招提之院金绳夕布绵秀岭以开坛玉榜晨舒拥回峰而辟户爰有弘演上人者法门之秀士也行起常冻思越恒饥悲净域之为墟喜皇波之普泛纵还舟於苦海惊浪旋夷比归馭於邪山灵关非险於是净财云委真衆烟驰如趋摩竭之宫似向毗邪之国县令梁弘悦首加甄緝县丞梁敬一亲昭施典上凭天旨争开舍利之坛俯会衆心竞起须弥之座禹同故岭石鲜坚华广汉余响地多疎斥事阙经始人怀祗惧重阶不就空思天室之氓宝像无资未获黎阳之士岂非冥期肸鬻功参造化之外故能果唇间发运眸周映贝齿含滋璿毫起照三十二相临玉座以相辉八十四仪拥金山而圆立层薨四合烁奔电於丹楹复殿三休络浮烟於翠幌因高积磴疑迂倒景之台架嶮连荣似立迎风之观瑯檐竞注紫雾道以龙回绣桷争飞僊云衢而凤矫写归禽於宝镜误接朝鸾图走兽於文璫疑栖夕兔雷霆蓄泄裁临承溜之间烟雨飞浮未出层栾之下耀丹青於菌壁妙迹疑存炳铄鏤於莲龕神辉自烛锵锵櫛铎声传桂叶之风焰焰山炉气结松陰之藹仰真容於始旦满月晨昭窥列栋於方宵长虹夜发香泉激溜有符温净之池珍木成行无忝祇园之树信煦尼之别府实兜率之殊庭者乎爰友上座法师等情机藻莹戒律圆明披玉笥以研芳候琼钟而肃虑禅姿晓映依稀同鸡岫之前梵呗晨临髣髴像鱼山之曲县令独孤俭等或鹏垂待运终變道於中台或螭屈求伸且毗风於下邑乡望仪曹等或盐泉锦室家称三蜀之豪或抱朴怀仁誉拥双流之美或以为山川肆践犹纪石於弇州陵谷生哀尚沉碑於岷首况乎德因时盛庆流封拜之辰名为功登事属文明之运岂可使璿猷被物终昧變於玄机金字韬华不题勲於翠琰敢作颂曰

睿涂菌藹灵机翕忽玉架天都金裁地阙法玉利见香城继发鴈塔齐云龙宫瘞月长江近域广汉遗居禅扃共往梵宇全疎迹均梁後义切秦余山川牢落榛莽丘墟有圣聿兴惟皇降抚因天因地为云为雨日观龙骧烟坛鹤举肇开嘉号重光净土猗欤上土道場真政物观成章子来兴咏土石呈彩人灵合庆宝座晨严金山夕映紫微分殿青岑曜郭复岫荣楼攒峰跨阁月低璿镜星连宝铎彩凤将飞蟠虹未落森沉桂宇肃穆筠坛花明柳砌叶暗朱栏溪留夏雪涧咽秋湍山虚梵冷谷静钟寒法衆爰依禅徒戾止望风三蜀征尘千里顿首玄墀归心翠展业超有色功齐无始伟哉冥化妙矣能仁去来均迹前後俱身寂灭为乐般若为因题芳翠琰敢詣灵津

梓州通泉县惠普寺碑

若夫玄机默运披睿烈於三精素键潜融肇神功於万彙则有灵期肸鬻龟龙负河洛之图帝绪氤氲贤哲举乾坤之策虽功悬日月终植軌於寰中业静云雷未逃規於象外尔其译雉林之宝偈詮鷲岭之真图抽紫玉於禅山朗玄珠於智水不生不灭光临妙物之津无去无来濬发乘时之契仗三明而独运施洽平分据二帝而同归功超邃古故能使三千法界向风知衽席之师百亿大王闻道失岩廊之贵非释迦之神化其孰能与於此乎既而正法将隐微言不

嗣应身既没遗仪间起恒星夜掩西天衔风雾之悲梦日宵成东汉肃坛塲之礼繇是鹿园曾
敝象教?流宣妙獎於希夷范灵踪於显晦瑶龕宝座光华震旦之墟凤刹蜺裳斧藻阎浮之域
其寺盖梁大同年中所建地分彭蜀岭对岷峨凭广汉之遗墟籍犍为之旧壤西驰峭嶧山连
白雉之郊东赴长川江走黄牛之峡崇墉却峙之势庭衢四会胜里九曲之分间阎万积危冠
袂服参差轩盖之前露渚风畦隐軫亭臯之望是惟先镜实启香城焕若神明恍同化出绀坛
烟属疏絶合而三休紫殿云深彻回廊而四注重栾复栋雾緝霞张绣桷琯楣鸾伸鹤跂珍台
控景羲和获练轡之因绮榭裁氛屏翳得停鑣之所连薨积翠交玉鎖於星衢洞户流丹綴金
铺於月窰垂珠网露傍倾汉浦之琛列铎吟飈上合钧天之乐固以轮奐之美冠真宰以先鸣
琯范之奇告灵基而得隼乃造弥勒下生像一座相好端足华姿朗备贞观末年灵晖继发房
笼匝曜疑连不夜之城户牖皆明似出重昏之境自非理参幽赞道叶冥机宣佛镜於无方演
慈灯於已絶岂能写丹青於实相妙色长存图铄鑒於真容神光不昧若乃时暄福地低落照
於晴晖候肃禪房泛初华於霁景千千宝树若在双林一一妙香仍清八味山晖倏脱跂叶屿
而相鸣野鷺迎晨拂花帘而自乐松楹秀蔓曲成萝薜之衣砌石生莲直起芙蓉之座则有拖
身童子戾止岩扃忍辱仙人来仪礪户都人野彦希梵席而投裾赵美燕余望齐庭而继履莫
不青鳬委贯俱欣不舍之坛紫贝兼明共化无缘之力故能使琯形画塔象设年滋彩帙瑶箱
龙编月久岂西周之道备南国之风成者乎爰有寺主等覃机色外练迹尘间浴甘露於心田
集祥风於性宇栖情不二忽起初地之权授手大千犹拥弥天之具县令等或公侯百代玄貂
列駟之门或文史三冬吐凤回鸾之客铜章墨绶任切临人铁印黄簪功宣陆渐局牛烹而待
价肆螭屈以求伸挥铎九仞之隅作镜双流之外録事抑元等丹轩紫绂家传方面之勲驥子
鱼文地列膏腴之右昔承隋运屡委天书爰自皇初颶流帝礼等寶渝之奉汉类微濮之匡周
咸申白马之盟并受飞龙之托故能遗风罔坠代济其美望重西南功宣法俗咸以为弦歌小
政犹篆德而垂芳钟鼎微荣尚铭勲而作鑒况乎神威自在方传宰匠之功岂可栋宇常存不
勒山河之赞爰托幽鄙奉扬徽猷敢宣此义而为颂曰

天地定位君臣作极道在岩廊功沾寰域尚清皇盼犹歌帝力况我能仁惟神不测诞生迦室
利见王城机罩有应业会无生长驱定境振旅魔营恩兼动植势絶随迎鷺山倾仞鹤林埋景
慧日西沉慈波东骋竞窥灵相争参佛影月殿分城云龕动岭长江旧域广汉遗区川分潼峡
塞接岷渝间阎四会亭障威纒爰开宝地实控名都霞墙百雉云薨四住紫阙寻烟楨楼结雾
波流虹起雷奔螭步网罩星鹑璫栖月兔灵机藻繹禪室安闲琯金范玉举翠浮丹神宫不夜
虚室长寒光超有色觐出无端清露花径飞泉叶户礪緑苔秋山苍树古茫茫庶类巍巍浄土
鹅鹭同归华夷共聚第一义谛寥廓法门迹离生灭思举乾坤情迷则复道在为尊惟名与器
万古长存

王子安集卷十四

卷十五

钦定四库全书

王子安集卷十五

唐王勃撰

碑

益州德阳县善寂寺碑

若夫玉绳高曜分宝历於皇阶金榜洞开道璿晖於帝幄虽复苍梧北望湖湘盈舜后之歌绿苕西浮江汉积文妃之颂未有激扬烦?栖妙果於香城挥发盖纏树冥基於淨域则紫房丹室犹居毁宅之间朱绂瑶筐未出尘笼之际我国家凤翔元气驾黄幄而层飞龙跃太虚絶苍根而止僭文皇帝以八才御历光昇岱野之荣文德后以十乱乘时恭赞涂山之业握仁王之宝镜日月重光驱梵帝之金轮雷霆静祲湮盘甘露承眷而宵流般若灵音襍祥以昼引蛟台蜃阁俄交震旦之墟月面星毫坐照毗邪之国善寂寺者盖旧寺之余趾梁武帝之所建也尔其碧鸡仙宇分絶障於金堤石兔遥源控长江於玉峡封畿四会龙垧舍卫之坛里閤三分鹿野经行之地泊苍鷺上击铜马交驰祇园兴板荡之悲沙界积沦胥之痛火炎崑岳高台与鴈塔俱平水浸天街曲岸与猴池共尽山川隐嶙空传鸞岭之基灌莽萧条非复莺林之树武德伊始君子道亨正皇极而抚寰中登太阶而临天下函关云物更逢真圣之期井络星辰重集会昌之运虽开基拨乱狱讼知归而继絶兴亡经纶未暇先皇统业贞观御宸奉文物於三天布声名於十地参罗上下充橐龠於襟怀八部神只荐图书於掌握皇宝降地花昇含生无昏垫之虞法衆有来苏之望俄而後庭构庠椒房穆卜六宫震恐三灵愕眙驰瑶展帟有事於羣宗碧剂玄针无徵於衆术帝廼降监回虑屏璧与珠追胜迹於灵关事良缘於福地爰紆圣綍重啓禪宫峙璇刹於将倾镇银绳於已絶丝纶既洽栋宇行周坤德用宁陰仪再朗於是林衡授矩周官詮揆日之工梓匠挥斤荆客链成风之巧重檻画栱坐出天霄复树文闥俛临电宇显庆中县令萧君道弘理鈎绳於日用凭藻绩於天成仙官之妙匠可寻卢舍之神模不坠凋薨鹤翥曳珠网於星津绣桷虬伸吐璿璫於月径緑房丹鎖彩缀晴霞紫阁青疏光含薄雾春风琼树香飘席上之兰秋水银塘影数轩中之芰晨光转卉翻宝字之龙花潄露低枝荡真文於贝叶天童润色黄珉碧玉之坛海圣弥缝师子龙王之会建灵幢於厚夜琢饰年深悬法鼓於迷津规模岁远时又於佛堂东壁画二圣僧丹青未毕大啓神光邻玉塵之崇辉发金龕之实相朱轩夕朗似游明月之宫紺宇晨融若对流霞之阙繇是岷英蜀秀攀讲序以云趋带鸞裙鸞仰斋庭而雾合贪机大阻淨施旁流绮罗分解佩之因轩盖得捐金之所灵妃翳日舍翠幄於香筵仙客停云落霓裳於宝地自非冲姿密契景?潛周岂能昭义祉於氤氲动玄机於臍嚳者也爰有上座弘一节并沈研性符隐括仁棠凝妙律於神珠肃灵椒於宝印太昊奉檝截苦海而横流风伯扶轮历邪山而効驾腾烛龙於慧炬俯镜重昏奏鸣凤於天歌下清羣籟摩珍在握遥临七宝之宫正觉为心俯辟三乘之路湛衢鑄於忍地品藻鸡园推水砥於言河扶持

象化县令宇文某河南人也帝隋尚书之元孙皇唐侍中之令子尔其虹旗万里御六气而鹏
翻霜戟千羣拥三州而鸢视帝叶皇枝之重对越乾坤金滕石匱之功光华宇宙公上流提庆
中和毓祉见钟鼎於南邻奉轩寰於北阙云姿月步下瑶泽而追风雪羽霞翎历珠田而矫雾
芳兰公子即以地业高人幽桂王孙即以琴樽待物叙徽猷於礼乐则俎豆纵横谈赏契於林
泉则烟霞咫尺自裁声百里揆化双州收武城之故事择中牟之令典仁风易狎候丹翟於春
垆惠化难经仁青鸾於晓墅山巨源之远量啸傲行藏谢太傅之高风从容语嘿县丞王敬衣
簪旧族孝友名家白虹絨抵鹄之光紫电蓄冲牛之气七年高秀拂层汉以非遥六月雄图击
长波而未远乡耆等少承荣绪中区胜族门称东别之标地接西隅之向严君平之履道盛德
家传秦子整之谈天风流代袭咸以为妙图真谛事出於无名翠琰玄碑道凝於不朽弇州北
跨犹疏駉驥之铭文石东区尚勒元龟之颂况乎玉衣流庆事属於仙帟金屋延祥福纏於梵
宇爰求胜笔载记芳謠下官弱植少徒薄游多暇薜萝人事空余江海之心笔札神交尚有渊
云之气相如谢病访诗酒於临邛夫子栖迟聽弦歌於单父羣公以道之存矣思传记德之书
下官以文在兹乎愿展当仁之笔其词曰

蜀岭东渐岷山西积月峡星桥胜金孕碧胎靈兆丘墟梵迹鴈塔推基鹿苑遗迹肃肃黄运
英英文母配乾重庆仪坤握矩宠照香城仁沾淨土爰光大壮聿求多祚青牛福地白鹤禅林
重局雾敞复殿云深龕雕翠玉刹树黄金龟镜夕照凤铎晨吟慧楼弥望化台出没栋列长虹
窗栖明月果昏周映莲华间发雨霁猴池烟生龙窟肃穆禅衆优游令宰方驾康衢连舟性海
鸞岳增饰鸡林润彩藻绘相寻丹青尽在我今怀矣穷路何岐承风咏德展义陈词百年心事
千载风期东西南北栖遑几时

益州绵竹县武都山淨慧寺碑

原夫帝机寥廓云雷驱妙有之功正气洪荒清浊构乾元之象融而为川渎结而为山岳五城
輶海接崑閬於大都八洞藏云冠瀛洲於巨阙造化之所偃薄灵谷之所啓处极緹油而纵观
咏颂宁殫出宇宙而高寻风烟罕测是知玉卮无当遐荒非視聽之津金榜所存城阙尽江湖
之致何必九虯齐駉直访银宫八骏长驱遥临石室武都山淨慧寺者梁大青年中之所建也
名山列岳之旧仙都福地之湊黄龙负匣着宝籍於经山紫凤衔书?荣光於井络须弥峯顶仍
开梵帝之宫如意城中即有经行之地尔其盘基跨险列嶂凭霄日月之所甯伏烟霞之所枕
倚飞泉瀑溜荡滌崩崖綠树玄藤网罗丘壑飞尘作气被万吹於中岩帝琰司寒宅千霜於北
谷丹梯碧洞杳冥林岫之间桂庀松楹寂寞风尘之表是称英镇实瞰崇冈阊阖当四会之街
城邑辨三分之地绵碛锦渚下浸重峦玉阜铜陵旁分絶磴山川络绎崩腾宇宙之心原隰纵
横隐軫亭臯之势顷以黄旗夜徙紫盖晨倾九服失图三灵在疚奸臣跃马据折坂而吟云壮
士闻鸡拥阳关而嘯雨岷峨失险化为锋鏑之場江汉横流非复朝宗之国禅宇繇其覆没法
衆是以凋沦国家奄有帝图削平天衅紫宸反照皇阶即叙万国顺百灵朝幽显再立华戎一
揆烛龙韬景避尧日於幽都云鹏敛翼候虞风於晏海以为轩阶具美功穷望祿之台汉道兼
弘力尽祈年之观爰经宝地大啓祥宫抚香象而高视鸣法螺而再唱龙垣淨土连帝道而重
光鹤苑崇基脱皇居而首出况乎山精旧壤下镇偏隅天帝遺墟上干躔次王舍城之宫阙白
玉犹存给孤独之园林黄金尚在法物繇其大备盛德所以相寻株兵奉天藏之图泉女献山

只之籍离亭合榭因岸谷之高低叠观连房执冈峦之曲直丹崖反照画拱相临绿障斜烟雕帘间出丰隆晓震次复溜而凄皇列缺晨奔望崇轩而愕眙千香宝树自起风烟九乳仙钟独鸣霜雪银龕佛影遥承鴈塔之花石壁经文下映龙宫之叶虹生北涧即挂新幡凤下东岑还栖旧刹若乃寻曲历崇隈周行数里直上千仞苍松蓄吹临絶迳而疏寒黛筱防烟绕回疆而结春岩橘柚影入山堂秋壑芙蓉光浮水殿亦有山童采葛入丹窰而忘归野老紆花向青溪而不返山神献果送出庵园天女持花来游净国实杳冥之秘诀托幽深之逸境岂直淮南桂树暂得仙家江左桃源终迷故老而已爰有寛閤梨者俗姓杨氏其先华陰人也因官徙地家於绵竹山分太华水带长汾川岳会同风云感召玄经素论侍郎居八俊之英绿绶黄轩太尉列三台之首法师玉函降彩金瓶探色振八解之遥源践三明之广路灵机入证穷象载於初髻妙谛因心释羊车於弱冠三千法界繇广位而出无明十二因缘自普济而登彼岸弘宣誓愿大振沈黎挥觉剑而破邪山扬智灯而照昏室弥纶所被白马尽於禺同权渐所开黄牛至於嶓冢诚乐土憩影兹峯乃以贞观九年於寺西院立七佛堂一僧舍星毫动牖月面分堦彩凤衔旒神龙负塔飞烟涌座龕龕初刹之天香雾成台树树菩提之果朝散大夫行县令清河张楚亲承妙业俯刊贞琰林宗有道伯喈无愧法师夙机少悟变多奇玉山中断琼林下杂支道林之好事语嘿方融释慧远之高居风埃遂隔泊乎坐忘遗照返寂归真城肆飒然若遗空山黯而无色岂直岩枝泣血礪户摧梁而已哉县令刘照彭城人也自礪山仗剑绾凤历於云台春郊授钺嗣龙图於白水玉垒三分之胄下杂公门金陵一霸之基旁参帝绪翠綬丹紱历今古而先鸣人杰地灵冠山川而得儔君膺岳渎之秀挺风云之会昆溪剑锷直照胷襟楚泽珪璋潜周履行鲁恭明德方昇汉辅之阶潘岳能文且职河阳之县仁徽可被闔境仰其风猷威德所加百城叠其霜彩尚乃康庄妙域光开不舍之坛舟楫爱河昭畅无生之业痛鸞林之殄瘁悲象教之榛芜爰命缉兴式光泉藪虎溪龙涧近分庐岳之图金阙瑶台更讨瀛洲之记铭曰

武都仙镇龙墟粤域邑动香城山开净国涧流百道峰云五色谷暗藤斜山高树逼千楣鹤列万拱星悬分林构址接磴开廛临阶竹树遶栋风烟龕前怪石塔下秋泉綠崖疏迳青岑拒室雾道相萦烟房互出叶浓磎净花深嶂密鸟度难寻猿惊易失檐分石窰地络金沙丹丘抗月碧洞栖霞松开野路桂列仙家仙鑪柏叶宝座莲花砌因岩曲桥随峯返果出天厨香来仙苑玉铸啓曙金璫照晚谷思钟张山悲铎远閭阎践胜铜墨高情声飞别邑望动专城悬金道肆刻石山楹千载之後吁嗟令名

梓州郫县兜率寺浮图碑

若夫仙楼白玉窈冥崑阆之墟神阙黄金寂寞蓬瀛之浦斯则冈峦髣髴凤册而空存岛凭陵舫龙舟而罕迨至若按皇轩於夏籙考璿构於殷图周王北洛之官秦帝南山之合西京故事下聽雷霆东国余基俛临风雨莫不陵迁谷变共榛灌而丘墟火絶烟沉与云雨而块莽其有据坤灵之宝位借神道之冥扶占象纬而图基揆川原而宅址蜂台映月还临舍卫之城鴈塔寻云即对閤之岭成而不毁者将斯之谓与兜率寺者隋开皇中之所建也尔其林泉糾合之势山川表里之制抽紫岩而四絶叠丹峯而万变连溪拒壑所以控引太虚蒸云驾雨所以荡泄元气涪江千仞波潮将旭日争光都城百雉薨栋与晴霞共色信光造化之奇模尽登

临之妙境玄房雾转抗金枢於桂岳之前紺殿星开栖玉刹於梅林之下岩花落沼近拂天衣
涧叶低陰斜笼宝座宵汀鹤警乘鼓吹而齐鸣晓峡猿清挟霜钟而赴节若乃巡碧磴历玄阶
鎖窗澄彩琼铺洞照神姿满月疑临石镜之峯衆馥扬烟似对香炉之岳信可下清人境上配
天都为胜地之先鸣执名山之右契者也爰有信弟子某乙等夙祛尘网早植慈根悲梵室之
未弘悼禅居之犹?以为上栋下宇河图避风雨之灾广榭崇台时令着高明之宅是以菩提长
者竞洁舍卫之坛天帝人王争辟仙宫之塔则知威容下丽羣生鲜瞻仰之因材朴重瑯黎人
有子来之地乃於寺内建浮图一所某年月日乡望等兆基弘愿继发淨因陵軼中天规模大
壮高列砌架回浮轻轩直上千寻周回百步占氛候景神祇叶幽赞之功揆墨端行班倕逞絶
羣之思收岱宗之杞梓聚崑山之玉石土兼五色金逾百链龙蟠万拱策屏翳而高骧鹤矫千
楣冠扶摇而独运重檐蔼蔼云将反覆於棖轩洞宇寥寥风伯栖遑於户牖仙娥去月旅方镜
而忘归宝婺辞星攀圆璫而未返玄菟湛?若鹏飞之戾九天丹檻聯騫如凤翔之据千仞每至
韶光照湛爽霭晴遥列郊墟於四野开云气於千里风恬雨霁烟雾藻天地之容野旷川明风
景挟江山之助则有瑯帘绣轴排淨域而停轮宝骑银鞍指珍台而耸轡於是披岫幌抵岩扃
攀翠复而三休步玄梁而十憩廊轩外敞淑气长延陰室中开鲜飈自激俯环瀛而极望积苏
非遥出云汉而高践灵槎可记真福地之殊观香城之巨丽者乎寺主等沈研二谛振耀三关
抵苍壁於邪山揽玄珠於定水挹其流者曲成般若之缘承其风者濬发菩提之愿长史河东
裴某风神朗润操履贞勤萧条江海之心磊砢冰霜之节下岷关而叱馭寄切全都临蜀野而
宣条功深半刺县令卫玄海内高流河东望族荣高铜墨任屈弦歌浹辰而风化大行踰月而
奸豪屏气陶潛彭泽自得高人王吉临邛仍延重客县丞胡敬仁三河旧族一代良材提鎔鄒
而愿割局骅骝而待步江湖秋至方怀纵壑之图海浪风高未接垂天之翼乡望等并中和受
气孝友承家才称江汉之灵地实岷峨之秀或以时良入选擢迹乡邻或以朝望来仪升名郡
县并沐康衢之化俱承比屋之封瞻彼岸而同归登春台而共乐咸以垣墉遽覆犹传路寝之
歌银鼎俄穷尚勒灵台之颂况乎崇基奕奕与天地而争工层构峩峩配山川而永固岂可使
弘规在我空存蔽日之基雄笔同时不借凌云之气谨闻命矣乃作铭云

二象成纪三才定位开剖太虚导引元气纷纷化迹飈飈圣致行杰趣约归同叶异法王西眷
教迹东游功超道茂义冠儒流丹青既备栋宇旋周梵宫霞积香阁星浮缅想蓬瀛金台迴起
旷瞻崑阆瑶房峻峙壮矣名都神居休止大哉英服兹峯诞纪金绳对岭玉牓分岑松扃委郁
桂幌深沈云龕树晦烟洞花深重峦雾结复磴泉吟肃肃禅衆遥遥淨境鹿野经文龙宫拂影
梵榛金室光来石井峡晓猿清池嚙鹤警岷峨旧族江汉英姿争开法愿重崇峻基占云接庑
揆景分墀天人合应幽显呈期灵思孤出神模独涌雾积千楹霞张万栱玉牖星罗璿璫月拥
复榭龙蟠重葢凤耸峩峩峻岳奕奕崇标瑯帘切汉宝缀凌霄深窗閤景洞户流飈银缸夕映
珠铎晨摇我辞秦陇来游巴蜀胜地归心名都憩足甫逮乡县频移灰燭聿从良时仍寻妙躅
旷望原陆周流江泛桃李春风芙蓉秋水烟霞四面关山千里他乡寓目兹焉复几

梓州郫县灵瑞寺浮图碑

若夫神州括地寰中分五岳之图巨壑浮天海上擢三山之秀造化之所枢纽灵仙之所窟宅
故得昭灼天汉发挥云气牛头山者即广汉之名峰也圆裔几乎数里直上逾乎百仞若乃岩

泉铄石之什风烟草木之状倾九围而得隼环四时而竞爽苍岑隐嶙旁分玉砌之阶碧洞逶迤下掬金陵之苑实羣圣之所托也隋开皇中王秀作牧益州来窥胜地首旌嘉号仍疏净域因危裂户就岭磴之成规跨险分荣借冈峦之迴势工穷雕镂妙出丹青飞栋神行回甍灵构又於山顶别建浮图隋运告迁明皇首出轩疏凋昧基础堙芜奄兴宣榭之灾施及栢梁之烬乡望等驰心妙律夙契禅居悲梵宇之摧梁痛珍台之絶构思弘法愿重缉奇功党且千家集惟巨万以为玉楼星峙稽闾苑之全模金阙霞飞得瀛洲之故事指香城而耸睇临火宅而危魂参妙范於神明骋良工於宇宙飞廉按轡定枢臬於风衢羲和顿第揆鈎於日路雕檐画拱龙回紫汉之间复溜重栾凤举丹霄之外琼扉暮敞推日月於金铺绣桷晨开落繁星於玉砌每至两江春返四野初晴山川霁而风景凉林甸清而云雾絶沙汀道暖落花与新燕争飞城邑迎寒凉叶共初鸿竞起则有都人袭赏凭朱檻而披襟野客含情俯丹楹而极睇穷百年之後乐写千里之长怀信可以澡雪精神清疎视听而息机心於纷扰置怀抱於真寂者矣且勃旅游岷徼漂举涪乡年晷一穷时灰七变王阳西上方惊敛轡之心王粲南征实动登楼之思我之怀矣乃作颂曰

大块甄成名山作寺发地龙盘干霄凤峙风雪万邑冈峦千里絶域天成珍台地起揆剝玄岭图基丹 层栋峥嵘重檐?篠有隋紊历重明改照事与时迁迹从原燎义均除旧事切维新如或继者代有其人声飞陇蜀望动州隣争开争施竞植灵因控险裁标循危列构岩烟接庑峰云对溜铎运星衢璫悬月窰紫轩雾合丹梁露透暮春疏节新秋戒序照蒲暄郊气销寒渚树浓莺乱川长鴈举流涕写怀魂驰意与伟哉灵宇壮矣全摹穷高极丽远览长图赏因时合笔为神驱有情君子谁为舍乎

王子安集卷十五

卷十六

钦定四库全书

王子安集卷十六

唐王勃撰

碑

广州宝庄严寺舍利塔碑

昔者万人疾疫神农鞭草而救之四维凋瘵夏禹刊木以除之岂非物外其性则道功出事???其和则任迹着傍稽素篆仰叩玄扉卽时义而规大觉因彝伦而伫真谛向使三灾克殄八正咸修人握戒珠家藏宝印则三十二相不可得而视也八万四千法不可得而闻也然则圣人以运否而生神机以道丧而显况迦维授手摩竭推心高张妙用之功自极横流之弊盖不获已岂徒然哉故能业拥大千化形真一繇乐推而起七觉因来苏而坐三昧发挥五演以寂灭为身常提挈四流用慈悲为化迹黑风宵遁波旬忘反噬之心緑洛晨开天常识问津之所括夷涂於九相蹇步其安纳慧略於重昏迷方自晓大矣哉应物而起兴运而终至自於崑冥复归於无物虽金沙宴驾双林无可作之期而玉谍遗文六尘有经行之俗象法不可以无主微言不可以遂丧六千罗汉竞结香缘五百仙人分开讲肆星龕月殿俄盈震旦之墟凤刹蝇旌坐遍阎浮之域屈伸闔辟其道矣哉夫宝庄严舍利塔者梁大同三年内道场沙门昙俗法师之所立也其琅琊贵族则汉庭峻节祖德犹传梁甫高吟嘉声未远法师夙登真地深入慧门照果业於三明拂尘劳於八解羊车绮岁悬欣半月之词凤阁觴年已振弥天之响道惟坚固行乃头陀百结斯安斥罗绶而罢御十珍虽贵对藜藿而甘心於时以石应天人大弘缁侣法师至诚幽感独步玄宗岂真王公钦振锡之风固亦天子降同輿之礼宝瓶宵注则雨露随轩玉柄朝撝则风霜满席既而素怀有在潜营摛俗之图爰定我居首托栖霞之寺尔乃岩开石溜邑跨金陵鱼峰多赞呗之懽虎溪有送迎之限紫萝山径居藏胜缘青松磻户坐谐幽致枕石漱流者久之原夫见化有缘应身欲谢昊天罔极追怀自远故有诸天会聚共位神光列国交兵独超尘劫译求其致岂不深哉然则麟凤下灵犹称瑞贶玉石微翫尚胜精彩亦有楚铎沦照擢紫霭以冲星周鼎沈华吐黄云而喷景诚浩作者之述足称希代之贵况乎释迦妙相如来真骨虽八万四千之宝塔散在羣方而九十二道之灵虹终闻间出立诚斯应瞻庭庑而时逢非德不邻历山川而罕致是以优填顿颡思存电下之光波愿投身愿奉岩间之影粤在梁武精求不暇以为秦登碣石而事止寻仙汉索瀛洲而心非好善於是斋筵凤设上祈忉利之宫讲帐星随下请龙王之藏轻齎棹海重赏梯山庶玉匣之全移幸金棺之半启以法师智遗人我识洞幽明思假妙因冀通灵感爰承纶绂载践沧溟过石门而右指历铜标而左顾乘桴月泝戒楫星沼相彼遐陬实惟荒裔一音演说本承聽受之乡五日继明素隔照临之域珍奇乃萃圣德攸传则知有感必臻信覃幽境不行而至岂隔殊方法师既达国城式敷朝命受铕筐而顶礼抚瑶鍼而跪发尽收其宝重载而归亦犹珠匿弊衣须马鸣而後用金藏陋宇待

龙树而方开梁氏之都妙箕而仰神光家之繇也【十四字疑有脱误】炎凉可质往反九十旬楫柁不辍风潮八千里以大周三岁届于兹邑法师性丰幽澹质固虚羸绵历是淹疲痾屡积维摩见柄盖伸方便之门道安谢归思远朝廷之事愿居此刹有诏许焉仍分舍利俾弘真福国惟瓠骆郡实番禺尔其封疆跨蹶之壮海陆会同之冲上当星纪下裂坤维阶百越而邻三吴轶雕题而阨交趾神化气色汀洲建不死之乡舜禹精灵原隰现行宫之地间阎雾扑士女云流讴歌有霸道之余毗俗得华风之杂蜃楼高峙犹埋夕帐螺台峻绩尚识朝基信夷夏之奥区而仙灵之窟宅也此寺乃曩在宋朝早筵题目法师聿提神足愿启规模爰於殿前更须弥之塔因缘盛力人以子来徵日官而正墨集风师而举草育王奔令扫地户而献神兵梵事驰心感天官而下灵匠崇阶遽积宝树俄周不殊仙造还如涌出故其粉画之妙丹青之要璿基岌其六时凋关纷其四照仙楹架雨若披云翳之宫彩檻临风似遏扶摇之路散华璫於月径璧合非遥拨罽网於星潄珠连可验玉虬承溜倏云窅而将骞金爵提薨拂烟衢而待翥瑶窗绣户洞达交辉方井圆泉参差倒景雕镌备勒飞禽走兽之奇藻绘争开复地重天之奕悬梁九息良马骏走而未穷叠磴三休的卢骋健而知倦是栖银椀用府琮函采舍卫之遗模得浮图之故事爰自梁末以迄皇初城邑屡新轩墀若旧虽复百魔蜩沸听鼓铎而怀音六贼蜂屯仰橡栾而革面多回净施罕犯仁宫则知会吹及遐斯同偃草慈云所润岂直流根故能比蜀守之祠堂长为典制均鲁王之秘殿若有明徵而其作镇一隅俯穷荒而独秀盘基有地冠终古而长存者乎国家业拥神州建用皇极高祖以援疑拨乱伏紫气而登三太宗以端拱继明自黄离而用九皇上纘乾坤之令业振文武之英风太阶平而百度理中国定而兆人乐时和岁阜邑颂涂歌以五刑不用六械徒设舟车四达谁论贡赋之差?带八荒非复华夷之隔天宝降地符昇木石甄祉飞沈効庆虽叶和制变实类文思之功而持盈守成亦资连帅之助大中大夫使持节广韶等州都督李某早登清贯夙践崇轩嘉猷回发於天朝善政果行於朞月越谿仙镌吐光芒而骇人岱岭寒松排风飏以成性美哉称繇功着鹳响彻於云霄方为时须熊軾疲於道路广陵单轂如送张纲渤海乱绳复思龚遂王尊阜盖欣临折坂之前吴隐朱戟更集贪泉之右高名夙着佛化横飞羣盗屏迹而归农奸吏闻风而去职京坻坐积圉犴潜回汲黯之卧淮阳直闻清静王堂之居汝郡但举贤良用能使檻穽不施猛兽巡江而远窜市廛无扰商旅倍道而相欢颺风寝毒炎埃罢厉人称有道家实无为加以援翰写心自契真廉之旨高谈见意不踰玄嘿之津学究儒林真穷释部知通人事且味禅宗道可以知归物繇其显会是岁也忽於此塔重覩神光玉林照灼金山具足倏来忽往类奔电之含云吐焰流精若繁星之转汉倾都共仰溢郭周窥士女几乎数里光景动乎七重实孟冬之日也观夫至道不私瑞生必繇乎乐国庆基有会福至必依於善人自非化足动微教非饰迹何以发真如之盛契壮实相之辉华在昔凤集颍川宣后归功于良守龙游湘浦章帝布德於贤臣历选前猷兹为故实然後上和下睦主圣臣良灭火返风虽有辞於进让母修子应亦何愧於当仁至於百越衣纓三闕耆老或代道篁竹气推丹桂之城家擅芝兰名动苍梧之野出平原而祛甲拥崇閼以鸣钟并为蕃部之恩亲覩招提之瑞同祈介福共洁斋坛罄龙象於南州尽衣鉢於西竺会吞方仗供备孟兰法鼓振而沙界肃洪钟锵而铁围净妙财爰舍法施争流华轂物於香城文駟填於宝廐镪藏巨亿更入僧田价直百千还登佛座岂徒照车十乘列随氏之明珠盈筐万金积大颠之宝具而已朝散大夫守长史某地乘华绪价握名流豫章擢而成干骐驎生而蹶影山涛天骨无情吏隐之间王衍风神自出尘埃之表自黍荣岭海作式瀛幽略其小术包其大体振温良之逸步得毗赞之弘纲布道移风善宠邦政归休置驿独守家声然则野老行

歌虽致功於露冕藩君坐啸固藉美於题舆化成异壤抑繇同德故能道扬法教挥斥盖纏家
怀方广之恩人慕韦陀之学传灯继广曳组成阴下逮府僚旁周县案并志薰修同希福慧可
谓尔之教矣何日忘之者乎时有明威将军行禹府折冲都尉李公天子之旧属朝廷之夙将
也灵根自远圣族多奇受睇眄於甘泉奉衣纓於平乐青龙带剑光超殿阁之荣白虎衔珠早
陟斋坛之宠自临阃外作镇边城湟水楼船遂劳都尉灞陵车马尚识将军魂惊断雁之峯恩
尽沈鸞之浦濡鳞涸辙处定水而弥勤抚翼香林在穷途而更切频光法会荐委珠珍护持攸
仰招提是属其兆基也如此经纶黼藻其大矣哉爰自上座实纶等并妙根宿植胜果将圆翰
飞般若之林高步檀那之舍慈衿密洞散明月於谈筵智鐸相辉化繁霜於宝刃思琬琰式
播徽猷弟子家嗣太邱泰闺门之薄宦地连睢涣窃藻绘之余工爰托下才用旌高躅岂知仲
宣旅泊方銜深井之悲长卿罢归空负凌云之气我之怀矣乃作铭云

太息颓运嗟呼失道德弊为仁物壮则老絜猿情暗求鵩计早赤水沈珠玄邱坠宝皇矣妙觉
蒸然应期宗深微妙业奥慈悲燃灯匡俗舍筏济时涅槃不住般若无思俯迹见生和光不灭
色音虽昧规模尚切猗欤上人穆彼惟新智倾八藏心超六尘凄凉毁宅解脱迷津鸿冥伫想
龙蛰存身青盖遗邦黄旗故服原隰形势江山重复礪户秋明岩盘夜烛鼓钟于宫声闻于外
聿求紫闥言寻丹瀨絕域栖遑惊涛颠沛至诚冥感神珍显会甄陶设险翼軫疏源尉陀余国
卢寻旧边邑居雄盛人物殷全是惟乐土实曰龙川护持灵刹庄严宝塔基构鼎新亭栢栳
奔日宵排归云晓纳架壁三休连薨四合分惟星纪境控天池栋宇绵邈衡津推移神机丕应
瑞景潜仪光合玉庑彩动金枝凡我僚庶同嗟权实周顓情勤王蒙思逸咫尺幽键往来灵室
共荫法堂俱归慧日四维信受三明弘益贝叶纷纶龙华舄奕讲肆宏敞斋筵巨翼供引纯陀
饭回香积天人合契幽显同心倾家奉贖破产移琛轩裳复鹜纓佩交临兰薰习远檀那意深
伟哉连率冲乎德化职重隼裳秩遵熊驾酌贪贻则还淳息诈道济香城祔凝宝舍琳琅什种
杞梓缙徒调轻僧会辨折文殊奔螭易失令鼠难拘愿刊贞琰永冠康衢伊我穷途欣兹胜謁
文休泛海仲翔游越尚想知音有怀明发谬惟雅顾叨陪天骨爰抽弱翰式叙高踪孤音易竭
独赏难逢思起王粲悲生蔡邕岂无章甫谁适为容

行状

常州刺史平原郡开国公行状

某州县洪飈未翔灵凤垂翼景云不烛神龙宛颈岂非时不可以苟遇道不可以虚行圣人作
而万物睹神功资而百宝用是以山川倒徙太阶怀息乱之臣天地离乖元首伫康时之具则有
得其数者於平原公见之矣自星虹?祉开宝历於轩图雷电窈冥载休徵於鲁?龙骧凤起
霸王存玉垒之云紫盖黄旗王迹着金陵之野故得卿才表秀叠彩骈踪阜盖朱旛连州比郡
公侯必复子孙承百代之基余庆不忘仁义应千龄之运公鼎门疏照穴岫翔辉分岳秀於樊
侯稟辰精於传说折旋儒馆以六艺为笙簧轩翥翰林用两京为鼓吹经邦化俗涉游夏之门
庭减竈麾兵得孙吴之阃奥皇天眷命圣武膺图覩物怀人思功去罪寰中有事曹参希执帛
之荣阃外多虞周縲企中军之宠见危授命藏器及时攀凤羽於九霄候龙顔於千里萧王内
寝频猷雅诚韩信齐坛屡迁优秩武德三年授中郎将俄迁大将军秦王统军皇基肇辟天步

犹难宸宸应上相之荣仙梦受中权之寄被庠讲将实赖宏图今日金谋光应时望于时弄兵窃举犹勤甲冑吞沙餌石尚阻河梁公制变以奇荡除以杀七擒三捷之略绪着辕门拔旗穿札之能勲在盟府五年六月加上柱国随班列也剪桐疏爵分茅建社下断物土上格星躔唐虞着其升降周汉明其损益所以羽仪帝室蕃卫王畿惩恶劝善庸贤叙德高祖勲逾黜夏业擅戡黎置酒醴於南宫扬旌旆於东府建皇帝之号安不忘危览彻侯之籍荣而思报以公乃诚匪懈原始要终望严雪而识寒松观疾风而知劲草九年封望都县男贞观元年改封县侯文貔禁旅实着趨雄清道啓行允兹多士自非誉高朝讽价重人謠仍亏博望之仪必乱鈎陈之选公早陪戎律夙简帝心敷历二宫当仁不让授左卫中郎俄迁右虞侯率葱山狄壤蒲海蛮貊信要服之外区乃匈奴之右地境邻虵泽乘劲席而鵬腾郡迓酒泉侯霄尘而鸛视天子乃停旒侧听负宸宸惊振洪策於古今溢严勲於覆载将使八紘昭泰银台应益地之图九县平夷瑶水流寻仙之驾贞观某年授高昌道行营总管公道凝三略功标五才逸气纵横雄精贯月象物而动鼓鼙肃战士之容推信而行歌舞表将军之德裹粮坐甲轻死等於鸿毛投袂冲冠重义均於熊掌鉴空归惠荒度来宾收郑吉之前踪复张骞之故事庙堂颂德魏阙酬庸光赞末条非公莫可某年授某州刺史寻以江淹粤域衡霍名区楚情剽狡吴风浇竞火耕水耨郡阙嫠女之精竦剑危冠人寻鱗诸之弊分宣演化卧理切於宸襟易俗迁讹行吟伫於人望贞观某年迁睦州刺史政刑不愆考绩连最俄授使持节松州都督今上钩台嗣历鼎邑凝图百城劳晋武之心千里扬汉宣之诏玺书加秩縟礼请藩纶焕增班事高恒典永徽中改沙州刺史属鰲山乱德鸿水稽诛扶桑落日之滨妖朋蚁结孤竹寻云之际孽党蜂腾百济遗黎托悬巢而斩气三韩别种附危幕而游魂玉帐蒐兵伫责包茅之贡金坛令律将收楛矢之琛龙朔年中授公熊津道总管公昔从幕府早厠戎行览兵法於轩辕受阴阳於吕望三门五垒得破敌之奇谋大舰云梯总行军之妙法故得战无全阵野靡坚城撓金将跃马暂临衔壁与牵羊相继岂惟秋方息乱遥闻定远之名春谷投心遐想度辽之策若斯而已矣及三军献捷诸将论功帝嘉乃勲作镇炎野授公广州都督改封平原公以途邻北户地接南池珠崖魑魅之乡桐柱贪残之境累藩斯寄历任称难於是受以春风临以夏日明冠婚於县邑布庠塾於闾阎薤本诛强奸豪屏气棠阴察狱惇独申哀理龚遂之乱绳解虞卿之错节黄霸得循良之誉绩未銜於边城陈汤有方面之勲位不登於刺举兼方具美其式兹乎朝廷以公屡参伯牧骏历班条吏不忍欺人无胥怨伏情馭极留连稷野之童托义训毗惆悵耶溪之老虽有黄槐紫棘无以易尧盛岳名都犹闻借寇麟德元年改授金紫光禄大夫常州刺史既而天机忽爽大渐弥留白玉徒煎黄金难化台阶侧席方膺雉冕之尊玉女停机俄逢鵲衣之变以某年某月日春秋若干薨于公舍呜呼哀哉惟公间气呈姿灵和叶庆凤鸣千仞鹏抟万里情关峻远得意於衆妙之门性宇沈凝忘筌於毁誉之境因心以至孝悌表於乡闾临义而行禄赐均於宗族故得虬骧螭屈履乘轩临汉於締构之辰游梁於骇乱之际章沟雾辟曳鸛尾而晨趋甲馆烟开奉旄头而夜警鸣鼙出塞进李牧之奇诚露冕巡方受苏章之直笔方当献纳黄屋揖拜青墀入东寺而掌壶处南台而曳履不谓藏舟夜涉负杖朝兴丹丘之化未寻玄扃之痛俄及故怨深撤乐悲纏罢市者乎谨状

王勃传

王勃传 【石晋】 刘昫

王勃字子安绛州龙门人祖通隋蜀郡司户书佐大业末弃官归以着书讲学为业依春秋体例自获麟後历秦汉至於後魏着纪年之书谓之元经又依孔子家语扬雄法言例为客主对答之说号曰中说皆为儒士所称义宁元年卒门人薛收等相与议諡曰文中子二子福時福郊勃六岁解属文构思无滞词情英迈与兄勔勳才藻相类父友杜易简常称之曰此王氏三珠树也勃年未及冠应幽素举及第乾封初诣阙上宸游东岳颂时东都造乾元殿又上乾元殿颂沛王贤闻其名召为沛府修撰甚爱重之诸王鬪鸡亘有胜负勃戏为檄英王鷄文高宗览之怒曰据此是交构之渐即日斥勃不令入府久之补虢州参军勃恃才傲物为同僚所嫉有官奴曹达犯罪勃匿之又惧事泄乃杀达以塞口事发当诛会赦除名时勃父福時为雍州司户参军坐勃左迁交趾令上元二年勃往交趾省父道出江中为采莲赋以见意其辞甚美渡南海墮水而卒时年二十八勳弱冠进士登第累除太子典膳丞长寿中擢为凤阁舍人时寿春王成器衡阳王成义等五王初出阁同日授册有司撰仪注忘载册文及百僚在列方知阙礼宰相相顾失色勳立召书吏五人各令执笔口占分写一时俱毕词理典贍人皆叹服寻加弘文馆学士兼知天官侍郎勳颇任权势交结非类万岁通天二年綦连耀谋逆事泄勳坐与耀善并弟勔并伏诛勳累官至泾州刺史神龙初有诏追复勳勔官位福時天后朝以子贵累转泽州长史卒初吏部侍郎裴行俭典选有知人之鉴见勳与苏味道谓人曰二子亦当掌銓衡之任李敬玄尤重杨炯卢照隣骆宾王与勃等四人必当显贵行俭曰士之致远先器识而後文艺勃等虽有文才而浮躁浅露岂享爵禄之器耶杨子沈静应至令长余得令终为幸果如其言勃文章迈捷下笔则成尤好着书撰周易发挥五卷及次论等书数部勃亡後并多遗失有文集三十卷勃聪警絶衆於推步历算尤精尝作大唐千岁历言唐德灵长千年合承周隋短祚其论大旨云以土王者五十代而一千年金王者四十九代而九百年水王者二十代而六百年木王者三十代而八百年火王者二十代而七百年此天地之常期符历之数也自黄帝至汉并是五运真主五行已遍土运复归唐德承之宜矣魏晋至於周隋咸非正统五行之沴气也故不可承之大率类此

王勃传

王勃传 宋 宋祁

王勃字子安绛州龙门人六岁善文辞九岁得顔师古注汉书读之作指瑕以摘其失麟德初刘祥道巡行关内勃上书自陈祥道表于朝对策高第年未及冠授朝散郎数献颂阙下沛王闻其名召署府修撰论次平台秘略书成王爱重之是时诸王鬪鸡勃戏为文檄英王鸡高宗怒曰是且交构斥出府勃既废客劔南尝登葛幘山旷望慨然思诸葛亮之功赋诗见情闻虢州多药草求补参军倚才陵籍为僚吏共嫉官奴曹达抵罪匿勃所惧事泄辄杀之事觉当诛会赦除名父福時繇雍州司功参军坐勃故左迁交趾令勃往省度海溺水瘁而卒年二十九初道出鍾陵九月九日都督大宴滕王阁宿命其婿作序以夸客因出纸笔徧请客莫敢当至勃慨然不辞都督怒起更衣遣吏伺其文辄报一再报语益奇乃矍然曰天才也请遂成文极欢罢勃属文初不精思先磨墨数升则酣饮引被覆面卧及寤援笔成篇不易一字时人谓勃为腹藁尤喜着书初祖通隋末居白牛溪教授门人甚衆尝起汉魏尽晋作书百二十篇以续古尚书後亡其序有録无书者十篇勃补完 逸定着二十五篇尝谓人子不可不知医时长安曹元有秘术勃从之游尽得其要尝读易夜梦若有告者曰易有太极子勉思之寤而作易发挥数篇至晋卦会病止又谓王者乘土王世五十数尽千年乘金王世四十九数九百年乘水王世二十数六百年乘木王世三十数八百年乘火王世二十数七百年天地之常也自黄帝至汉五运适周土复归唐唐应继周汉不可承周隋短祚乃斥魏晋以降非真主正统皆五行沴气遂作唐家千岁历武后时李嗣真请以周汉为二王後而废周隋中宗复用周隋天宝中太平久上言者多以诡异进有崔昌者采勃旧说上五行应运历请承周汉废周隋为闰右相李林甫亦赞右之集公卿议可否集贤学士卫包起居舍人阎伯璵表上曰都堂集议之夕四星聚於尾天意昭然矣於是玄宗下诏以唐承汉黜隋以前帝王废介鄴公尊周汉为二王後以商为三恪京城起周武王汉高祖庙授崔昌太子赞善大夫卫包司虞员外郎杨国忠为右相自称隋宗建议复用魏为三恪周隋为二王後鄴介二公复旧封贬崔昌乌雷尉卫包夜郎尉阎伯璵涪川尉勃兄勳弟助皆第进士勳长壽中为凤阁舍人壽春等五王出阁有司具仪忘载册文羣臣已在乃悟其阙宰相失色勳召五吏执笔分占其辞粲然皆毕人人嗟服寻加弘文馆学士兼知天官侍郎始裴行俭典选见勳与苏味道曰二子者皆铨衡才至是语验勳素善刘思礼用为箕州刺史与綦连耀谋反勳与兄涇州刺史勔及助皆坐诛神龙初诏复官助字子功七岁丧母哀号隣里为泣居父忧毁骨立服除为监察御史里行初勔勳勃皆着才名故杜易简称三珠树其後助劼又以文显劼早卒福時少子劝亦有文福時尝诧韩思彦思彦戏曰武子有马癖君有誉儿癖王家癖何多耶使助出其文思彦曰生子若是可夸也勃与杨炯卢照隣骆宾王皆以文章齐名天下称王杨卢骆四杰炯尝曰吾媿在卢前耻居王後议者谓然

遗事

遗事

王勃示知己诗云客书同十奏臣剑已三奔则不为无意於功名者梦游仙诗云乘月披金枝连星解琼佩则不为无意於神仙者是以登葛帟山而思武侯之功宿仙居观而思霓衣之侣也又述怀拟古诗云仆生二十祀有志十数年下策图富贵上策怀神仙而二志竟不遂可胜叹哉【韵语阳秋】

集评

集评

萧明与王僧辩书凡诸部曲赴投戎行霜戈电戟无非武库之兵龙甲犀渠皆是灵台之仗王勃滕王阁序紫电清霜王将军之武库正用此事以十四岁之童子胸中万卷千载之下宿儒犹不能知其出处岂非间世奇才杜子美韩退之极其推服良有以也使勃与杜韩并世对毫恐地上老骥不能追云中俊鹖也【丹铅录】

褚渊碑风仪与秋月齐明音徽共春云等濶庾信马射赋落花与芝盖齐飞杨柳共春旗一色隋长寿舍利碑浮云共岭松张盖明月与岩桂分丛王勃滕王阁记本此然勃之语何啻青出於蓝前无古人也【丹铅录】

滕王阁记至今称之上巳云绿齐山叶满红泄?花销九日云兰气添新酌花香染别衣又咏风云肃肃凉景生加我林壑清驱烟入洞户卷雾出山楹去来固无迹动息如有情日落山水静为君起松声最有余味真天才也【唐诗纪事】

王勃寺碑高台与雁塔俱平曲?与猴池共尽佛有五精舍猕猴江其一也【杨用修外集】

王勃河桥不相送江树远含情杜荀鹤承恩不在貌教妾若为容皆五言律也然去後四句作絕乃妙【艺苑卮言】卢骆王杨号称四杰词旨华靡固沿陈隋之遗骨气翩翩意象老境超然胜之五言遂为律家正始内子安稍近乐府杨卢尚宗汉魏【艺苑卮言】

纠谬

纠谬

永嘉所刻初唐十二家其王子安集有田家三首过眼知非子安作细玩知为王无功作也张氏贵公子多食客何以谬误至此剔出以不误观者

田家三首

田家三首

阮籍生平懒嵇康意气疎相逢一饱醉独坐数行书
平池聊养鹤闲田且牧猪草生元亮径花暗子云居
倚牀看妇织登陇课儿锄回头寻仙子并是一空虚

家住箕山下门枕颍川滨不知今有汉唯言昔避秦
琴伴庭前月酒劝後园春自得中林士何忝上皇人

平生唯以乐作性不能无朝朝访乡里夜夜遣人酤
家贫留客久不暇道精麤抽帘特益炬拔策更燃炉
怕闻饮不足何见有残壶

补遗

补遗

王勃之先文中子见勃弄笔令作题太公遇文王赞曰姬昌好德吕望潜华城阙虽近风云尚
賒渔舟倚石钓浦横沙路幽山僻溪深岸斜豹韬襁恶龙铃辟邪虽逢切近犹待安车君王握
手何其晚耶【芝田錄】

按杨炯序勃文集云陈羣稟太丘之训时不逮焉是勃未及见祖也丁用晦云文中命之作颂
恐误姑阙之